

Updated: 24.08.2023

বাংলাদেশ কারা ও সংশোধন পরিষেবা আইন, ২০২৩ (খসড়া)

**Bangladesh Prisons and Correctional Services Act, 2023 (Draft)**

বাংলাদেশ প্রিজন্স অ্যান্ড কারেকশনাল সার্ভিসেস অ্যাক্ট, ২০২৩ (খসড়া)

## ২০২৩ সালের \_\_\_ নং আইন

Prisons Act, ১৮৯৪ (১৮৯৪ খ্রিষ্টাব্দের ১৯ নং আইন) ও Prisoners Act, ১৯০০ (১৯০০ খ্রিষ্টাব্দের ৩ নং আইন) রহিতক্রমে উহাদের বিধানাবলি বিবেচনাসাপেক্ষে সময়ের চাহিদার প্রতিফলনে নূতন আইন প্রণয়নের লক্ষ্যে আনীত

### বিল

যেহেতু Prisons Act, 1894 (Act No, IX of 1894) এবং Prisoners Act, 1900 (Act No, III of 1900) রহিতক্রমে উহাদের বিধানাবলি বিবেচনাসাপেক্ষে সময়ের চাহিদার প্রতিফলনে নূতন আইন প্রণয়ন করা আবশ্যিক; এবং

যেহেতু উক্ত আইন দুইটির আবশ্যিকতা ও প্রাসঙ্গিকতা পর্যালোচনাপূর্বক আবশ্যিক বিবেচিত বিধানসমূহ সকল অংশীজন এবং সংশ্লিষ্ট মন্ত্রণালয় ও বিভাগের মতামত গ্রহণপূর্বক প্রয়োজনীয় সংশোধন ও পরিমার্জনক্রমে আইন প্রণয়নের বিষয়ে সরকার সিদ্ধান্ত গ্রহণ করিয়াছে; এবং

যেহেতু কারাগারকে আধুনিক প্রতিষ্ঠান হিসাবে সংস্কারের লক্ষ্যে মাননীয় প্রধানমন্ত্রী প্রতিশ্রুতি ও নির্দেশনা প্রদান করিয়া কারাগারকে বন্দিশালা নহে বরং সংশোধনাগারে পরিবর্তন ও সংস্কার করিবার জন্য প্রয়োজনীয় পদক্ষেপ গ্রহণের সিদ্ধান্ত প্রদান করিয়াছেন;

সেইহেতু সরকারের উল্লিখিত সিদ্ধান্তের আলোকে এতদ্বারা নিম্নরূপ আইন প্রণয়ন করা হইল :

### প্রথম অধ্যায়

#### প্রারম্ভিক

১। সংক্ষিপ্ত শিরোনাম ও প্রবর্তন— (১) এই আইন ‘বাংলাদেশ কারা ও সংশোধন পরিষেবা আইন, ২০২৩ [Bangladesh Prisons and Correctional Services Act, 2023]’ নামে অভিহিত হইবে।

(২) সরকার, সরকারি গেজেটে প্রজ্ঞাপন দ্বারা, যে তারিখ নির্ধারণ করিবে সেই তারিখে এই আইন বা ইহার অংশবিশেষ কার্যকর হইবে।

২। সংজ্ঞার্থ— বিষয় অথবা প্রসঙ্গের পরিপন্থি কোনো কিছু না থাকিলে, এই আইনে—

- (১) ‘অতিরিক্ত কারা মহাপরিদর্শক’ অর্থে ধারা ৯৩-তে বাংলাদেশ কারা ও সংশোধন পরিষেবা ডিপার্টমেন্ট-এর অতিরিক্ত মহাপরিদর্শক-কে বুঝাইবে;
- (২) ‘অপরাধ’ অর্থ কোনো কার্য সম্পাদন করা বা করা হইতে বিরত থাকা, যাহা দেশে প্রচলিত কোনো আইনের অধীন শাস্তিযোগ্য বা দণ্ডনীয়;
- (৩) ‘অর্জিত সম্পত্তি’ অর্থ কারাবাসকালে বন্দি কর্তৃক উপার্জিত যে-কোনো পরিমাণ টাকা;
- (৪) ‘আংশিক উন্মুক্ত অংশ’ অর্থ ধারা ৫-এ বর্ণিত কারাগারের অভ্যন্তরে কোনো আংশিক উন্মুক্ত (Semi-open) স্থান;

- (৫) ‘আদালত’ অর্থে সুপ্রীমকোর্টসহ যে-কোনো আদালত এবং বিভিন্ন আইনের অধীন প্রতিষ্ঠিত ট্রাইব্যুনালও ইহার অন্তর্ভুক্ত হইবে;
- (৬) ‘আদেশ’ অর্থ আদালত বা ট্রাইব্যুনাল বা উপযুক্ত কর্তৃপক্ষ কর্তৃক প্রদত্ত যে-কোনো বা সকল আদেশ;
- (৭) ‘আবদ্ধ অংশ’ অর্থ ধারা ৫-এ বর্ণিত কারাগারের অভ্যন্তরে কোনো আবদ্ধ (closed) অংশ;
- (৮) ‘উন্মুক্ত অংশ’ অর্থ ধারা ৫-এ বর্ণিত কারাগারের অভ্যন্তরে কোনো উন্মুক্ত (open) অংশ;
- (৯) ‘কারা অধিদপ্তর’ অর্থ বাংলাদেশ সরকারের স্বরাষ্ট্র মন্ত্রণালয়ের অধীন পরিচালিত কারা অধিদপ্তর;
- (১০) ‘কারা অপরাধ’ অর্থ ধারা ৭৯-এ উল্লিখিত কারা অভ্যন্তরে শৃঙ্খলাভঙ্গজনিত যে-কোনো অপরাধ;
- (১১) ‘কারা উপ-মহাপরিদর্শক’ অর্থ ধারা ৯৪-এর অধীন বাংলাদেশ কারা ও সংশোধন পরিষেবা ডিপার্টমেন্ট-এর উপ-মহাপরিদর্শক;
- (১২) ‘কারা এলাকা’ অর্থ কারা কর্তৃপক্ষের অধীনে থাকা কারাসংলগ্ন এলাকা;
- (১৩) ‘কারা কর্তৃপক্ষ’ অর্থ কারা মহাপরিদর্শক এবং বাংলাদেশ কারা ও সংশোধন পরিষেবা ডিপার্টমেন্ট-এর কর্মকর্তা বা কর্মচারীবৃন্দ;
- (১৪) ‘কারা মহাপরিদর্শক’ অর্থ ধারা ৯১-এর অধীন নিযুক্ত বাংলাদেশ কারা ও সংশোধন পরিষেবা ডিপার্টমেন্ট-এর মহাপরিদর্শক;
- (১৫) ‘কারা হাসপাতাল’ অর্থ কারাগারের অভ্যন্তরে স্থাপিত ও পরিচালিত হাসপাতাল;
- (১৬) ‘কারাগার’ অর্থ ধারা ৪-এর অধীন প্রতিষ্ঠিত বা ঘোষিত বা ক্ষেত্রমতো, ধারা ৫-এর অধীন শ্রেণিবিন্যাসকৃত কোনো কারাগার;
- (১৭) ‘কিশোর’ অর্থ ১৮ (আঠারো) বৎসরের ঊর্ধ্বে কিন্তু ২১ (একুশ) বৎসরের নিম্নের যে-কোনো ব্যক্তি;
- (১৮) ‘ঝুঁকি ও চাহিদা নিরূপণ কমিটি’ অর্থ ধারা ১৩-এর অধীন গঠিত ঝুঁকি ও চাহিদা নিরূপণ কমিটি;
- (১৯) ‘ডিপার্টমেন্ট’ অর্থ ধারা ৬-এর অধীন প্রতিষ্ঠিত বাংলাদেশ কারা ও সংশোধন পরিষেবা ডিপার্টমেন্ট;
- (২০) ‘তৃতীয় লিঙ্গ’ অর্থে নারী ও পুরুষ ব্যাতিত অন্যান্য যেকোন লৈঙ্গিক বৈশিষ্ট্যসম্পন্ন ব্যক্তিকে বুঝাইবে;
- (২১) ‘দায়িত্বপ্রাপ্ত কর্মকর্তা’ অর্থ কারা কর্তৃপক্ষ কর্তৃক বিভিন্ন দায়িত্ব পালনের জন্য মনোনীত যে-কোনো কর্মকর্তা বা কর্মচারী;
- (২২) ‘নিষিদ্ধ দ্রব্যাদি’ অর্থে প্রচলিত আইনের অধীন বা সরকার কর্তৃক, সময়ে সময়ে, নিষিদ্ধ ঘোষিত যে-কোনো দ্রব্যাদি অথবা এই আইন বা ইহার অধীন প্রণীত বিধি দ্বারা কারাগারে নিষিদ্ধ যে-কোনো দ্রব্যাদিও ইহার অন্তর্ভুক্ত হইবে;
- (২৩) ‘প্রতিবন্ধী’ অর্থ প্রতিবন্ধী ব্যক্তির অধিকার ও সুরক্ষা আইন, ২০১৩ ( ২০১৩ সনের ৩৯ নং আইন ) এর ধারা ৩ এ বর্ণিত যে কোন ধরনের প্রতিবন্ধিতাসম্পন্ন কোন ব্যক্তি;
- (২৪) ‘বন্দি’ অর্থ আদালত বা ট্রাইব্যুনাল কর্তৃক সাজাপ্রাপ্ত আসামি, বিচারাধীন মামলার অভিযুক্ত, নিরাপদ হেফাজতে বা প্রচলিত আইনের বিধান-অনুসারে আটকাদেশপ্রাপ্ত কোনো ব্যক্তি;

- (২৫) ‘বিচারামীন বন্দি’ অর্থ বাংলাদেশে প্রচলিত আইনের অধীন গঠিত যে-কোনো আদালতে মামলা বা কোনো বিচারিক কার্যধারা চলমান থাকা অবস্থায় আটক থাকিবার আদেশপ্রাপ্ত হইয়া কারাগারে অবস্থানরত কোনো ব্যক্তি;
- (২৬) ‘বিদেশি বন্দি’ অর্থ কারাগারে অবস্থানরত বাংলাদেশের নাগরিক নহে এইরূপ ব্যক্তি;
- (২৭) ‘বিদ্রোহ’ অর্থ অধিভুক্ত দুই বা ততোধিক ব্যক্তি কর্তৃক সম্মিলিতভাবে সরকার বা কারা কর্তৃপক্ষের বিধিসম্মত আদেশ অমান্য করা বা উক্ত কর্তৃপক্ষের কর্তৃত্বকে চ্যালেঞ্জ করা, প্রতিহত করা বা উৎখাত করা অথবা দুই বা ততোধিক ব্যক্তি তাহাদের অসন্তুষ্টি সম্মিলিতভাবে কর্তৃপক্ষের নিকট প্রকাশ করা বা উক্তরূপ কার্যকরণের কোন প্রচেষ্টা গ্রহণ করা;
- (২৮) ‘ব্যক্তিগত তহবিল’ অর্থ বন্দির ব্যক্তিগত সম্পত্তি ও অর্জিত সম্পত্তির সমন্বয়ে গঠিত তহবিল;
- (২৯) ‘ব্যক্তিগত সম্পত্তি’ অর্থ কারাগারে আগমনের সময় বন্দির সহিত তাহার পরিধেয় বস্ত্রাদি এবং বিধি অনুযায়ী অনুমোদিত চশমা, শিক্ষা উপকরণ বা অন্য কোনো দ্রব্যাদি ব্যতিরেকে অন্য যে-কোনো দ্রব্যাদি;
- (৩০) ‘মেডিক্যাল অফিসার’ অর্থ ধারা ১০৩-এ উল্লিখিত মেডিক্যাল অফিসার;
- (৩১) ‘মেডিক্যাল অ্যাসিস্ট্যান্ট’ অর্থ বাংলাদেশ কারা ও সংশোধন পরিষেবা ডিপার্টমেন্ট কর্তৃক নিযুক্ত ফার্মাসিস্ট, সেবক, সেবিকা, ল্যাব টেকনিশিয়ান বা প্যারামেডিক;
- (৩২) ‘যৌন হয়রানি’ অর্থ অনাকাঙ্ক্ষিত যৌন আবেদনমূলক আচরণ (সরাসরি বা ইঞ্জিতে); প্রাতিষ্ঠানিক এবং পেশাগত ক্ষমতা ব্যবহার করে যৌন সম্পর্ক স্থাপনের চেষ্টা করা; যৌন হয়রানি বা নিপীড়নমূলক উক্তি, মন্তব্য বা ভঙ্গি, যৌন সুযোগ লাভের জন্য অবৈধ আবেদন; পর্নোগ্রাফি দেখানো; অশালীন ভঙ্গি, অশালীন ভাষা বা মন্তব্যের মাধ্যমে উত্ত্যক্ত করা; চিঠি, টেলিফোন, মোবাইল, এসএমএস, ছবি, নোটস, কার্টুন, বেঞ্চ, চেয়ার-টেবিল, নোটস বোর্ড, অফিস, ফ্যাক্টরি, শ্রেণীকক্ষ, টয়লেট বা বাথরুমের দেয়ালে যৌন ইঞ্জিতমূলক অপমানজনক কোন কিছু লেখা; ব্ল্যাকমেইল অথবা চরিত্র হননের উদ্দেশ্যে স্থির বা ভিডিও চিত্র ধারণ করা; যৌন হয়রানির কারণে খেলাধুলা, সাংস্কৃতিক, প্রাতিষ্ঠানিক এবং শিক্ষাগত কার্যক্রমে অংশগ্রহণ থেকে বিরত থাকতে বাধ্য হওয়া; ভয় দেখিয়ে বা মিথ্যা আশ্বাস দিয়ে বা প্রতারণার মাধ্যমে যৌন সম্পর্ক স্থাপন বা স্থাপনে চেষ্টা করা ইত্যাদিসহ প্রচলিত আইন ও উচ্চ আদালতের নির্দেশনা অনুসারে অন্যান্য বিষয়াবলী;
- (৩৩) ‘রেয়াত’ অর্থ এই আইন বা ইহার বিধি অনুসারে বন্দি কর্তৃক অর্জিত সাজা হ্রাসকরণ;
- (৩৪) ‘শিশু’ অর্থ অনূর্ধ্ব ১৮ (আঠারো) বৎসর বয়স পর্যন্ত সকল ব্যক্তি;
- (৩৫) ‘শৃঙ্খলা ও নিরাপত্তা কমিটি’ অর্থ ধারা ৮০-এর অধীনে গঠিত শৃঙ্খলা ও নিরাপত্তা কমিটি;
- (৩৬) ‘সাজা বাস্তবায়ন পরিকল্পনা’ অর্থ বন্দির আগ্রহ ও উপযোগিতা নিরূপণপূর্বক বন্দির সংশোধন, পুনর্বাসন ও সমাজে পুনঃঅঙ্গীভূতকরণের লক্ষ্যে ঝুঁকি ও চাহিদা নিরূপণ কমিটি কর্তৃক প্রণীত সাজা বাস্তবায়ন পরিকল্পনা;
- (৩৭) ‘সাজাপ্রাপ্ত বন্দি’ অর্থ প্রচলিত আইনের অধীন গঠিত যে-কোনো আদালত কর্তৃক সশ্রম ও বিনাশ্রম সাজাপ্রাপ্ত বন্দি;

(৩৮) ‘সিভিল বন্দি’ অর্থে দেওয়ানি আদালত অথবা দেওয়ানি প্রকৃতির অন্য কোনো কর্তৃপক্ষ কর্তৃক কারাগারে প্রেরিত কোনো ব্যক্তি; এবং

(৩৯) ‘সুপারিনটেনডেন্ট’ অর্থে ধারা ৯৬-এ উল্লিখিত সুপারিনটেনডেন্ট এবং সিনিয়র সুপারিনটেনডেন্টও ইহার অন্তর্ভুক্ত হইবেন।

৩। এই আইন অতিরিক্ত গণ্য হওয়া—এই আইনের বিধানাবলি সংশ্লিষ্ট বিষয়ে আপাতত বলবৎ অন্য কোনো আইন বা আইনগত দলিলের কোনো বিধানকে ক্ষুণ্ণ না করিয়া উহা অতিরিক্ত হিসাবে কার্যকর হইবে।

## দ্বিতীয় অধ্যায়

### কারাগার ও ডিপার্টমেন্ট প্রতিষ্ঠা, কারাগারের শ্রেণিবিন্যাস ইত্যাদি

৪। কারাগার প্রতিষ্ঠা—(১) এই আইনের উদ্দেশ্য পূরণকল্পে, সরকার, সরকারি গেজেটে প্রজ্ঞাপন দ্বারা, প্রয়োজনীয়সংখ্যক কারাগার প্রতিষ্ঠা করিবে :

তবে শর্ত থাকে যে, সরকার, প্রয়োজনে, সরকারি গেজেটে প্রজ্ঞাপন দ্বারা, নারী বন্দির জন্য প্রয়োজনীয়সংখ্যক কারাগার প্রতিষ্ঠা করিতে পারিবে :

আরও শর্ত থাকে যে, Prisons Act, ১৮৯৪-এর section ৩-এর sub-section (3)-এর অধীন প্রতিষ্ঠিত কারাগার এই আইনের অধীন প্রতিষ্ঠিত হইয়াছে বলিয়া গণ্য হইবে।

(২) সরকার কোনো স্থাপনা, ভূমি অথবা স্থানকে এই আইনের অধীনে কারাগার হিসাবে ঘোষণা করিতে পারিবে।

৫। কারাগারের শ্রেণিবিন্যাস—(১) সরকার, সরকারি গেজেটে প্রজ্ঞাপন দ্বারা, কারাগারসমূহকে কেন্দ্রীয় কারাগার, হাই সিকিউরিটি কারাগার, মেট্রোপলিটন কারাগার, জেলা কারাগার, উন্মুক্ত কারাগার এবং বিশেষ কারাগার হিসাবে শ্রেণিবিন্যাস করিতে পারিবে।

(২) কারা কর্তৃপক্ষ কারাগারের বিভিন্ন অংশ আবদ্ধ (Closed), আংশিক উন্মুক্ত (Semi-open) বা উন্মুক্ত (Open) হিসাবে পৃথকীকরণ ও শ্রেণিবিন্যাস করিতে পারিবে।

৬। বাংলাদেশ কারা ও সংশোধন পরিষেবা ডিপার্টমেন্ট—(১) এই আইনের উদ্দেশ্য পূরণকল্পে, সরকার, সরকারি গেজেটে প্রজ্ঞাপন দ্বারা, ‘বাংলাদেশ কারা ও সংশোধন পরিষেবা ডিপার্টমেন্ট’, অতঃপর ‘উক্ত ডিপার্টমেন্ট’ বলিয়া উল্লিখিত, নামীয় একটি ডিপার্টমেন্ট প্রতিষ্ঠা করিবে।

(২) ‘বাংলাদেশ কারা ও সংশোধন পরিষেবা ডিপার্টমেন্ট’-এর প্রধান কার্যালয় ঢাকায় অবস্থিত হইবে।

(৩) সরকার, প্রয়োজনে, যে-কোনো বিভাগীয় শহরে বা জেলায় উক্ত ডিপার্টমেন্ট-এর বিভাগীয়, আঞ্চলিক, জেলা বা শাখা কার্যালয় স্থাপন করিতে পারিবে।

(৪) এই আইনের বিধানাবলিসাপেক্ষে, উক্ত ডিপার্টমেন্ট-এর স্থাবর ও অস্থাবর উভয় প্রকার সম্পত্তি অর্জন করিবার, অধিকারে রাখিবার এবং হস্তান্তর করিবার ক্ষমতা থাকিবে এবং ইহা স্বীয় নামে মামলা দায়ের করিতে পারিবে এবং উক্ত নামে ইহার বিরুদ্ধেও মামলা দায়ের করা যাইবে।

(৫) উক্ত ডিপার্টমেন্ট-এর একটি সাধারণ সিলমোহর থাকিবে, উহা কারা মহাপরিদর্শকের হেফাজতে থাকিবে এবং কারা মহাপরিদর্শক কর্তৃক নির্দেশিত ক্ষেত্রে ইহা ব্যবহৃত হইবে।

৭। বাংলাদেশ কারা ও সংশোধন পরিষেবা ডিপার্টমেন্ট-এর দায়িত্ব ও কার্যাবলি—বাংলাদেশ কারা ও সংশোধন পরিষেবা ডিপার্টমেন্ট-এর দায়িত্ব ও কার্যাবলি হইবে নিম্নরূপ, যথা :

(ক) তৃতীয় অধ্যায়-এ বর্ণিত ‘কারাবন্দির ভর্তি ও মুক্তি’-সংক্রান্ত সকল বিধান প্রতিপালন করা;

(খ) চতুর্থ অধ্যায়-এ বর্ণিত ‘বন্দির সুযোগ-সুবিধা ও অধিকার’ নিশ্চিত করা;

- (গ) পঞ্চম অধ্যায়-এ বর্ণিত ‘কারাগারের শৃঙ্খলা ও নিরাপত্তা’ নিশ্চিত করা;
- (ঘ) ষষ্ঠ অধ্যায়-এ বর্ণিত ‘সাজাপ্রাপ্ত বন্দি’-সংক্রান্ত সকল কার্যক্রম গ্রহণ ও বাস্তবায়ন করা;
- (ঙ) সপ্তম অধ্যায়-এ বর্ণিত ‘সিভিল বন্দি, বন্দি (detainee), নিরাপদ হেফাজত ইত্যাদি’ বন্দির জন্য প্রয়োজনীয় পরিষেবা ও কার্যক্রম বাস্তবায়নের ব্যবস্থা গ্রহণ করা;
- (চ) অষ্টম অধ্যায়-এ বর্ণিত ‘কারা প্রশাসন’-সংক্রান্ত বিধানাবলি বাস্তবায়ন করা;
- (ছ) নবম অধ্যায়-এ বর্ণিত ‘পুরস্কার, অপরাধ ও শাস্তি’-সংক্রান্ত বিধান প্রতিপালন করা;
- (জ) দশম অধ্যায়-এ বর্ণিত ‘কারা পরিদর্শন’-সংক্রান্ত বিধান বাস্তবায়ন করা;
- (ঝ) একাদশ অধ্যায়-এর ‘বিবিধ’ বিধানাবলি প্রতিপালন করা; এবং
- (ঞ) এই আইনের উদ্দেশ্য পূরণকল্পে, এই আইন, বিধিমালা ও সরকারি নির্দেশনায় উল্লিখিত সকল কার্য সম্পাদন ও বাস্তবায়ন করা।

## তৃতীয় অধ্যায়

### কারাবন্দির ভর্তি ও মুক্তি

৮। কারাগারে ভর্তি, আটক ইত্যাদি—(১) আদালত কর্তৃক প্রদত্ত আদেশ বা পরোয়ানা ব্যতীত কোনো ব্যক্তিকে কারাগারে ভর্তি করা যাইবে না।

(২) দায়িত্বপ্রাপ্ত কর্মকর্তা উপধারা (১) অনুসারে প্রাপ্ত আদেশ বা পরোয়ানায় বর্ণিত সকল ব্যক্তিকে গ্রহণ করিবেন, দণ্ড বা আটকাদেশ কার্যকর করিবেন এবং আদেশে উল্লেখিত সময় পর্যন্ত কিংবা আইনগতভাবে খালাস বা মুক্তি প্রদান না করা পর্যন্ত কারাগারে আটক রাখিবেন।

(৩) বাংলাদেশের ভৌগোলিক সীমানার বাহিরে কোনো আদালত কর্তৃক উপধারা (১) অনুসারে কোনো পরোয়ানা বা আদেশ জারি করা হইলে, সরকারের অনুমোদনসাপেক্ষে, উক্ত পরোয়ানা বা আদেশে বর্ণিত দণ্ড বা আটকাদেশ কার্যকর করা যাইবে।

৯। ভর্তি প্রাক্কালে অনুসরণীয় প্রক্রিয়া—(১) দায়িত্বপ্রাপ্ত কর্মকর্তা আনয়নকারী কর্তৃপক্ষের উপস্থিতিতে নিম্নবর্ণিত বিষয়াবলি যাচাই করিবেন, যথা :

(ক) বন্দির পরিচয় (প্রয়োজনীয় তথ্য প্রমাণসহ);

(খ) আদালতের আদেশ বা পরোয়ানায় বর্ণিত তথ্যাবলির সঠিকতা ও যথার্থতা; এবং

(গ) বন্দির মানসিক ও শারীরিক অবস্থা।

(২) উপধারা (১)-এ উল্লিখিত বন্দির পরিচয়, আদেশ বা পরোয়ানায় বর্ণিত তথ্যাবলির সঠিকতা সম্পর্কে নিশ্চিত হইলে এবং পরোয়ানা ত্রুটিমুক্ত হইলে দায়িত্বপ্রাপ্ত কর্মকর্তা উক্ত ব্যক্তিকে ভর্তি এবং হেফাজতে নেওয়ার প্রয়োজনীয় আইনানুগ ব্যবস্থা গ্রহণ করিবেন।

(৩) উপধারা (১)-এ উল্লিখিত বন্দির পরিচয়, আদেশ বা পরোয়ানায় বর্ণিত তথ্যাবলি এবং আদেশ বা পরোয়ানা ত্রুটিযুক্ত (Defective) হইলে দায়িত্বপ্রাপ্ত কর্মকর্তা উক্ত ব্যক্তিকে কারাগারে ভর্তি করিতে অস্বীকৃতি জানাইতে পারিবেন এবং অতিসত্বর উহা সংশ্লিষ্ট আদালত অথবা আদেশ বা পরোয়ানা স্বাক্ষরকৃত কর্তৃপক্ষের নিকট ব্যক্তিসহ পরোয়ানা বাহকের মাধ্যমে ফেরত পাঠাইবেন।

(৪) ভর্তির প্রাক্কালে মেডিক্যাল অফিসার অথবা তাহার মনোনীত অন্য কোনো সহকারী সার্জন বা মেডিক্যাল অ্যাসিস্ট্যান্ট কর্তৃক বন্দির মানসিক ও শারীরিক অবস্থার পরীক্ষা সম্পন্ন করিতে হইবে :

তবে শর্ত থাকে যে, এই সময়সীমা পরবর্তী ২৪ (চব্বিশ) ঘণ্টার অতিরিক্ত হইবে না।

(৫) উপধারা (৪)-এর অধীন ডাক্তারি পরীক্ষায় বিধি দ্বারা নির্ধারিত বিষয়াদি অন্তর্ভুক্ত থাকিবে এবং উহার গোপনীয়তা রক্ষা করিতে হইবে।

(৬) উপধারা (৪)-এর অধীন ডাক্তারি পরীক্ষায় যদি প্রতীয়মান হয় যে বন্দি কোনোরূপ নির্যাতনের শিকার হইয়াছেন কিংবা বন্দি অসম্মানজনক বা অমানবিক আচরণের শিকার হইয়াছেন অথবা বন্দির শরীরে দৃশ্যমান জখম, ক্ষত,



আঘাত অথবা অন্য কোনো অসুস্থতার লক্ষণ রহিয়াছে এবং যথোপযুক্ত কর্তৃপক্ষ কর্তৃক কোনোরূপ ডাক্তারি সনদ সরবরাহ করা হয় নাই বা সনদ যথেষ্ট হিসাবে প্রতীয়মান হয় নাই, তাহা হইলে দায়িত্বপ্রাপ্ত কর্মকর্তা উক্ত জখম, আঘাত, ক্ষত অথবা অন্য কোনো অসুস্থতার লক্ষণ দাপ্তরিক নোটে এবং রেজিস্টারে লিপিবদ্ধ করিবেন এবং সংশ্লিষ্ট আদালতকে উক্ত আঘাত, জখম, ক্ষত কিংবা অন্য কোনো অসুস্থতার লক্ষণ সম্পর্কে অনতিবিলম্বে লিখিতভাবে অবহিত করিবেন।

- (৭) দায়িত্বপ্রাপ্ত কর্মকর্তা ভর্তিকৃত ব্যক্তির তল্লাশি করিবেন এবং প্রাপ্ত নিষিদ্ধ দ্রব্যাদি কারা কর্তৃপক্ষের নিকট হস্তান্তর করিবেন এবং আনয়নকারী কর্তৃপক্ষকে বিষয়টি যথাশীঘ্র সম্ভব অবহিত করিবেন।
- (৮) উপধারা (৬)-এ উল্লিখিত প্রাপ্ত দ্রব্যাদি কারা কর্তৃপক্ষ প্রচলিত আইন ও বিধি অনুসারে হেফাজত, ধংস ও নিষ্পত্তি করিবে।
- (৯) বন্দির ব্যক্তিগত সম্পত্তি দায়িত্বপ্রাপ্ত কর্মকর্তা বন্দির জিম্মা হইতে তাহার নিজ হেফাজতে গ্রহণ করিবেন এবং ইহার তালিকা প্রস্তুতক্রমে সংশ্লিষ্ট রেজিস্টারে লিপিবদ্ধকরত বন্দির স্বাক্ষর বা টিপসহি গ্রহণান্তে নিরাপদে সংরক্ষণ করিবেন।
- (১০) উপধারা (৯)-এ বর্ণিত রেজিস্টার কারা কর্তৃপক্ষ কর্তৃক, সময়ে সময়ে, হালনাগাদ (update) করিতে হইবে।
- (১১) উপধারা (১) হইতে (৯)-এ বর্ণিত পদক্ষেপসমূহ সম্পন্নের পর আনয়নকারী কর্মকর্তা ও দায়িত্বপ্রাপ্ত কর্মকর্তা যৌথভাবে দাপ্তরিক নোট এবং রেজিস্টারে স্বাক্ষর করিবেন এবং দায়িত্বপ্রাপ্ত কর্মকর্তা বন্দিকে লিঞ্জ-অনুসারে স্ব স্ব স্থানে অবস্থানের জন্য প্রেরণ করিবেন।
- (১২) এই ধারার বর্ণিত হয় নাই অথচ এই ধারার সহিত সরাসরি সংশ্লিষ্ট এমন কোনো বিষয় উদ্ভূত হইলে উহা সমাধানের লক্ষ্যে সরকারের অনুমোদনসাপেক্ষে কারা কর্তৃপক্ষ, প্রয়োজনে, যথাযথ ব্যবস্থা গ্রহণের জন্য আদেশ জারি করিতে পারিবে।

**১০। ভর্তির অব্যবহিত পর অনুসরণীয়**—ধারা ৯-এর বিধান-অনুসারে বন্দি ভর্তির পর দায়িত্বপ্রাপ্ত কর্মকর্তা নিম্নরূপ বিষয়াদি নিশ্চিত করিবেন, যথা :

- (ক) বন্দির ব্যক্তিগত তথ্যাবলি রেজিস্টারে লিপিবদ্ধ করা করা হইয়াছে কি না;
- (খ) মেডিক্যাল অফিসার, সহকারী সার্জন বা মেডিক্যাল অ্যাসিস্ট্যান্ট কর্তৃক স্বাস্থ্য পরীক্ষা-সম্পর্কিত প্রতিবেদন দাখিল করা হইয়াছে কি না;
- (গ) আইনগত পরামর্শ সম্পর্কে জ্ঞান প্রদানসহ সরকারি আইনগত সহায়তা-বিষয়ক তাহার অধিকার অবগত করা হইয়াছে কি না; এবং
- (ঘ) আনুষঙ্গিক ও প্রাসঙ্গিক অন্যান্য বিষয়, যদি থাকে।

**১১। ভর্তি পরবর্তী অনুসরণীয়**—(১) দায়িত্বপ্রাপ্ত কর্মকর্তা ভর্তির পরে অনতিবিলম্বে বন্দিকে নিম্নবর্ণিত তথ্যাবলি মৌখিক বা লিখিতভাবে, ছোটো ছোটো লিফলেট বা অন্য কোনো প্রক্রিয়ার মাধ্যমে যাহা বন্দি সহজেই অনুধাবন করিতে পারিবে এইরূপ ভাষায় ও পদ্ধতিতে প্রদান করিবেন, যথা :

- (ক) কারাগারের শৃঙ্খলাবিধি;
- (খ) সুরক্ষা ও নিরাপত্তাসংক্রান্ত নিয়মাবলি;
- (গ) কারা কর্তৃপক্ষসহ অন্যান্য কর্তৃপক্ষের নিকট অভিযোগ ও অনুরোধের পদ্ধতি;
- (ঘ) বন্দির নিজ হেফাজতে রাখিবার অনুমোদিত দ্রব্যাদির তালিকা;
- (ঙ) সরকারি বা প্রয়োজ্যক্ষেত্রে, বেসরকারি আইনগত সহায়তা-সম্পর্কিত তথ্যাবলি; এবং
- (চ) অন্যান্য তথ্য যাহা বন্দির অধিকার ও দায়িত্ব এবং দৈনন্দিন কার্যাবলি বুঝাইবার জন্য আবশ্যিকীয়।

(২) দায়িত্বপ্রাপ্ত কর্মকর্তা বন্দি ভর্তির পর অনতিবিলম্বে নিম্নরূপ কার্যক্রম গ্রহণ করিবেন, যথা :

- (ক) বন্দির সাক্ষাৎকার গ্রহণ;
- (খ) তাৎক্ষণিকভাবে বন্দির ব্যক্তিগত ও প্রয়োজনীয় চাহিদা নিরূপণ এবং উক্তরূপ চাহিদা যথাসম্ভব পূরণে প্রয়োজনীয় ব্যবস্থা গ্রহণ;
- (গ) বন্দিকে প্রাসঙ্গিক আইনি প্রক্রিয়া সম্পর্কে অবহিতকরণ;
- (ঘ) সাজাপ্রাপ্ত বন্দি হইলে তিনি যে মেয়াদে দণ্ড ভোগ করিবেন উহা অবহিতকরণ;
- (ঙ) জেল আপিলসংক্রান্ত বিষয়ে অবহিতকরণ এবং প্রয়োজনে এতদ্বিষয়ে ব্যবস্থা গ্রহণ;
- (চ) বন্দির অনুরোধসাপেক্ষে, তাহার পরিবার, নিকট বন্ধু অথবা আত্মীয়স্বজনকে কারাবাসের বিষয় অবহিতকরণ; এবং
- (ছ) দফা (ক) হইতে দফা (চ)-তে বর্ণিত ব্যবস্থা গ্রহণসহ ঝুঁকি ও চাহিদা নিরূপণ কমিটির প্রতিবেদন প্রাপ্তিসাপেক্ষে বন্দির জন্য আবাসনের ব্যবস্থা গ্রহণ।

(৩) বন্দি ভর্তির সময় দায়িত্বপ্রাপ্ত কর্মকর্তার সহিত কোনো অসদাচরণ করিলে বা দায়িত্বপ্রাপ্ত কর্মকর্তার কার্যক্রমে বাধা প্রদান করিলে তিনি বিষয়টি লিপিবদ্ধক্রমে অনতিবিলম্বে যথাযথ কর্তৃপক্ষকে অবহিত করিবেন।

**১২। বন্দির শ্রেণিবিভাগ—**(১) ঝুঁকি ও চাহিদা নিরূপণ কমিটি বন্দির ঝুঁকি নিরূপণ (Risk Assessment) এবং চাহিদা নিরূপণের (Need Assessment) ভিত্তিতে, বিধি দ্বারা নির্ধারিত পদ্ধতিতে, তাহাদের শ্রেণিবিন্যাস করিবে।

(২) উপধারা (১)-এর অধীন বিধি প্রণীত না হওয়া পর্যন্ত কারা কর্তৃপক্ষ, ঝুঁকি ও চাহিদা নিরূপণ কমিটির সুপারিশের ভিত্তিতে, আদেশ দ্বারা, বন্দির শ্রেণিবিন্যাস করিবে।

**১৩। ঝুঁকি ও চাহিদা নিরূপণ কমিটি —**(১) প্রত্যেক কারাগারে জেলার এর সভাপতিত্বে কমপক্ষে পাঁচ সদস্য বিশিষ্ট ঝুঁকি ও চাহিদা নিরূপণ নামীয় একটি কমিটি থাকিবে।

(২) উপধারা (১) অধীন গঠিত ঝুঁকি ও চাহিদা নির্ধারণ কমিটিতে একজন নারী কারা কর্মকর্তা বা কর্মচারীসহ মনোবিজ্ঞানী (psychologist), সংশোধন কর্মকর্তা ও সহকারী সার্জন অন্তর্ভুক্ত হইবেন এবং সভাপতিসহ যে কোন তিন জন সদস্যের উপস্থিতিতে কমিটির কোরাম পূর্ণ হইবে।

তবে শর্ত থাকে যে, কোন নারী বন্দির ঝুঁকি ও চাহিদা নির্ধারণকালে নারী কারা কর্মকর্তা বা কর্মচারীর উপস্থিতি আবশ্যিকীয় হইবে।

(৩) ঝুঁকি ও চাহিদা নিরূপণ কমিটির দায়িত্ব ও কার্যাবলি হইবে নিম্নরূপ, যথা :

(ক) ধারা ৮৩-এর বিধান মোতাবেক প্রত্যেক বন্দির ঝুঁকি নিরূপণ (Risk Assessment) ও চাহিদা নিরূপণ (Need Assessment) করা, সময়ে সময়ে পুনর্মূল্যায়ন করা এবং উহার ভিত্তিতে বন্দিকে কারাগারের আবদ্ধ (Closed), আংশিক উন্মুক্ত (Semi-open) বা উন্মুক্ত অংশে (Open) আবাসনের ব্যবস্থা অথবা প্রয়োজনে, অন্য কোনো কারাগারে আবাসনের জন্য স্থানান্তরের সুপারিশ করা;

(খ) ধারা ৮৪-এর বিধান মোতাবেক সাজা বাস্তবায়ন পরিকল্পনা প্রণয়ন, পুনর্মূল্যায়ন, সংশোধন ইত্যাদি করা; এবং

(গ) এই ধারার উদ্দেশ্য পূরণকল্পে, অন্য যে-কোনো প্রাসঙ্গিক বা আনুষঙ্গিক ব্যবস্থা গ্রহণ করা।

(৪) ঝুঁকি ও চাহিদা নিরূপণ কমিটি ধারা ৮৩ এর বিধান মোতাবেক ঝুঁকি নিরূপণ (Risk Assessment) ও চাহিদা নিরূপণ (Need Assessment) পূর্বক কোন বন্দিকে ডিভিশন প্রাপ্ত হইবার যোগ্য বিবেচনা করিলে কারা মহাপরিদর্শক অথবা জেলা ম্যাজিস্ট্রেটের মাধ্যমে উক্ত বিষয়ে চূড়ান্ত সিদ্ধান্ত গ্রহণের জন্য সুপারিশসহ সরকারের নিকট প্রেরণ করিবেন।

**১৪। বন্দিমুক্তিসংক্রান্ত বিধানাবলি—**(১) কারাগার হইতে নিম্নবর্ণিত ক্ষেত্রে বন্দি মুক্তি পাইবে, যথা :

(ক) সাজার মেয়াদ পূর্ণ হইলে;

(খ) কোনো আদালত বা উপযুক্ত কর্তৃপক্ষ কর্তৃক মুক্তি প্রদানের জন্য আদেশ প্রদান করা হইলে; বা

(গ) সংশোধন, পুনর্বাসন বা সমাজে অঙ্গীভূতকরণের নিমিত্ত বা অন্য কোনো শর্তসাপেক্ষে মুক্তির আদেশ প্রদান করা হইলে।

(২) উপধারা (১)-এর দফা (গ) কোনো বন্দিকে শর্তসাপেক্ষে মুক্তি প্রদান করা হইলে কারা কর্তৃপক্ষ মুক্তি প্রদানের শর্তাবলি এবং শর্তাবলি ভঙ্গের ফলাফল সম্পর্কে বন্দিকে অবহিত করিবে।

(৩) সাপ্তাহিক বা সরকারি ছুটির দিন উপধারা (১)-এর দফা (ক)-এর অধীন কোনো বন্দির সাজার মেয়াদ পূর্ণ হইলে সাপ্তাহিক বা সরকারি ছুটির পূর্বের দিন উক্ত বন্দিকে মুক্তি প্রদান করিতে হইবে।

(৪) দ্বায়িত্বপ্রাপ্ত কর্মকর্তা উপধারা (১) অনুসারে বন্দি মুক্তির কোনো আদেশ তথাপ্রযুক্তির মাধ্যমে প্রাপ্ত হইলে, বিধি দ্বারা নির্ধারিত পদ্ধতিতে, যথাযথ ব্যবস্থা গ্রহণ করিতে পারিবেন :

তবে শর্ত থাকে যে, প্রয়োজনীয় ক্ষেত্রে কারা কর্তৃপক্ষ সশরীরে প্রতিনিধি প্রেরণপূর্বক প্রাপ্ত আদেশের সঠিকতা যাচাই করিতে পারিবে।

(৫) প্রকৃত সাজার মেয়াদ পূর্ণ হইলে এবং আদেশে প্রদত্ত কারাদণ্ডের সহিত অর্হদণ্ড পরিশোধের নির্দেশনা থাকিলে কারা কর্তৃপক্ষ উক্ত অর্হদণ্ডের অর্থ সম্পূর্ণ অথবা প্রয়োজ্যক্ষেত্রে, আংশিক পরিশোধের প্রমাণপত্র প্রাপ্তিসাপেক্ষে বন্দিকে মুক্তি প্রদান করিবে :

তবে শর্ত থাকে যে, আংশিক পরিশোধের ক্ষেত্রে অবশিষ্ট অর্হদণ্ডের সহিত সামঞ্জস্যপূর্ণ সাজা ভোগের পর বন্দি মুক্তি পাইবে :

আরও শর্ত থাকে যে, বন্দি ব্যক্তিগতভাবে অর্থদণ্ডের অর্থ জমা প্রদানে অপারগ হইলে বিষয়টি বিবেচনাক্রমে বন্দির পক্ষে তাহার অনুমতিসাপেক্ষে ব্যক্তিগত তহবিল, যদি থাকে, হইতে কারা কর্তৃপক্ষ আদেশে প্রদত্ত অর্থদণ্ড সম্পূর্ণ বা আংশিক পরিশোধ করিতে পারিবে।

(৬) কোনো বন্দি উপধারা (১)-এ অধীন মুক্তি পাইলে অথবা বন্দির মৃত্যু হইলে কারা কর্তৃপক্ষ তাহার মুক্তির তারিখ অথবা ক্ষেত্রমতো, মৃত্যুর তারিখ ও কারণ উল্লেখপূর্বক এতৎসংশ্লিষ্ট আদেশ বা পরোয়ানা ইস্যুকারী আদালত বা কর্তৃপক্ষের নিকট অনতিবিলম্বে ফেরত প্রদান করিবে।

**১৫। মুক্তি পূর্ববর্তী স্বাস্থ্য পরীক্ষা ইত্যাদি—**(১) মেডিক্যাল অফিসার মুক্তি প্রদানের যথাসম্ভব কাছাকাছি সময়ে বন্দির শারীরিক ও মানসিক অবস্থা পরীক্ষা করিবেন এবং উক্ত বন্দি কোনোরূপ নিপীড়নের শিকার হইয়াছেন কি না উক্তরূপ বিষয়ে বিশেষভাবে লক্ষ করিবেন।

(২) উপধারা (১) অনুসারে বন্দির ডাক্তারি পরীক্ষাকালে কোনো অস্বাভাবিকতা পরিলক্ষিত হইলে বা বন্দি নিপীড়নের স্বীকার হইয়াছে মর্মে প্রতীয়মান হইলে অথবা বন্দি কর্তৃক তাহার উপর কোনোরূপ নিপীড়ন করা হইয়াছে মর্মে অভিযোগ করিলে মেডিক্যাল অফিসার উহা রেজিস্টারে লিপিবদ্ধকরত বিষয়টি কারা কর্তৃপক্ষের গোচরীভূত করিবেন এবং অস্বাভাবিকতার ক্ষেত্রে বিধি অনুসারে প্রয়োজনীয় চিকিৎসার ব্যবস্থা গ্রহণ করিবেন।

(৩) উপধারা (১)-এ বর্ণিত বন্দির মুক্তির পর মেডিক্যাল অফিসার, তাহার সম্মতিতে, প্রয়োজনীয় চিকিৎসা অব্যাহত রাখিবার ব্যবস্থা করিতে পারিবেন।

**১৬। বন্দি মুক্তির প্রক্রিয়া—**(১) বন্দি মুক্তির পূর্বে দায়িত্বপ্রাপ্ত কর্মকর্তা—

(ক) সংশ্লিষ্ট বন্দির পরিচয় এবং মুক্তির আইনগত ভিত্তি যাচাইপূর্বক রেজিস্টারে লিপিবদ্ধ করিবেন; এবং

(খ) কারাগারে সংরক্ষিত বন্দির ব্যক্তিগত এবং অর্জিত সম্পত্তি, যদি থাকে, নির্ধারিত রেজিস্টারে মুক্তিপ্রাপ্ত বন্দির স্বাক্ষর বা টিপসহি গ্রহণপূর্বক তাহাকে ফেরত প্রদান করিবেন।

(২) কারা কর্তৃপক্ষ—

(ক) মুক্তির সময়ে বন্দি গুরুতর অসুস্থ থাকিলে বা ভ্রমণে অসমর্থ হইলে, তাহাকে উপযুক্ত সরকারি চিকিৎসা প্রতিষ্ঠানে স্থানান্তর করিবার ব্যবস্থা গ্রহণ করিবে এবং প্রয়োজ্যক্ষেত্রে, বন্দির পরিবার অথবা বন্দি কর্তৃক মনোনীত ব্যক্তিকে অবহিত করিবে;

(খ) মুক্তিপ্রাপ্ত বন্দিকে তাহার গন্তব্যস্থলে, বাংলাদেশের মধ্যে, পৌঁছানোর জন্য প্রয়োজনীয় অর্থ প্রদান করিবে; বা

(গ) বিদেশি বন্দিকে তাহার নিজ দেশে ফেরত প্রদানের লক্ষ্যে পররাষ্ট্র মন্ত্রণালয়-এর অনুমোদনক্রমে প্রয়োজনীয় ব্যবস্থা গ্রহণ করিবে।

১৭। সাজার মেয়াদ গণনা—(১) বন্দি মুক্তির ক্ষেত্রে আদেশে বা পরোয়ানায় প্রদত্ত দণ্ড হইতে নিম্নবর্ণিত সময় বিয়োগ করিয়া মুক্তির তারিখ গণনা করিতে হইবে, যথা :

(ক) বন্দি কর্তৃক অর্জিত রেয়াত, যদি উহা শৃঙ্খলাভঙ্গজনিত হ্রাস না পায়; বা

(খ) প্রচলিত কোনো আইনে প্রদত্ত বিশেষ বিধান প্রয়োগের মাধ্যমে বা অন্য কোনো আইনানুগ ব্যবস্থার কারণে প্রদত্ত যে-কোনো ধরনের মেয়াদ হ্রাস।

(২) বিধি দ্বারা নির্ধারিত পদ্ধতি অনুসারে সাজার মেয়াদ গণনা করা হইবে এবং অবশিষ্ট সাজার মেয়াদ, সময়ে সময়ে, হালনাগাদক্রমে বন্দিকে অবহিত করা হইবে।

(৩) সাজার মেয়াদ গণনার ক্ষেত্রে যদি কোনো বন্দি একই আদালত কিংবা একাধিক আদালত কর্তৃক—

(ক) একাধিক মামলায় সাজাপ্রাপ্ত হইলে, আদালতের আদেশে ভিন্নরূপ নির্দেশনা না থাকিলে, কারাদণ্ডসমূহ ক্রমাগতভাবে একটি শেষ হইবার পর অন্যটি শুরু হইবে;

(খ) একাধিক মামলায় সাজাপ্রাপ্ত হইলে এবং পরবর্তীকালে আপিলে প্রথম মামলায় খালাসপ্রাপ্ত হইলে পরবর্তী মামলার সাজা গণনা প্রথম মামলায় সাজা কার্যকরের তারিখ হইতে শুরু হইবে;

(গ) একাধিক মামলায় সাজাপ্রাপ্ত হইয়া আপিল চলাকালীন প্রথম মামলায় জামিনপ্রাপ্ত হইলে উক্ত জামিনের মেয়াদ উত্তীর্ণ না হওয়া পর্যন্ত প্রথম মামলার সাজা স্থগিত থাকিবে এবং দ্বিতীয় বা পরবর্তী মামলার সাজা গণনা প্রথম মামলার জামিনপ্রাপ্তির তারিখ হইতে কার্যকর হইবে; এবং

(ঘ) মামলা বিচারাধীন অবস্থায় কোনো ব্যক্তি বিচারাধীন বন্দি হিসাবে কারাগারে অবস্থান করিলে এবং আদালত কর্তৃক সংশ্লিষ্ট বিষয়ে সুস্পষ্ট কোনো নির্দেশনা প্রদান করা না হইলে তাহার মুক্তির তারিখ নির্ধারণের ক্ষেত্রে Code of Criminal Procedure, ১৯৮৯-এর ধারা ৩৫ (ক)-এর বিধানাবলি প্রযোজ্য হইবে।

(৪) কোনো বন্দি শর্তাধীনে মুক্তিপ্রাপ্ত হইলে মুক্ত অবস্থায় অতিবাহিত সময় তাহার কারাবাস হিসাবে গণ্য হইবে এবং উক্ত অবস্থায় তিনি রেয়াত প্রাপ্ত হইবেন।

১৮। সাজার রেয়াত—(১) ৬ (ছয়) মাস বা ইহার অধিক মেয়াদে সাজাপ্রাপ্ত এমন কোনো বন্দি, তবে আমৃত্যু কারাদণ্ডপ্রাপ্ত নহে, কারাগারে সদাচরণ করিলে এবং শৃঙ্খলা ভঙ্গজনিত অভিযুক্ত না হইলে রেয়াত অর্জন করিবে।

(২) উপধারা (১)-এ বর্ণিত রেয়াত সম্পূর্ণ কারাদণ্ডের এক-তৃতীয়াংশের অধিক হইবে না।

(৩) উপধারা (১) ও (২) যাহাই থাকুক না কেন, কারা মহাপরিদর্শক ও জেলসুপার, প্রয়োজনে, বিশেষ রেয়াত প্রদান করিতে পারিবেন।

[ব্যাখ্যা : এই ধারার উদ্দেশ্য পূরণকল্পে, ‘বিশেষ রেয়াত’ অর্থ রেয়াত ব্যতিরেকেও কারা মহাপরিদর্শক কর্তৃক প্রদত্ত অতিরিক্ত আরও ৩ (তিন) মাস পর্যন্ত বর্ধিত সময়]

১৯। প্যারোলে মুক্তি—সমাজে পুনর্বাসন ও পুনঃঅঙ্গীভূতকরণ (Rehabilitation and Reintegration)-এর উদ্দেশ্যে বন্দিকে প্যারোলে মুক্তি প্রদান করা যাইতে পারে।

২০। প্যারোল বোর্ড গঠন—(১) ধারা ১৯-এর উদ্দেশ্য পূরণকল্পে, জেলা ম্যাজিস্ট্রেটের সভাপতিত্বে প্রত্যেক জেলায় এক বা একাধিক প্যারোল বোর্ড গঠিত হইবে।

(২) সংশ্লিষ্ট কারাগারের ডেপুটি সুপারিনটেনডেন্ট অথবা জেলার প্যারোল বোর্ডের সদস্য-সচিব হইবেন।

(৩) প্যারোল বোর্ডের গঠন, ক্ষমতা ও কার্যাবলি, কার্যপদ্ধতি, সভা, সিদ্ধান্ত, প্যারোলে মুক্তির শর্তাবলি ইত্যাদি বিধি দ্বারা নির্ধারিত হইবে।

২১। প্যারোল আবেদনের যোগ্যতা—(১) কোনো বন্দি প্যারোল আবেদন করিবার জন্য যোগ্য বলিয়া বিবেচিত হইবেন, যদি তিনি—

(ক) যাবজ্জীবন কারাদণ্ড ব্যতীত যে-কোনো মেয়াদের কারাদণ্ডের ক্ষেত্রে, অর্জিত রেয়াতসহ মোট কারাদণ্ডের ন্যূনতম অর্ধাংশ অতিবাহিত করিয়া থাকেন; বা

(খ) আমৃত্যু কারাদণ্ড ব্যতীত যাবজ্জীবন কারাদণ্ডের ক্ষেত্রে, রেয়াতসহ ন্যূনতম ১৫ (পনেরো) বৎসর অতিবাহিত করিয়া থাকেন;

(গ) কারা কর্তৃপক্ষ কর্তৃক অনুমোদিত পুনর্বাসন কর্মসূচি সুষ্ঠুভাবে সম্পন্ন করিয়া থাকেন; এবং

(ঘ) বিধি দ্বারা নির্ধারিত অন্য যে-কোনো যোগ্যতা অর্জন করিয়া থাকেন।

(২) নারী বন্দির ক্ষেত্রে উপধারা (১)-এর বিধানের পাশাপাশি ‘সাজাপ্রাপ্ত নারী বন্দির বিশেষ সুবিধা আইন, ২০০৬’-এর বিধানাবলিও প্রযোজ্য হইবে।

(৩) দুই বা ততোধিক মামলায় দণ্ডপ্রাপ্ত বন্দির ক্ষেত্রে, আবেদনের যোগ্যতা হইবে নিম্নরূপ, যথা :

যদি তাহার দণ্ডসমূহ—

(ক) যুগপৎভাবে (concurrently) চলিতে থাকে, তাহা হইলে দণ্ডসমূহের মধ্যে সর্বোচ্চ মেয়াদের দণ্ডের ন্যূনতম অর্ধাংশ অতিবাহিত হইয়া থাকে; এবং

(খ) ক্রমাগত (consecutively) চলিতে থাকে, তাহা হইলে দণ্ডসমূহের মোট মেয়াদের ন্যূনতম অর্ধাংশ অতিবাহিত হইয়া থাকে।

২২। প্যারোলে মুক্ত বন্দি দণ্ডদেশ ভোগ করিয়াছে মর্মে গণ্য—প্যারোলে মুক্ত অবস্থায় অতিবাহিত সময় সংশ্লিষ্ট বন্দির কারাবাস হিসাবে গণ্য হইবে এবং উক্ত অবস্থায় তিনি রেয়াত প্রাপ্ত হইবেন।

২৩। প্যারোল কর্মকর্তা নিয়োগ ও তাহার দায়িত্ব—ডিপার্টমেন্ট-এর অধীন ডেপুটি জেলার-এর মধ্য হইতে প্রয়োজনীয়সংখ্যক প্যারোল কর্মকর্তা নিযুক্ত হইবে এবং তাহাদের দায়িত্ব ও কর্তব্য বিধি দ্বারা নির্ধারিত হইবে।

২৪। শর্তসাপেক্ষে বন্দির ছুটি মঞ্জুর ইত্যাদি—(১) নিকট আত্মীয়ের মৃত্যু, সন্তানের বিবাহ ইত্যাদি কারণে বন্দি কর্তৃক আবেদনের পরিপ্রেক্ষিতে, কারা কর্তৃপক্ষের সুপারিশের ভিত্তিতে এবং বিধি দ্বারা নির্ধারিত সময়, শর্ত ও প্রক্রিয়া বা পদ্ধতি অনুসরণক্রমে জেলা ম্যাজিস্ট্রেট তাঁহাকে শর্তসাপেক্ষে ছুটি মঞ্জুর করিতে পারিবেন।

(২) উপধারা (১)-এ মুক্ত অবস্থায় অতিবাহিত সময় সংশ্লিষ্ট বন্দির কারাবাস হিসাবে গণ্য হইবে এবং উক্ত অবস্থায় তিনি রেয়াত প্রাপ্ত হইবেন।

২৫। স্বাস্থ্যগত কারণে দণ্ডপ্রাপ্ত বন্দির মুক্তি—(১) মেডিক্যাল অফিসার কর্তৃক অবহিত হইবার পর যদি দেখা যায় যে সাজাপ্রাপ্ত বন্দি দীর্ঘস্থায়ীভাবে অসুস্থতায় ভুগিতেছেন এবং তাহার স্বাস্থ্যের ক্রমাবনতির আশঙ্কা রহিয়াছে, তাহা হইলে সুপারিনটেনডেন্ট উহা জেলা ম্যাজিস্ট্রেট ও সিভিল সার্জনকে অবহিত করিবেন।

(২) সিভিল সার্জন উপধারা (১)-এর অধীন অবহিত হইবার পর তাঁহার নেতৃত্বে পরিচালিত মেডিক্যাল বোর্ড কর্তৃক প্রতিবেদন প্রস্তুতপূর্বক কারা কর্তৃপক্ষকে প্রদান করিবেন।

(৩) উপধারা (২) অনুসারে প্রতিবেদন প্রাপ্ত হইয়া সুপারিনটেনডেন্ট যথাযথ ব্যবস্থা গ্রহণ করিবার নিমিত্ত বন্দির বিস্তারিত তথ্যসহ উক্ত প্রতিবেদন জেলা ম্যাজিস্ট্রেট-এর নিকট প্রেরণ করিবেন।

(৪) উপধারা (৩)-এর অধীনে প্রতিবেদন প্রাপ্ত হইয়া জেলা ম্যাজিস্ট্রেট নিম্নবর্ণিত যে-কোনো পদক্ষেপ গ্রহণ করিবেন, যথা : কারাবন্দির অবশিষ্ট সাজার মেয়াদ—

(ক) ৬ (ছয়) মাসের কম হইলে তাহাকে মুক্তি প্রদান; বা

(খ) ৬ (ছয়) মাসের অধিক হইলে সরকারের নিকট তাহার মুক্তির বিষয়ে সুপারিশ করা এবং বিষয়টির অনুলিপি কারা মহাপরিদর্শক-এর নিকট প্রেরণ করা।

(৫) সরকার উপধারা (৪)-এর দফা (খ) অনুসারে সুপারিশ প্রাপ্তির পর বিষয়টি বিবেচনাযোগ্য হইলে সংশ্লিষ্ট বন্দির মুক্তির আদেশ জারি করিতে পারিবে এবং সরকারি সিদ্ধান্ত কারা মহাপরিদর্শক ও জেলা ম্যাজিস্ট্রেটকে অবহিত করিবে।

২৬। স্বাস্থ্যগত কারণে বিচারাধীন বন্দির মুক্তি—(১) মেডিক্যাল অফিসার কর্তৃক অবহিত হইবার পর যদি দেখা যায় যে বিচারাধীন বন্দি দীর্ঘস্থায়ীভাবে অসুস্থতায় ভুগিতেছেন এবং তাঁহার স্বাস্থ্যের ক্রমাবনতির আশঙ্কা রহিয়াছে, তাহা হইলে সুপারিনটেনডেন্ট উহা সংশ্লিষ্ট আদালত-এর নিকট বিবেচনার জন্য প্রেরণ করিবেন।

(২) উপধারা (১) অনুসারে অবগত হইবার পর সংশ্লিষ্ট আদালত প্রয়োজনীয় আইনানুগ ব্যবস্থা গ্রহণ করিতে বা গ্রহণের নিমিত্ত প্রয়োজনীয় নির্দেশনা প্রদান করিতে পারিবেন।

২৭। দীর্ঘদিন যাবৎ বিচারাধীন বন্দি—(১) যেক্ষেত্রে সুপারিনটেনডেন্ট-এর নিকট প্রতীয়মান হয় যে, কোনো বিচারাধীন বন্দির মামলা দীর্ঘদিন যাবৎ বিচারাধীন অবস্থায় রহিয়াছে বা বন্দিকে সময়মতো আদালতে হাজির করা হইতেছে না বা বন্দির মামলা শুনানির জন্য আদেশ বা পরোয়ানায় কোনো সুনির্দিষ্ট তারিখ প্রদান করা হয় নাই, সেইক্ষেত্রে সুপারিনটেনডেন্ট বিষয়টির গুরুত্ব বিবেচনাপূর্বক তাহা সংশ্লিষ্ট আদালত এবং প্রয়োজনে, জেলা আইনগত সহায়তা কমিটির সভাপতিকে প্রতিবেদন আকারে প্রেরণ করিতে পারিবেন।

(২) উপধারা (১) অনুসারে প্রতিবেদন প্রেরণের সময়সীমা, ধরন ও বিচারাধীন বন্দির বৈশিষ্ট্য ইত্যাদি বিধি দ্বারা নির্ধারিত হইবে।

২৮। হাইকোর্ট বিভাগ কর্তৃক মুক্তি ইত্যাদি—কোনো বন্দির সাজা মওকুফের আবেদন রাষ্ট্রপতির বিবেচনাধীন থাকিলেও হাইকোর্ট বিভাগ উক্ত বন্দিকে নিজ মুচলেকায় মুক্তি প্রদান করিতে পারিবে।



## চতুর্থ অধ্যায়

### বন্দির সুযোগ-সুবিধা ও অধিকার

২৯। আইন, বিধি ইত্যাদির প্রযোজ্যতা—এই আইন, বিধি এবং সময়ে সময়ে, সরকার কর্তৃক জারিকৃত আদেশ, নির্দেশিকা বা অন্যান্য কোনো পরিপত্র সকল বন্দির জন্য প্রযোজ্য হইবে এবং তাহারা উহা মানিয়া চলিতে বাধ্য থাকিবে।

৩০। বন্দির আবাসন—(১) এই আইনের উদ্দেশ্য পূরণকল্পে, নিম্নরূপ বন্দিগণের জন্য পৃথকভাবে আবাসন ব্যবস্থা করিতে হইবে, যথা :

- (ক) দণ্ডপ্রাপ্ত বন্দি;
- (খ) বিচারাধীন বন্দি;
- (গ) পুরুষ বন্দি
- (ঘ) নারী বন্দি;
- (ঙ) কিশোর বন্দি;
- (চ) মৃত্যুদণ্ডপ্রাপ্ত বন্দি;
- (ছ) আমৃত্যুদণ্ডপ্রাপ্ত বন্দি;
- (জ) তৃতীয় লিঙ্গের বন্দি;
- (ঝ) বন্দি (detainee);
- (ঞ) নিরাপদ হেফাজতি;
- (ট) সিভিল বন্দি;
- (ঠ) শারীরিকভাবে অসুস্থ বন্দি;
- (ড) মানসিকভাবে অসুস্থ বন্দি;
- (ঢ) প্রতিবন্ধী বন্দি;
- (ণ) মাদকাসক্ত বন্দি;
- (ত) বিদেশি বন্দি;
- (থ) ডিভিশনপ্রাপ্ত বন্দি;
- (দ) বিশেষ বন্দি, প্রযোজ্যক্ষেত্রে; এবং
- (ধ) বিধি দ্বারা নির্দেশিত অন্যান্য বন্দি।

(২) শিশু আইনে যাহা কিছুই থাকুক না কেন, বিশেষ পরিস্থিতিজনিত অথবা কোনো শিশুকে কারাগারে সাময়িকভাবে রাখিবার প্রয়োজন হইলে কারা কর্তৃপক্ষ নিম্নরূপ বিষয়াদি নিশ্চিত করিবে, যথা :

- (ক) শিশুর জন্য পৃথকভাবে আবাসনের ব্যবস্থা করা;

(খ) কিশোর ও প্রাপ্তবয়স্ক বন্দি হইতে পৃথক রাখা; এবং

(গ) অনতিবিলম্বে নিকটস্থ শিশু উন্নয়ন কেন্দ্রে স্থানান্তরের ব্যবস্থা করা।

(৩) বন্দির আবাসনস্থলে সাধারণ স্বাস্থ্যবিধি বজায় রাখিয়া, বিধি দ্বারা নির্ধারিত, নিম্নবর্ণিত ব্যবস্থা নিশ্চিত করিতে হইবে, যথা :

(ক) ন্যূনতম পরিমাপে ও আদর্শ মানসম্পন্ন শয়নস্থল ও বিছানাপত্র;

(খ) স্বাভাবিক বা কৃত্রিম বা উভয়বিধ যথেষ্ট আলো;

(গ) নির্মল বায়ু প্রবাহের জন্য পর্যাপ্ত বায়ু সঞ্চালন;

(ঘ) বর্জ্য পদার্থ অপসারণ;

(ঙ) সহজে ব্যবহারযোগ্য এইরূপ সুবিধাজনক স্থানে প্রয়োজনীয়সংখ্যক পায়খানা ও প্রস্রাবখানার ব্যবস্থা করা এবং

উক্ত পায়খানা ও প্রস্রাবখানা জীবাণুনাশক ও পরিষ্কারক ব্যবহারের মাধ্যমে স্বাস্থ্যসম্মত উপায়ে পয়ঃনিষ্কাশন;

(চ) সুবিধাজনক স্থানে যথেষ্ট পরিমাণ আবর্জনা ফেলার বাস (bin) রাখা; এবং

(ছ) প্রয়োজনীয় অন্যান্য ব্যবস্থা গ্রহণ করা।

(৪) উপধারা (৩)-এর দফা (ক)-এর উল্লিখিত শয়নস্থলের জন্য বরাদ্দকৃত জায়গা অপেক্ষা কম জায়গা থাকিলে, সুপারিনটেনডেন্ট বিষয়টি অনতিবিলম্বে কারা মহাপরিদর্শক-কে অবহিত করিবেন।

**৩১। বন্দির জন্য অস্থায়ী আবাসন**—(১) কারাগারের বন্দি সংখ্যা ধারণ ক্ষমতার অতিরিক্ত হইলে বা ধারা ৩০-এর উপধারা (৪)-এর বিধান অনুসারে কারা মহাপরিদর্শক অবহিত হইলে, তিনি অতিরিক্ত-সংখ্যক বন্দিকে অন্য কোনো কারাগারে স্থানান্তরের নির্দেশ প্রদান করিতে পারিবেন।

(২) প্রাকৃতিক দুর্যোগ, মহামারি রোগের প্রাদুর্ভাব অথবা এইরূপ অন্য কোনো কারণে মহাপরিদর্শকের নির্দেশক্রমে কারা কর্তৃপক্ষ বন্দির সুবিধাজনকভাবে ও নিরাপদ অবস্থানের জন্য সাময়িক আবাসনের ব্যবস্থা করিতে পারিবে।

(৩) উপধারা (১) ও (২)-এর উদ্দেশ্য পূরণকল্পে, কারা কর্তৃপক্ষ, প্রয়োজনে, সংশ্লিষ্ট অন্যান্য বাহিনী বা সংস্থার নিকট হইতে সহায়তা চাহিতে বা গ্রহণ করিতে পারিবে এবং সংশ্লিষ্ট বাহিনী বা সংস্থা অনতিবিলম্বে উক্তরূপ সহায়তা প্রদান করিবে।

**৩২। পোশাক-পরিচ্ছদ ও বিছানাপত্র**—(১) বন্দির ধরন, স্বাস্থ্য, কারাগারে কাজের ধরন, দেশীয় সংস্কৃতি এবং আবহাওয়ার সহিত সংগতি রাখিয়া বন্দির পরিষ্কার-পরিচ্ছন্ন ও স্বাস্থ্যসম্মত পোশাক-পরিচ্ছদ ও বিছানাপত্রাদি সরবরাহ করা হইবে।

(২) কারা কর্তৃপক্ষ বন্দির—

(ক) পোশাক-পরিচ্ছদ এবং বিছানাপত্রাদি স্বাস্থ্যসম্মতভাবে রক্ষণাবেক্ষণের ব্যবস্থা করিবে; এবং

(খ) পোশাক-পরিচ্ছদ ধৌত করিবার জন্য প্রয়োজনীয় উপকরণ সরবরাহ করিবে;

(গ) পোশাক-পরিচ্ছদ, প্রয়োজনে, সেলাই করিবার সুবিধা প্রদান করিবে।

৩৩। সাজাপ্রাপ্ত বন্দির পোশাক-পরিচ্ছদ—(১) কারা কর্তৃপক্ষ, বিধি দ্বারা নির্ধারিত এবং ধারা ৩২-এর বিধানসাপেক্ষে সাজাপ্রাপ্ত বন্দির পোশাক সরবরাহ করিবে এবং বন্দিগণ উক্ত পোশাক পরিধানে বাধ্য থাকিবে।

(২) সাজাপ্রাপ্ত বন্দির পোশাক অন্যান্য বন্দির পোশাক হইতে পৃথক হইবে।

৩৪। বিচারাধীন বন্দির পোশাক-পরিচ্ছদ—(১) কারা কর্তৃপক্ষ, বিধি দ্বারা নির্ধারিত এবং ধারা ৩২-এর বিধানসাপেক্ষে বিচারাধীন বন্দির পোশাক সরবরাহ করিবে।

(২) কারা কর্তৃপক্ষের অনুমোদনসাপেক্ষে বিচারাধীন বন্দি ও সাজাপ্রাপ্ত নহে এমন অন্যান্য বন্দি কারাগারের বাহির হইতে অতিরিক্ত পোশাক-পরিচ্ছদ গ্রহণ বা ক্রয় করিবার সুযোগ পাইবে।

৩৫। খাদ্য ও পুষ্টি—(১) বন্দির স্বাস্থ্য সুরক্ষার জন্য বিধি দ্বারা প্রণীত তালিকা-অনুসারে সুষম খাদ্য প্রতিদিন নির্দিষ্ট সময়ে সরবরাহ করিতে হইবে।

(২) উপধারা (১)-এ যাহা কিছুই থাকুক না কেন, বন্দির স্বাস্থ্যগত বিষয় বিবেচনাক্রমে মেডিক্যাল অফিসার তাহার জন্য বরাদ্দকৃত খাদ্যের পরিমাণ, খাদ্য তালিকা এবং খাদ্য প্রদানের সময় পরিবর্তনের জন্য কারা কর্তৃপক্ষের নিকট সুপারিশ করিবেন।

(৩) খাদ্য তালিকায় মায়ের সহিত শিশু, স্তন্যদায়ী মা, গর্ভবতী নারী এবং অন্য যে-কোনো প্রকারের বন্দি, যাহাদের শারীরিক প্রয়োজনে বিশেষ খাদ্য আবশ্যিক, তাহাদের জন্য খাদ্য তালিকায় বিশেষ খাদ্যের ব্যবস্থা থাকিবে।

(৪) খাদ্য তালিকা প্রস্তুতের সময় যুক্তিসংগতভাবে সম্ভব হইলে, বন্দির ধর্ম, অঞ্চল ও সংস্কৃতি বিবেচনা করা হইবে।

(৫) খাদ্য যথাযথ ও স্বাস্থ্যসম্মতভাবে প্রস্তুত, সংরক্ষণ এবং পরিবেশন করা হইবে এবং নিয়মিত মেডিক্যাল অফিসার কর্তৃক পরীক্ষিত হইবে।

(৬) কারাগারের অভ্যন্তরে উহার কোনো সুবিধাজনক স্থানে সকল বন্দির পান করিবার জন্য পর্যাপ্ত বিশুদ্ধ পানি সরবরাহের ব্যবস্থা করিতে হইবে।

(৭) প্রত্যেক কারাগারে সরকার কর্তৃক নির্ধারিত পদ্ধতিতে এক বা একাধিক ক্যান্টিন পরিচালনা করা যাইবে এবং বন্দিগণ ক্যান্টিন হইতে ব্যক্তিগত অর্থে খাবার ও প্রয়োজনীয় দ্রব্যাদি ক্রয় করিতে পারিবেন :

তবে শর্ত থাকে যে, ক্যান্টিনে কারা কর্তৃপক্ষ কর্তৃক অনুমোদিত পণ্য বা দ্রব্যাদি ব্যতীত অন্য কোনো পণ্য বা দ্রব্যাদি বিক্রয়, সংগ্রহ, মজুত, সরবরাহ ইত্যাদি করা যাইবে না।

(৮) বন্দিগণ বিধি অনুসারে, কারা কর্তৃপক্ষের অনুমোদনসাপেক্ষে, তাহাদের পরিবার হইতে সরবরাহকৃত খাবার গ্রহণ করিতে পারিবেন।

(৯) আদালতে উপস্থিতি অথবা ভিন্ন কারাগারে, চিকিৎসাকেন্দ্রে, হাসপাতালে বা অন্য কোনো কারণে স্থানান্তর করিতে হইলে কারা কর্তৃপক্ষ বন্দির খাবার এবং পানীয় বিধি অনুযায়ী সরবরাহ করিবে।

৩৬। পরিষ্কার-পরিচ্ছন্নতা—(১) প্রত্যেক কারাগার পরিষ্কার-পরিচ্ছন্ন রাখিতে হইবে এবং কোনো নর্দমা, পায়খানা বা অন্য কোনো আবর্জনা হইতে উদ্ভূত দূষিত বাষ্প হইতে মুক্ত রাখিতে হইবে এবং বিশেষ করিয়া—

- (ক) কারাগারের মেঝে, সিঁড়ি, যাতায়াতের পথ হইতে নিয়মিত ময়লা ও আবর্জনা উপযুক্ত পন্থায় অপসারণ করিতে হইবে;
- (খ) বন্দির শয়নস্থলের মেঝে সপ্তাহে ন্যূনতম একদিন ধৌত করিতে হইবে এবং প্রয়োজনে, ধৌত কাজে জীবাণুনাশক ব্যবহার করিতে হইবে;
- (২) মেডিক্যাল অফিসার ও সিভিল সার্জন, বিধি দ্বারা নির্ধারিত পদ্ধতিতে, নিয়মিত পরিষ্কার-পরিচ্ছন্নতা পরিদর্শন করিবেন এবং সুপারিনটেনডেন্ট-এর নিকট প্রতিবেদন প্রদান করিবেন।
- (৩) সুপারিনটেনডেন্ট—
- (ক) উপধারা (২)-এর অধীন প্রাপ্ত প্রতিবেদন-অনুযায়ী প্রয়োজনীয় পদক্ষেপ গ্রহণ করিবেন এবং প্রয়োজ্যক্ষেত্রে, কারা মহাপরিদর্শক-এর সহায়তা চাহিবেন ও পরামর্শ গ্রহণ করিবেন।
- (খ) বন্দির স্বাস্থ্য, কারাগারের পরিষ্কার-পরিচ্ছন্নতা এবং স্বাস্থ্যসম্মত পরিবেশ নিশ্চিত করিতে, বিধি অনুযায়ী, ব্যবস্থা গ্রহণসহ প্রয়োজনীয় উপকরণ ও উপদান সরবরাহ নিশ্চিত করিবেন।
- (৪) বন্দির ব্যক্তিগত পরিচ্ছন্নতার উদ্দেশ্যে প্রত্যেক কারাগারে চুল কাটাসহ এই সংক্রান্ত অন্যান্য ব্যবস্থা থাকিবে।
- ৩৭। স্বাস্থ্যসেবা—**(১) সকল বন্দি বিশেষত গর্ভবতী নারী, নবজাতক, মাতার সহিত অবস্থানরত শিশু, ঋতুবতী নারী কিংবা অন্যান্য বিশেষ চাহিদা সম্পন্ন বন্দি তাহাদের বিশেষ স্বাস্থ্যচাহিদা অনুসারে স্বাস্থ্যসেবা প্রাপ্ত হইবেন।
- (২) কারা অভ্যন্তরে স্বাস্থ্যসেবার মান জাতীয় স্বাস্থ্যনীতি ও মানদণ্ডের সহিত সামঞ্জস্যপূর্ণ হইবে।
- (৩) প্রত্যেক কারাগারে হাসপাতাল থাকিবে, যাহাতে সর্বদা প্রয়োজনীয়সংখ্যক চিকিৎসকসহ অন্যান্য চিকিৎসাসহায়ক কর্তৃকর্তা-কর্মচারী থাকিবে।
- (৪) কারা হাসপাতালে চিকিৎসার প্রয়োজনীয় সরঞ্জামাদির সরবরাহ ও মজুত থাকিবে এবং মেডিক্যাল অফিসার উহা নিয়মিত পরিদর্শন ও তদারকি করিবেন।
- (৫) নারী ওয়ার্ডের পরিবেষ্টনীর মধ্যে কারা হাসপাতালের একটি অংশ থাকিবে, যাহাতে প্রয়োজনীয়সংখ্যক নারী চিকিৎসক বা নারী স্বাস্থ্য সেবিকা থাকিবে।
- (৬) মেডিক্যাল অফিসার বা সহকারী সার্জনের অনুপস্থিতিতে এবং বিশেষ স্বাস্থ্যসেবার প্রয়োজনে, সুপারিনটেনডেন্ট বা দায়িত্বপ্রাপ্ত কর্মকর্তা কোনো বন্দিকে অনতিবিলম্বে কারাগারের বাহিরে নিকটস্থ হাসপাতালে স্থানান্তরের নির্দেশনা প্রদান করিবেন।
- (৭) কোনো বন্দির স্বাস্থ্য সুরক্ষায় বিশেষ পরীক্ষা-নিরীক্ষার প্রয়োজন হইলে, কারা কর্তৃপক্ষ নিরাপত্তা ব্যবস্থা নিশ্চিতক্রমে নিকটস্থ সরকারি হাসপাতাল বা মেডিক্যাল কলেজ বা স্বাস্থ্যকেন্দ্রে বা চিকিৎসাকেন্দ্রে পরীক্ষা-নিরীক্ষার ব্যবস্থা করিবে।
- (৮) বন্দিদের মাসনিক স্বাস্থ্যের উন্নয়নে নিয়মিত মোটিভেশন ও কাউন্সিলিং-এর ব্যবস্থা করা হইবে।
- (৯) মাদকাসক্ত বন্দিকে অন্যান্য বন্দি হইতে পৃথক রাখিয়া প্রয়োজনীয় চিকিৎসার ব্যবস্থা করা হইবে।
- (১০) স্বাস্থ্যগত কারণে কারা কর্তৃপক্ষ বন্দিকে মেডিক্যাল অফিসারের পরামর্শক্রমে পৃথক রাখিতে পারিবে।

৩৮। শরীরচর্চা, বিনোদন ও উৎকর্ষমূলক কর্মকাণ্ড—(১) বন্দির কল্যাণ, মানসিক ও শারীরিক উৎকর্ষ এবং দক্ষতা উন্নয়নে কারাগারের নিরাপত্তা ব্যবস্থা বজায় রাখিয়া বন্দিগণ বিভিন্ন কর্মকাণ্ডে অংশগ্রহণের সুযোগ পাইবেন, যাহা বন্দির—

- (ক) শারীরিক, মানসিক অথবা যৌন হয়রানির শিকার হওয়ায় আশঙ্কা সৃষ্টি করিবে না; এবং
- (খ) মানবিক ও সামাজিক মিথস্ক্রিয়ার জন্য উপযুক্ত হইবে।

(২) কর্তৃপক্ষ কর্তৃক নির্ধারিত স্থানে বন্দিগণ পর্যাপ্ত শরীরচর্চা, খেলাধুলা, বিনোদনমূলক কার্যক্রম পরিচালনার সুযোগ পাইবে এবং প্রত্যেক কারাগারে এই সংক্রান্ত পর্যাপ্ত সুবিধাদি থাকিবে।

(৩) কারা কর্তৃপক্ষের অনুমোদনক্রমে বন্দিগণ পুস্তক, সংবাদপত্র, রেডিয়ো ও টেলিভিশন সংগ্রহ ও ব্যবহার করিতে পারিবেন:

তবে শর্ত থাকে যে, সংবাদপত্র, রেডিয়ো, টেলিভিশন ইত্যাদির ধরন, ফ্রিকুয়েন্সি, চ্যানেল ইত্যাদি নির্ধারণের ক্ষেত্রে কারা কর্তৃপক্ষ নিরাপত্তার স্বার্থে প্রয়োজনে শর্ত আরোপ করিতে পারিবে।

৩৯। বন্দির কাজ—(১) সশ্রম কারাদণ্ডপ্রাপ্ত বন্দিগণ সাজা বাস্তবায়ন পরিকল্পনার ভিত্তিতে কাজে নিয়োজিত হইবেন।

(২) বিনাশ্রম কারাদণ্ডপ্রাপ্ত বন্দিকে তাহাদের আবেদনের পরিপ্রেক্ষিতে এবং ঝুঁকি ও চাহিদা নিরূপণ কমিটির সুপারিশের ভিত্তিতে কাজে নিয়োজিত করা যাইবে।

(৩) বন্দির কাজ এমন হইবে, যাহা—

- (ক) সংশোধন ও পুনর্বাসন-এর উদ্দেশ্যে সাজা বাস্তবায়ন পরিকল্পনার অংশ হইবে;
- (খ) উৎপাদনমূলক হইবে;
- (গ) বিধি অনুসারে, যথোপযুক্ত মজুরির ভিত্তিতে হইবে;
- (ঘ) নিপীড়ন বা শাস্তির নিমিত্ত হইবে না; এবং
- (ঙ) কারামুক্তির পর কর্মসংস্থানের সুযোগ বৃদ্ধির সহিত সম্পর্কিত হইবে।

(৪) বিচারাধীন অথবা সাজাপ্রাপ্ত নহে এইরূপ বন্দি কাজ করিবার যোগ্য হইবে না, তবে তাহাদের আবেদনের পরিপ্রেক্ষিতে প্রশিক্ষণের অংশ হিসাবে কাজ করিবার সুযোগ প্রদান করা যাইতে পারে।

(৫) কারা কর্তৃপক্ষ বন্দির দৈনন্দিন কাজের জন্য—

- (ক) যথোপযুক্ত উপকরণ সরবরাহ করিবে;
- (খ) বন্দির প্রশিক্ষণ প্রদান ও কর্মসংস্থানের ব্যবস্থা বা বন্দির কাজ ও উন্নয়নে ভূমিকা রাখিতে আগ্রহী প্রতিষ্ঠান ও সংস্থার সহিত যোগাযোগ রক্ষা করিবে;
- (গ) দফা (খ)-এর উদ্দেশ্য পূরণকল্পে, সরকারের অনুমোদনক্রমে সংশ্লিষ্ট সরকারি, বেসরকারি এবং ব্যক্তি মালিকানাধীন প্রতিষ্ঠানের সহিত অংশীদারিত্ব প্রতিষ্ঠা করিতে পারিবে;

(ঘ) সরকারের অনুমোদনসাপেক্ষে বেসরকারি প্রতিষ্ঠানে কাজ করিবার অনুমতি প্রদান করিতে পারিবে এবং প্রয়োজনে, কারাগারের বাহিরেও বিধি দ্বারা নির্ধারিত সময় ও পদ্ধতিতে কাজ করিবার অনুমতি প্রদান করিতে পারিবে :

তবে শর্ত থাকে যে, যাবজ্জীবন কারাদণ্ড ব্যতীত যে-কোনো মেয়াদের কারাদণ্ডের ক্ষেত্রে, অর্জিত রেয়াতসহ মোট কারাদণ্ডের ন্যূনতম অর্ধাংশ অতিবাহিত না করিলে বন্দি কারাগারের বাহিরে কাজ করার যোগ্য হইবেন না;

আরো তবে শর্ত থাকে যে, কারা কর্তৃপক্ষ এই বিষয়ে নিশ্চিত হইবে যে উক্ত বন্দি বৈষম্যের শিকার হইবে না।

(৬) কারা কর্তৃপক্ষ, বিধি দ্বারা নির্ধারিত, স্বাস্থ্য ও নিরাপত্তা, পেশাগত কারণে সৃষ্ট ঝুঁকি ও রোগসহ কর্মক্ষেত্রে আহত হইলে ক্ষতিপূরণ প্রদান, কর্মঘণ্টা হ্রাসকরণ ইত্যাদি বিষয়ে প্রয়োজনীয় ব্যবস্থা গ্রহণ করিবে।

**৪০। শিক্ষা ও শিক্ষা উপকরণ—**(১) বন্দির উন্নয়ন ও পুনর্বাসনের লক্ষ্যে কারা অভ্যন্তরে শিক্ষা, কারিগরি দক্ষতা ও আইনগত সচেতনতা কার্যক্রম পরিচালিত হইবে।

(২) বন্দির তাত্ত্বিক ও ব্যবহারিকসহ অনুমোদিত পাবলিক পরীক্ষায় অংশগ্রহণের অনুমতি প্রদানের জন্য কারা কর্তৃপক্ষের অনুমোদনসাপেক্ষে প্রয়োজনীয় ব্যবস্থা গ্রহণ করিতে হইবে।

(৩) উপধারা (১) ও (২)-এর উদ্দেশ্য পূরণকল্পে—

(ক) শিক্ষা মন্ত্রণালয়, প্রাথমিক ও গণশিক্ষা মন্ত্রণালয় ও সরকারের অন্যান্য মন্ত্রণালয়, প্রয়োজনে, বেসরকারি প্রতিষ্ঠানের সহিত কারা মহাপরিদর্শক সহযোগিতামূলক অংশীদারিত্ব স্থাপন করিতে পারিবেন;

(খ) স্থানীয় সরকারি শিক্ষা ও প্রশিক্ষণ-প্রতিষ্ঠান, প্রয়োজনে, বেসরকারি প্রতিষ্ঠানের সহিত সুপারিনটেনডেন্ট, কারা মহাপরিদর্শক-এর অনুমোদনসাপেক্ষে সহযোগিতামূলক অংশীদারিত্ব স্থাপন করিতে পারিবেন।

(৪) প্রত্যেক কারাগারে একটি পাঠাগার থাকিবে এবং সকল বন্দির পাঠাগার হইতে পুস্তক সংগ্রহ ও পড়িবার সুযোগ থাকিবে এবং কারা কর্তৃপক্ষ, প্রয়োজনে, স্থানীয় গণ-গ্রন্থাগারের সহযোগিতা গ্রহণ এবং সরকারি গণ-গ্রন্থাগার হইতে পুস্তক সংগ্রহ করিতে পারিবে।

(৫) বন্দিদের মানসিক উন্নয়নে নৈতিক ও ধর্মীয় শিক্ষার ব্যবস্থা করা হইবে।

(৬) কারা কর্তৃপক্ষ বন্দিদের শিক্ষা ও প্রতিষ্কণের প্রয়োজনীয় উপকরণ সংগ্রহ ও সরবরাহের ব্যবস্থা গ্রহণ করিবে।

**৪১। প্রশিক্ষণ ও দক্ষতা উন্নয়ন—**(১) বন্দির জন্য প্রয়োজনীয় প্রশিক্ষণ কার্যক্রম পরিচালিত হইবে এবং প্রশিক্ষণের অংশ হিসাবে বন্দি যেসকল কাজ করিবেন, তাহা—

(ক) পাঠ্যক্রম ও মডিউল অনুসারে হইবে, প্রয়োজনে, মুক্তির পরও বন্দিকে প্রশিক্ষণ সমাপ্ত করিবার সুযোগ প্রদান করা যাইতে পারে;

(খ) অভিজ্ঞতা ও ভবিষ্যৎ কর্মসংস্থানের জন্য যোগ্যতা অর্জনের প্রক্রিয়া বলিয়া বিবেচিত হইবে।

(২) প্রশিক্ষণ পরিচালনার ক্ষেত্রে কারা কর্তৃপক্ষ সরকারি ও বেসরকারি প্রতিষ্ঠানের সহিত অংশীদারিত্ব প্রতিষ্ঠা করিবে।

(৩) বিচারামীন বন্দিদের প্রশিক্ষণ ও দক্ষতা উন্নয়ন ঐচ্ছিক হইবে এবং এ বিষয়ে পৃথক পরিকল্পনা প্রণীত হইবে।

**৪২। প্রশিক্ষণ ও দক্ষতা উন্নয়ন ইউনিট—**(১) প্রশিক্ষণ পরিচালনার ক্ষেত্রে প্রত্যেক কারাগারে একটি প্রশিক্ষণ ও দক্ষতা উন্নয়ন ইউনিট থাকিবে এবং উক্ত ইউনিটের কার্যপরিধি, ক্ষেত্র ও আনুষঙ্গিক বিষয়াদি বিধি দ্বারা নির্ধারিত হইবে।

(২) প্রশিক্ষণ ও দক্ষতা উন্নয়ন ইউনিট অন্যান্য কার্যসহ প্রশিক্ষণ সমাপ্তির পর সনদ প্রদান করিবে এবং উক্তরূপ সনদে ইহা প্রতিফলিত হইবে না যে, বন্দি কারাগারে অবস্থানকালীন উহা অর্জন করিয়াছে।

**৪৩। চিন্তা, চেতনা ও ধর্মানুভূতি—**(১) বন্দির চিন্তা, চেতনা ও ধর্মানুভূতির প্রতি যথাযথ সম্মান প্রদর্শন করা হইবে।

(২) কারা কর্তৃপক্ষ কারা ব্যবস্থাপনার দৈনিক কর্মসূচি এমনভাবে নির্ধারণ করিবে যাহাতে বন্দিগণ কারা অভ্যন্তরে তাহাদের ধর্মীয় আচার-অনুষ্ঠান প্রতিপালন করিতে পারেন।

(৩) বন্দিগণ কারা কর্তৃপক্ষ কর্তৃক অনুমোদিত স্ব স্ব ধর্মীয় পুস্তকাদি পাঠের সুবিধার্থে নিজ হেফাজতে সংরক্ষণ করিতে পারিবেন।

**৪৪। আইনজীবী, আত্মীয়স্বজন, অনুমোদিত অন্যান্য ব্যক্তি ইত্যাদির সহিত সাক্ষাৎ ও যোগাযোগ—**(১) বন্দিগণ কারা কর্তৃপক্ষের অনুমোদন ও তৎকর্তৃক নির্দিষ্টকৃত তারিখ ও সময়ে নিম্নবর্ণিত ব্যক্তিবর্গের সহিত সাক্ষাৎ করিতে পারিবেন, যথা:

(ক) আইনজীবী;

(খ) পরিবার, আত্মীয়-স্বজন, বন্ধু-বান্ধব বা অনুমোদিত অন্যান্য ব্যক্তি;

(গ) বিদেশি বন্দির ক্ষেত্রে, সরকারের অনুমোদনসাপেক্ষে সংশ্লিষ্ট দূতাবাস বা হাইকমিশন কর্তৃক মনোনীত প্রতিনিধি;

(ঘ) তিনি যে কর্মক্ষেত্র বা ব্যবসায় প্রতিষ্ঠানে কর্মরত বা সংশ্লিষ্ট ছিলেন, প্রয়োজনে, উক্ত কর্মক্ষেত্র বা ব্যবসায় প্রতিষ্ঠানের কর্মচারী বা সহকর্মী ইত্যাদি।

(২) উপধারা (১)-এ উল্লিখিত বন্দির সাক্ষাতের জন্য নির্দিষ্টকৃত তারিখ ও সময় কারা কর্তৃপক্ষ কারাগারের নিরাপত্তা ও শৃঙ্খলার স্বার্থে বাতিল, স্থগিত বা পরিবর্তন করিতে পারিবে।

(৩) বন্দি কারাগারের শৃঙ্খলা ও নিরাপত্তার পরিপন্থি নহে এবং সরকারের ভাবমূর্ত্তী নষ্ট না হয় ইত্যাদি বিষয় বিবেচনাসাপেক্ষে কারা কর্তৃপক্ষের অনুমোদনক্রমে, বিধি দ্বারা নির্ধারিত পদ্ধতিতে, উপধারা (১)-এ বর্ণিত ব্যক্তিবর্গের সহিত যোগাযোগ করিবে পারিবে।

[**ব্যাখ্যা :** এই উপধারার উদ্দেশ্য পূরণকল্পে, ‘যোগাযোগ’ অর্থে চিঠি-পত্র, দূরালাপনী, ইলেকট্রনিক বা ডিজিটাল ও সময়ে সময়ে, বিধি দ্বারা নির্ধারিত পদ্ধতিকে বুঝাইবে।]

(৪) আদালতের নির্দেশে বন্দিদের জিজ্ঞাসাবাদ, তদন্ত বা প্রয়োজনীয় তথ্যানুসন্ধানের জন্য প্রত্যেক কারাগারে একটি জিজ্ঞাসাবাদ কক্ষের ব্যবস্থা করা যাইতে পারে।

৪৫। ব্যাংক চেক, আইনগত দলিলাদি ইত্যাদিতে স্বাক্ষর—বন্দি কারা কর্তৃপক্ষের অনুমোদনসাপেক্ষে, বিধি দ্বারা নির্ধারিত পদ্ধতিতে, ব্যাংক চেক এবং প্রয়োজনে, অন্যান্য আইনগত দলিলাদিতে স্বাক্ষর বা ক্ষেত্রমতো, টিপসহি প্রদান করিতে পারিবে।

৪৬। বন্দির বা তাহার পরিবারের অসুস্থতা-সম্পর্কিত তথ্য অবহিত করা—(১) দায়িত্বপ্রাপ্ত কর্মকর্তা কর্তৃক বন্দি-সম্পর্কিত নিম্নবর্ণিত বিষয়াদি পরিবারের সদস্য, নিকট আত্মীয় অথবা বন্দি কর্তৃক পূর্বে মনোনীত ব্যক্তিকে অনতিবিলম্বে অবগত করিতে হইবে—

- (ক) মৃত্যুবরণ করা;
- (খ) গুরুতর অসুস্থ হওয়া;
- (গ) অসুস্থতাজনিত হাসপাতালে ভর্তি; বা
- (ঘ) গুরুতর জখম বা আহত হওয়া ইত্যাদি।

(২) উপধারা (১)-এ বর্ণিত তথ্যাবলি বিচারাধীন বন্দির ক্ষেত্রে সংশ্লিষ্ট আদালতকে অবহিত করিতে হইবে।

(৩) বন্দির পরিবারের সদস্যের মৃত্যু বা গুরুতর অসুস্থতার খবর সংবেদনশীলতার সহিত খবর প্রাপ্তির পর অনতিবিলম্বে বন্দিকে অবগত করিতে হইবে।

৪৭। নারী বন্দি—(১) নারী বন্দির—

- (ক) প্রতি কোনো প্রকার বৈষ্যম করা যাইবে না; এবং
- (খ) শারীরিক, মানসিক, আর্থিক, পারিবারিক ও সামাজিক চাহিদা বিবেচনায় প্রয়োজন-অনুসারে ব্যবস্থা গ্রহণ করা হইবে।

(২) নারী বন্দির জন্য—

- (ক) প্রয়োজন অনুসারে পর্যাপ্তসংখ্যক কারাগার প্রতিষ্ঠা করা হইবে; বা
- (খ) প্রত্যক কারাগারে নারী বন্দির জন্য পৃথক পরিবেষ্টনীসহ পৃথক ভবনে আবাসনের ব্যবস্থা করা হইবে যাহার প্রবেশ ও বর্হিগমন পথ এইরূপ হইবে যাহাতে কারাগারের অন্যান্য অংশ হইতে দৃষ্টিগোচর না হয়।

(৩) শৃঙ্খলা ও নিরাপত্তা বিবেচনায় আনিয়া সাজাপ্রাপ্ত নারী বন্দিকে নিজ বসত বাড়ির অথবা সামাজিক পুনর্বাসন প্রতিষ্ঠানের নিকটবর্তী কারাগারে আবাসনের ব্যবস্থা করা হইবে।

(৪) নারী বন্দির ক্ষেত্রে, এই আইনের অতিরিক্ত হিসাবে, কারাগারে আটক সাজাপ্রাপ্ত নারীদের বিশেষ সুবিধা আইন, ২০০৬ (২০০৬ খ্রিষ্টাব্দের ৪৮ নং আইন)-এর বিধানাবলিও প্রযোজ্য হইবে।

(৫) কারা কর্তৃপক্ষ নারী বন্দিদের উৎপাদিত পণ্য বাজারজাতকরণ বা বিক্রয় অথবা মুক্তির পর তাহাদের কর্মসংস্থানের সুযোগ সৃষ্টির উদ্দেশ্যে মহিলা ও শিশু বিষয়ক মন্ত্রণালয় এবং উহার অধীনস্থ অধিদপ্তর, সংস্থা ও নারী উদ্যোক্তা সমিতির সহিত অংশীদারিত্ব প্রতিষ্ঠা করিবে।



৪৮। নারী পরিবেষ্টনীতে অনুপ্রবেশ, তল্লাশি ইত্যাদি—(১) নারীদের জন্য পৃথক কারাগারে অথবা পৃথক পরিবেষ্টনীতে—

(ক) নিযুক্ত সকল কারা কর্মচারীকে নারী হইতে হইবে, এবং

(খ) কোনো পুরুষ কর্মচারী প্রবেশ করতে পারিবে না :

তবে শর্ত থাকে যে, পুরুষ নিরাপত্তাকর্মী নারী কারাগার বা ক্ষেত্রমতো, পরিবেষ্টনীর বাহিরে দায়িত্ব পালন করিতে পারিবে :

আরও শর্ত থাকে যে, বায়োমেট্রিক শনাক্তকরণ, হাত বা পায়ের ছাপ, আঙুলের ছাপ, ছবি ও অন্যান্য শনাক্তকরণ চিহ্ন ও দৈহিক পরিমাপ ইত্যাদি গ্রহণের ক্ষেত্রে অথবা কারা কর্তৃপক্ষের অনুমোদনসাপেক্ষে অর্পিত দায়িত্ব পালনের জন্য প্রয়োজন হইলে নারী কারা কর্মকর্তা বা কর্মচারীর উপস্থিতিতে কোনো পুরুষ কর্মকর্তা বা কর্মচারী নারী কারাগার বা পরিবেষ্টনীতে প্রবেশ করিতে পারিবে।

(২) নারী বন্দির দেহ তল্লাশির প্রয়োজনীয়তা দেখা দিলে নারী কর্মকর্তা বা কর্মচারী দ্বারা উক্ত কার্যাদি সম্পন্ন করিতে হইবে।

৪৯। সন্তানসম্ভবা নারী, স্তন্যদায়ী মা ও মায়ের সহিত থাকা শিশুর চাহিদা বিবেচনায় বিশেষ ব্যবস্থাপনা—এই আইনের অন্য কোনো বিধানে যাহা কিছুই থাকুক না কেন—

(ক) কারা কর্তৃপক্ষ সন্তানসম্ভবা নারী, স্তন্যদায়ী মা ও মায়ের সহিত থাকা শিশুর চাহিদা পূরণে নিম্নরূপ প্রয়োজনীয় ব্যবস্থা গ্রহণ করিবে, যথা :

(অ) দণ্ডপ্রাপ্ত বন্দির ক্ষেত্রে সাজা বাস্তবায়ন পরিকল্পনা-অনুযায়ী উপযোগী পুনর্বাসন কর্মসূচি প্রণয়ন;

(আ) প্রত্যেক কারাগারে প্রয়োজন-অনুসারে শিশু দিবাযত্ন কেন্দ্র প্রতিষ্ঠা এবং উক্ত শিশু দিবাযত্ন কেন্দ্রে, প্রয়োজ্যক্ষেত্রে, পর্যাপ্তসংখ্যক দক্ষ কর্মী নিযুক্তকরণ;

(ই) শারীরিক, মানসিক ও যৌন হয়রানির শিকার নারী বন্দির জন্য মনো-সামাজিক পরামর্শসহ এতৎসংশ্লিষ্ট প্রয়োজনীয় সেবা প্রদান; এবং

(ঈ) এই ধারার উদ্দেশ্য পূরণকল্পে, অন্যান্য সকল বা যে-কোনো প্রয়োজনীয় ব্যবস্থা ব্যবস্থা গ্রহণ।

(খ) সন্তানসম্ভবা নারী, স্তন্যদায়ী মা, বন্দির সহিত কারাগারে বা কারাগারের বাহিরে শিশু রহিয়াছে এইরূপ নারী বন্দির ক্ষেত্রে নিম্নবর্ণিত ব্যবস্থা গ্রহণ করা হইতে বিরত থাকিতে হইবে, যথা :

(অ) নিজের বা অন্যের অনিষ্ট বা শারীরিক ক্ষতিসাধন করিবার আশঙ্কা না থাকিলে নারী বন্দিকে হ্যান্ডকাপ, বেড়ি, শিকল ইত্যাদি পরানো;

(আ) শাস্তি হিসাবে নির্জন কারাবাস ও পৃথক কারাবাস প্রদান করা; এবং

(ই) পরিবারের সহিত সাক্ষাৎ রহিত করা।

৫০। মায়ের সহিত শিশু—(১) শিশুর বয়স ৬ (ছয়) বৎসর উত্তীর্ণ না হওয়া পর্যন্ত নারী বন্দির সহিত শিশু অবস্থান করিতে পারিবে :

তবে শর্ত থাকে যে, শিশুটি শারীরিক বা মানসিকভাবে প্রতিবন্ধী হইয়া থাকিলে মেডিক্যাল অফিসার কর্তৃক সার্টিফিকেট প্রাপ্তিসাপেক্ষে উক্ত শিশুর জন্য চিকিৎসা, খাদ্য ও প্রয়োজনীয় অন্যান্য বিশেষ ব্যবস্থা গ্রহণ করিতে হইবে।

(২) উপধারা (১)-এ বর্ণিত শিশুর বয়স ৬ (ছয়) বৎসর উত্তীর্ণ হইবার পর মায়ের সম্মতিতে উক্ত শিশুর পিতা অথবা অন্য কোনো আইনানুগ অভিভাবকের নিকট হস্তান্তর করিবে এবং—

(ক) সংশ্লিষ্ট রেজিস্টারে শিশুর নাম, বয়স ও অন্যান্য ব্যক্তিগত তথ্যাদি এবং গ্রহণকারী ব্যক্তির পরিচয়সংক্রান্ত তথ্যাবলি লিপিবদ্ধ করিবে; এবং

(খ) পিতা, মাতা বা অভিভাবকের স্বাক্ষর বা টিপসহি গ্রহণ করিবে।

(৩) উপধারা (২) অনুসারে শিশুর পিতা বা আইনানুগ অভিভাবক তাহাকে গ্রহণ না করিলে বা শিশুটির পিতা বা আইনানুগ অভিভাবক না থাকিলে, দায়িত্বপ্রাপ্ত কর্মকর্তা নিম্নরূপ ব্যবস্থা গ্রহণ করিবে, যথা :

(ক) শিশু আইন, ২০১৩-এর বিধান অনুসারে গঠিত শিশু কল্যাণ বোর্ডকে বিষয়টি অবহিত করা; এবং

(খ) আদালত বা সরকার বা সংশ্লিষ্ট জেলা ম্যাজিস্ট্রেট-এর অনুমোদনক্রমে সমাজ সেবা বিভাগ কর্তৃক পরিচালিত উপযুক্ত প্রতিষ্ঠানে উক্ত শিশুকে প্রেরণ করা।

(৪) উপধারা (২) ও (৩) অনুসারে নারী বন্দির শিশু কারাগারের বাহিরে যে স্থানেই অবস্থান করুক না কেন, উক্ত শিশু প্রতি ১৫ (পনেরো) দিনে একবার মায়ের সহিত সাক্ষাৎ করিবার সুযোগ পাইবে:

তবে শর্ত থাকে যে, বিশেষ পরিস্থিতিতে দায়িত্বপ্রাপ্ত কর্মকর্তা শিশুটিকে যে-কোনো সময় মায়ের সহিত সাক্ষাৎ করিবার অনুমতি প্রদান করিতে পারিবেন।

(৫) কারাগারে ভর্তির সময় মায়ের সহিত আগত শিশুর ক্ষেত্রে নিম্নবর্ণিত বিষয়াদি নিশ্চিত করিতে হইবে, যথা:

(ক) শিশুর নাম, সংখ্যা, বয়স ও ব্যক্তিগত তথ্যাদি লিপিবদ্ধকরণ ও সংরক্ষণ;

(খ) সর্বোত্তম স্বার্থকে প্রাধান্য বিবেচনা করিয়া শিশুর তথ্যাদি গোপনীয় রাখা এবং এইরূপ তথ্যাদি ব্যবহারের ক্ষেত্রে সর্বদা সতর্কতা অবলম্বন;

(গ) স্থানীয় স্বাস্থ্যসেবা বিভাগের সহযোগিতায় প্রচলিত স্বাস্থ্যসেবা প্রদান, বিশেষ করিয়া জাতীয় স্বাস্থ্যসেবার আওতায় অত্যাবশ্যকীয় টিকা প্রদান করা এবং প্রয়োজনে, শিশু বিশেষজ্ঞ দ্বারা শিশুর বিকাশ পর্যবেক্ষণ;

(ঘ) শিশুর সার্বিক বিকাশ ও উন্নয়নে যথোপযুক্ত শিক্ষা ও বিনোদনমূলক ব্যবস্থা গ্রহণসহ, প্রয়োজনে, কারাগারের বাহিরে শিক্ষার ব্যবস্থাকরণ; এবং

(ঙ) কারাবন্দি মা, বাবা অথবা অভিভাবকের সহিত শিশুকে দিবাকালে তালাবদ্ধ রাখা যাইবে না এবং এইরূপ সময়ে তাহাকে ডে-কেয়ার সেন্টারে রাখিবার প্রয়োজনীয় ব্যবস্থা গ্রহণ।

৫১। সন্তানসম্ভবা নারী, স্তন্যদায়ী মা এবং মায়ের সহিত শিশুর জন্য খাদ্য—সন্তানসম্ভবা বা স্তন্যদায়ী নারী বন্দি এবং শিশুদের জন্য, বিধি দ্বারা নির্দেশিত শর্তাদি ও পদ্ধতি অনুসরণপূর্বক, পরিপূরক পুষ্টিকর খাবার সরবরাহ করাসহ অনুকূল ও স্বাস্থ্যকর পরিবেশের ব্যবস্থা করিতে হইবে।

৫২। সন্তান সম্ভবা মায়ের কারাগারের ভিতরে বা বাহিরে শিশুর জন্ম ইত্যাদি—(১) সন্তানসম্ভবা নারী বন্দির সন্তান প্রসবের জন্য কারা কর্তৃপক্ষ নিম্নবর্ণিত বিশেষ ব্যবস্থা গ্রহণ করিবে, যথা :

- (ক) প্রসবের পূর্বে সকল স্বাস্থ্যসেবা প্রদান ও প্রয়োজনীয় উপকরণ সরবরাহ করা;
- (খ) কারা হাসপাতালে ভর্তি করা; এবং
- (গ) প্রয়োজনে, কারাগারের বাহিরের হাসপাতালে স্থানান্তর করা।

(২) প্রসবের পর কারা কর্তৃপক্ষ নিম্নবর্ণিত ব্যবস্থা গ্রহণ করিবে, যথা :

- (ক) নবজাতক শিশু ও মায়ের স্বাস্থ্যসেবা ও প্রয়োজনীয় উপকরণ সরবরাহ নিশ্চিত করা; এবং
- (খ) নবজাতক শিশুর জন্ম-নিবন্ধন সম্পন্ন করা :

তবে শর্ত থাকে যে, জন্ম-নিবন্ধন সনদে কারাগারে কিংবা কারাগারের তত্ত্বাবধানে উক্ত শিশুর জন্ম হইয়াছে এইরূপ কোনো বিষয় উল্লেখ করা যাইবে না।

৫৩। আইনগত পরমর্শ ও সহায়তা প্রাপ্তি বিষয়ে বন্দির অধিকার—(১) বন্দিগণ তাঁহাদের মামলাসংক্রান্ত কাগজপত্রাদির অনুলিপি নিজ দখলে রাখিতে ও সংরক্ষণ করিতে পারিবেন।

(২) মামলা পরিচালনার সুবিধার্থে বন্দি—

- (ক) নিজস্ব আইনজীবী মনোনয়ন ও ওকালতনামা প্রদানসহ মামলাসংক্রান্ত বিষয়ে কারা কর্তৃপক্ষের সহায়তায় আইনজীবীর সহিত যোগাযোগ করিতে পারিবে; বা
- (খ) আইনগত সহায়তা প্রদান আইন, ২০০০ এবং উহার অধীন প্রণীত বিধিমালা অনুসারে সকল ধরনের আইনগত সহায়তা প্রাপ্তির অধিকারী হইবে।

(৩) উপধারা (২)-এ যাহাই কিছুই থাকুক না কেন, বন্দিকে বিনামূল্যে আইনগত সহায়তা প্রদানে কারা কর্তৃপক্ষ, সরকারের অনুমোদনসাপেক্ষে, প্রয়োজনে, বিভিন্ন সরকারি ও বেসরকারি সেচ্ছাসেবী প্রতিষ্ঠান বা সংস্থার সহযোগিতা গ্রহণ এবং উক্ত প্রতিষ্ঠান বা সংস্থার সহিত সমঝোতা স্মারক স্বাক্ষর করিতে বা অংশীদারিত্ব প্রতিষ্ঠা করিতে পারিবে।

(৪) কারা কর্তৃপক্ষ সন্তানসম্ভবা নারী, স্তন্যদায়ী মা এবং সঙ্গে সন্তান রহিয়াছে এইরূপ বিচারাধীন নারী বন্দির তালিকা প্রস্তুতপূর্বক জেলা আইনগত সহায়তা কমিটি এবং মহিলা ও শিশু বিষয়ক মন্ত্রণালয়ের জেলা কার্যালয় বা সংশ্লিষ্ট কার্যালয়কে প্রদান করিবে, যাহাতে তাহারা আইনানুগ ও অন্যান্য প্রয়োজনীয় ব্যবস্থা গ্রহণ করিতে পারে।

৫৪। **কিশোর বন্দি**—(১) কিশোর বন্দির ক্ষেত্রে কারা কর্তৃপক্ষ নিম্নরূপ শিক্ষার ব্যবস্থা গ্রহণ করিতে পারিবে, যথা :

(ক) সাধারণ শিক্ষা;

(খ) কর্মমুখী শিক্ষা; এবং

(গ) কারিগরি শিক্ষা।

(২) উপধারা (১)-এর উদ্দেশ্য পূরণকল্পে, কারা কর্তৃপক্ষ, সরকারের অনুমোদনসাপেক্ষে, সমাজ সেবা অধিদপ্তর, বিশেষায়িত বেসরকারি প্রতিষ্ঠান, স্থানীয় সংগঠন এবং অন্যান্য সরকারি প্রতিষ্ঠান ও বিভাগের সহায়তা গ্রহণ, সমঝোতা স্মারক স্বাক্ষর ও অংশীদারিত্ব প্রতিষ্ঠা করিতে পারিবে।

(৩) উপধারা (১) ও (২)-এর উদ্দেশ্য বাস্তবায়নকালে অথবা যে-কোনো সময় কারা কর্তৃপক্ষের নিকট যদি প্রতীয়মান হয় যে, কিশোর বন্দির বয়স ১৮ (আঠারো) বৎসর অপেক্ষা কম, তাহা হইলে কারা কর্তৃপক্ষ অনতিবিলম্বে সংশ্লিষ্ট আদালত এবং প্রয়োজ্যক্ষেত্রে, জেলা আইনগত সহায়তা কমিটির নিকট বিয়য়টি প্রেরণ করিবে।

(৪) উপধারা (৩) অনুসারে সংশ্লিষ্ট আদালত হইতে প্রয়োজনীয় নির্দেশনা প্রাপ্ত হইলে কারা কর্তৃপক্ষ সংশ্লিষ্ট কিশোরকে নিকটস্থ শিশু উন্নয়ন কেন্দ্রে স্থানান্তর করিবে এবং বিষয়টি সংশ্লিষ্ট রেজিস্টারে লিপিবদ্ধ করিবে।

(৫) উপধারা (১) হইতে (৪)-এ যাহা কিছুই থাকুক না, শিশু উন্নয়ন কেন্দ্র হইতে কোনো শিশুকে ১৮ (আঠারো) বৎসর উত্তীর্ণ হইবার পর কারাগারে প্রেরণ করা হইলে তাহাকে কিশোর হিসাবে গ্রহণকরত বিধি দ্বারা নির্ধারিত পদ্ধতিতে রেয়াতসহ অন্যান্য সুবিধা প্রদান করিবে।

[ব্যাখ্যা : এই ধারার উদ্দেশ্য পূরণকল্পে, কিশোর অর্থে কিশোরীও অন্তর্ভুক্ত হইবে।]

৫৫। **প্রতিবন্ধী বন্দি**—মানসিক বা শারীরিক প্রতিবন্ধীর উন্নয়ন ও পুনর্বাসন নিশ্চিত করিবার লক্ষ্যে কারা কর্তৃপক্ষ যথাযথ ব্যবস্থা গ্রহণ করিবে।

৫৬। **মানসিকভাবে অসুস্থ বন্দি**—(১)কোনো বন্দি কারাগারের অভ্যন্তরে প্রবেশের সময় মানসিকভাবে অসুস্থ থাকিলে বন্দি কারাগারে আসিবার অনতিবিলম্বে মেডিক্যাল অফিসারের প্রত্যয়নের ভিত্তিতে তাহার চিকিৎসার উদ্যোগ গ্রহণ করিতে হইবে।

(২) কারাগারে অবস্থানকালে কোনো বন্দির মানসিক রোগের লক্ষণ দেখা দিলে কারা কর্তৃপক্ষ—

(ক) কারা অভ্যন্তরে চিকিৎসার ব্যবস্থা গ্রহণ করিবে :

তবে শর্ত থাকে যে, কারাগারে উক্ত বন্দির চিকিৎসা সেবা পর্যাপ্ত না হইলে মেডিক্যাল অফিসারের প্রত্যয়নসাপেক্ষে কারাগারের বাহিরে চিকিৎসার ব্যবস্থা করা যাইবে, যাহা বিধি দ্বারা নির্ধারিত পদ্ধতিতে, রেজিস্টারে লিপিবদ্ধ করিতে হইবে।

(খ) সংশ্লিষ্ট আদালতকে অবহিত করিবে।

(৩) মানসিক রোগে অসুস্থ বন্দির ক্ষেত্রে—

(ক) কারা কর্তৃপক্ষের আচরণ হইবে, মানবিক ও যত্নশীল; এবং

(খ) তাহাকে অন্যান্য বন্দি হইতে পৃথক রাখিতে হইবে।

**৫৭। দুর্ঘটনায় আহত, মহামারি ইত্যাদিতে অসুস্থ—**(১) কোনো দুর্ঘটনায় বন্দি গুরুতর আহত বা প্রাকৃতিক দুর্যোগ, মহামারির প্রাদুর্ভাব ইত্যাদি বা অন্য কোনো কারণে বন্দির অস্বাভাবিক ও ব্যতিক্রমী অসুস্থতা দেখা দিলে মেডিক্যাল অফিসার অনতিবিলম্বে কারা কর্তৃপক্ষকে অবহিত করিবেন এবং বিধি দ্বারা নির্ধারিত পদ্ধতি অনুসরণপূর্বক, যথাযথ ব্যবস্থা গ্রহণ করিবেন :

তবে শর্ত থাকে যে, বিধি প্রণীত না হওয়া পর্যন্ত কারা কর্তৃপক্ষ আদেশ দ্বারা যথাযথ ব্যবস্থা গ্রহণ করিতে পারিবেন।

**৫৮। বিদেশি বন্দি—**(১) বিদেশি বন্দি অন্যান্য সকল বন্দির জন্য প্রযোজ্য সুযোগ-সুবিধার অধিকারী হইবেন।

(২) কারা কর্তৃপক্ষ বিদেশি বন্দিকে নিম্নবর্ণিত বিষয়াবলি অবগত করিবেন, তিনি—

(ক) তাহার রাষ্ট্রের কূটনীতিক, দূতাবাস বা কনস্যুলার প্রতিনিধি, আইনজীবী ও আত্মীয় যদি থাকে, তাঁহাদের সহিত সরকারের অনুমোদনসাপেক্ষে যোগাযোগ বা সাক্ষাৎ করিবার সুযোগ পাইবেন :

তবে শর্ত থাকে যে, যেক্ষেত্রে কোনো বিদেশি বন্দির বাংলাদেশে কোনো দূতাবাস বা কনস্যুলার প্রতিনিধি না থাকে বা যাহারা অভিবাসী, উদ্ভাস্তু কিংবা রাষ্ট্রহীন, সেইক্ষেত্রে সরকার অনুমোদিত মানবাধিকার সংগঠন অথবা জাতীয় বা আন্তর্জাতিক বেসরকারি সংস্থা উক্ত বন্দিকে সহায়তা প্রাদান করিতে পারিবে।

(খ) দণ্ডপ্রাপ্ত হইলে তাহার দণ্ড স্থায়ী দেশে ভোগের আবেদন করিতে পারিবে, যাহা সরকার কর্তৃক বিবেচিত হইবে;

(গ) কারাদণ্ডের সহিত অর্থদণ্ডে দণ্ডিত হইয়া থাকিলে এবং বন্দি বিনিময় চুক্তিতে ভিন্নরূপ কিছু না থাকিলে বা সরকার কর্তৃক কোনো শর্তারোপ করা না হইলে সংশ্লিষ্ট বন্দি স্থায়ী দেশে স্থানান্তরিত হইবার পূর্বে অর্থদণ্ডের সমপরিমাণ অর্থ উক্ত দেশের দূতাবাস, কনস্যুলার ইত্যাদির মাধ্যমে জমা করিতে বাধ্য থাকিবেন।

(৩) সাজার মেয়াদ অতিক্রান্ত মুক্তিপ্রাপ্ত বিদেশি বন্দি মুক্তি লাভের পর হইতে স্বদেশ প্রত্যাবর্তনের পূর্ব পর্যন্ত কারাগার বা এই উদ্দেশ্যে স্থাপিত সরকার কর্তৃক কোনো নিরাপদ হেফাজতে অবস্থান করিবেন।

**৫৯। মৃত্যুদণ্ডপ্রাপ্ত বন্দি—**(১) কারাগারে প্রেরণের পর অনতিবিলম্বে মৃত্যুদণ্ডপ্রাপ্ত বন্দিকে যথাযথভাবে তল্লাশি করা হইবে এবং বন্দির হেফাজতে থাকা নিরাপত্তাহানিকর, অবৈধ ও অপ্রয়োজনীয় দ্রব্যাদি কারা কর্তৃপক্ষের হেফাজতে গ্রহণ করা হইবে।

(২) মৃত্যুদণ্ডপ্রাপ্ত বন্দির আবাসন, হেফাজত, সুরক্ষা, নিরাপত্তা, যত্ন, সাক্ষাৎ, যোগাযোগ ইত্যাদি বিধি দ্বারা নির্ধারিত হইবে।

(৩) মৃত্যুদণ্ডপ্রাপ্ত বন্দিকে—

(ক) অন্যান্য বন্দি হইতে পৃথক সেলে অন্তরিন রাখা হইবে এবং উক্ত বন্দি নির্ধারিত প্রাঞ্জলের বাহিরে যাইবার অধিকারী হইবে না :

তবে শর্ত থাকে যে, নিরাপত্তা নিশ্চিতসাপেক্ষে, বিশেষ প্রয়োজনে তাহাকে ওয়ার্ডে রাখা যাইতে পারে।

(খ) শৃঙ্খলা, নিরাপত্তা ও সুরক্ষার বিধানসাপেক্ষে, বিধি দ্বারা অনুমোদিত, কার্যাবলির সুযোগ প্রদান করা হইবে।

(৪) কোনো বন্দির মৃত্যুদণ্ড কার্যকর করা হইবে না, যদি—

(ক) উক্ত বন্দি মানসিক রোগে আক্রান্ত হইয়া থাকে;

(খ) The Code of Criminal Procedure, 1898-এর section 374 ও section 376-এর বিধান-অনুসারে উক্ত মৃত্যুদণ্ডদেশ নিশ্চিত করা না হইয়া থাকে;

(গ) উক্ত মৃত্যুদণ্ডদেশ-সংক্রান্ত আপিল বা অন্য কোনো আইনি প্রক্রিয়া অথবা ক্ষমা প্রার্থনার আবেদন নিষ্পত্তির অপেক্ষায় থাকে;

(ঘ) নারী বন্দির ক্ষেত্রে দফা (ক) হইতে দফা (গ)-তে বর্ণিত বিধানের অতিরিক্ত হিসাবে নিম্নবর্ণিত শর্তাবলিও প্রযোজ্য হইবে, যদি—

(অ) উক্ত নারী সন্তানসম্ভবা হইয়া থাকেন; অথবা

(আ) উক্ত নারী স্তন্যদানকারী মাতা হইয়া থাকেন।

(৫) মৃত্যুদণ্ড কার্যকরসংক্রান্ত পদ্ধতি, সময়সীমা ও অন্যান্য বিষয় বিধি দ্বারা নির্ধারিত হইবে।

**৬০। আমৃত্যু কারাদণ্ডপ্রাপ্ত বন্দির বিশেষ ব্যবস্থা—**আমৃত্যু কারাদণ্ডপ্রাপ্ত বন্দির কারা ব্যবস্থাপনা ও অন্যান্য বিষয় বিধি দ্বারা নির্ধারিত হইবে।

**৬১। কারাগারে মৃত্যু—**(১) কারাগারে কোনো বন্দির মৃত্যু ঘটিলে বা আত্মহত্যা করিলে মেডিক্যাল অফিসার বা সংশ্লিষ্ট কর্মচারী অনতিবিলম্বে বিষয়টি সুপারিনটেনডেন্টকে অবহিত করিবেন;

(২) উপধারা (১) অনুসারে অবহিত হইবার পর সুপারিনটেনডেন্ট বিষয়টি তাৎক্ষণিক কারা মহাপরিদর্শক, সংশ্লিষ্ট আদালত, সরকার ও জেলা ম্যাজিস্ট্রেটকে অবহিত করিয়া নিম্নলিখিত ব্যবস্থা গ্রহণ করিবেন—

(ক) মৃত দেহের সুরতহাল;

(খ) মৃত দেহের ময়না তদন্ত (প্রযোজ্যক্ষেত্রে);

(গ) মৃত্যুর সংবাদ উক্ত বন্দির নিকট-আত্মীয় বা বন্দি কর্তৃক পূর্ব নির্ধারিত ব্যক্তি বা বিদেশি বন্দির ক্ষেত্রে সংশ্লিষ্ট দূতাবাসকে অবহিতকরণ; এবং

(ঘ) ধর্মীয় বিধান, সামাজিক ও সাংস্কৃতিক রীতি এবং মানবিক মর্যাদা অনুসরণ করিয়া স্বজনদের নিকট হস্তান্তর অথবা সরকারিভাবে সংকার।

(৩) মৃত্যু সনদপত্রে স্বাভাবিক মৃত্যু উল্লেখ থাকিলে এবং মৃতের আত্মীয়-স্বজন লিখিত আবেদন করিলে, জেলা ম্যাজিস্ট্রেটের অনুমোদনসাপেক্ষে, সুরতহাল সম্পন্ন করিয়া ময়না তদন্ত ব্যতিরেকে মৃতদেহ হস্তান্তর করা যাইতে পারে।

(৪) মৃত্যু সনদপত্রে অস্বাভাবিক মৃত্যু উল্লেখ থাকিলে আইনানুসারে প্রয়োজনীয় ব্যবস্থা গ্রহণ করা হইবে।

**৬২। কারাবন্দির আত্মহত্যা—**(১) বন্দি আত্মহত্যার ক্ষেত্রে সুপারিনটেনডেন্ট প্রাথমিক তদন্ত করিয়া তদন্ত প্রতিবেদন কারা উপ-মহাপরিদর্শক এবং জেলা ম্যাজিস্ট্রেট বরাবর প্রেরণ করিবেন।

(২) উপধারা (১)-এর অতিরিক্ত হিসাবে বিচারাধীন বন্দি আত্মহত্যা করিলে বিষয়টি সংশ্লিষ্ট আদালতকে অবগত করিতে হইবে।

**৬৩। কারাবন্দির মৃত্যুসম্পর্কিত তথ্যাবলি লিপিবদ্ধকরণ—**কারা অভ্যন্তরে কোনো বন্দির মৃত্যু ঘটিলে বা কোনো বন্দি আত্মহত্যা করিলে, মেডিক্যাল অফিসার অবিলম্বে বিষয়টি নির্ধারিত রেজিস্টারে লিপিবদ্ধ করিবেন, যাহাতে, যতদূর সম্ভব নিম্নবর্ণিত, তথ্যাবলি অন্তর্ভুক্ত করিতে হইবে, যথা :

(ক) অসুস্থতা, আত্মহত্যা বা অন্য কোনো কারণে মৃত্যুর ধরন;

(খ) মৃত বন্দি কর্তৃক অসুস্থতা বিষয়ে প্রথম অবহিতকরণ অথবা বিষয়টি অবগত হইবার তারিখ ও সময়;

(গ) আত্মহত্যাজনিত বিষয়টি অবগত হইবার তারিখ ও সময়;

(ঘ) বন্দি মৃত্যুর দিন যে কাজে নিযুক্ত ছিলেন, প্রযোজ্যক্ষেত্রে;

(ঙ) মৃত্যুর দিন মৃত বন্দি যে খাবার গ্রহণ করিয়াছিলেন উহার ধরন ও পরিমাণ;

(চ) মেডিক্যাল অফিসার কর্তৃক বন্দির অসুস্থ হইবার বিষয়ে প্রথম অবগত হইবার তারিখ ও সময়;

(ছ) রোগের ধরন বা আত্মহত্যার প্রক্রিয়া ও অন্যান্য ধরন;

(জ) হাসপাতালে ভর্তি হইবার সময় ও তারিখ, প্রযোজ্যক্ষেত্রে;

(ঝ) বন্দিকে বাহিরের কোনো হাসপাতালে পাঠানো হইয়াছিল কি না, প্রযোজ্যক্ষেত্রে;

(ঞ) বন্দিকে প্রদত্ত চিকিৎসার বিবরণ;

(ট) বন্দিকে তাহার মৃত্যুর আগে মেডিক্যাল অফিসার বা স্বাস্থ্যসহায়ক কর্মচারী কর্তৃক সর্বশেষ স্বাস্থ্য পরীক্ষার সময়;

(ঠ) বন্দির মৃত্যুর সময় ও তারিখ;

(ড) সুরতহালসম্পর্কিত বিবরণ;

(ঢ) ময়না তদন্ত সম্পন্ন হইয়া থাকিলে এই সম্পর্কিত বিবরণ; এবং

(ণ) বিধি দ্বারা নির্ধারিত অন্যান্য তথ্য।

**৬৪। যৌন হয়রানি প্রতিরোধ কমিটি—**(১) প্রত্যেক কারাগারে ন্যূনতম ৫ (পাঁচ) সদস্যবিশিষ্ট একটি যৌন হয়রানি প্রতিরোধ কমিটি থাকিবে।

- (২) উপধারা (১) অনুসারে গঠিত কমিটির পুরুষ-নারী সদস্যসংখ্যা বন্দি ও কর্মচারীর আনুপাতিক হারে নির্ধারিত হইবে।
- (৩) কোনো বন্দি বা কারা কর্মচারী ও কর্মকর্তা কর্তৃক যৌন হয়রানি কিংবা সহিংসতার অভিযোগ উত্থাপিত হইলে যৌন হয়রানি প্রতিরোধ কমিটি বিধি নির্ধারিত অন্যান্য কার্যের পাশাপাশি অভিযোগের সত্যানুসন্ধান ও শুনানি করিবেন :
- তবে শর্ত থাকে যে, অভিযোগ দায়েরের সর্বোচ্চ ৩০ (ত্রিশ) দিনের মধ্যে অভিযোগের তদন্ত সম্পন্ন করিতে হইবে।
- (৪) অভিযোগ প্রমাণিত হইলে যৌন হয়রানি প্রতিরোধ কমিটির সুপারিশের ভিত্তিতে সংশ্লিষ্ট অভিযুক্তের বিরুদ্ধে যথাযথ আইনানুগ ব্যবস্থা গ্রহণ করা হইবে।

## পঞ্চম অধ্যায়

### কারাগারের শৃঙ্খলা ও নিরাপত্তা

- ৬৫। শৃঙ্খলার সাধারণ নিয়মাবলি— শৃঙ্খলার সাধারণ নিয়মাবলির মধ্যে নিয়মানুবর্তিতা, সময়ানুবর্তিতা, নিরাপত্তা ও সুরক্ষার বিষয়াবলি অন্তর্ভুক্ত হইবে।
- ৬৬। কারাগারের নিরাপত্তা ও সুরক্ষা—(১) কারা কর্তৃপক্ষ কর্তৃক শৃঙ্খলা পরিপন্থি কার্যাবলি প্রতিরোধ, বন্দির পলায়ন রোধ, বন্দি কর্তৃক নিজের বা অন্যের ক্ষতি করিবার সম্ভাবনা রোধ ইত্যাদি অন্যান্য বিষয় বিবেচনাক্রমে কার্যকর ও গতিশীল নিরাপত্তা ব্যবস্থা নিশ্চিত করিতে হইবে।
- (২) ঝুঁকি ও চাহিদা নিরূপণ কমিটি কর্তৃক বন্দির নিরাপত্তা বা সুরক্ষা ঝুঁকি নির্ধারণ করিতে হইবে এবং ঝুঁকি নির্ধারণকালে উক্ত কমিটি অন্যান্য বিষয়ের সহিত নিম্নবর্ণিত বিষয়াবলি বিবেচনা করিবে, যথা :
- (ক) অপরাধ ও পুনঃঅপরাধ প্রবণতা ও মাত্রা;
- (খ) পলায়নের অতীত ইতিহাস;
- (গ) মাদকাসক্তি এবং মানসিক ভারসাম্যহীনতার মাত্রা;
- (ঘ) কারা অপরাধের সংখ্যা ও মাত্রা; এবং
- (ঙ) বিধি দ্বারা নির্ধারিত অন্যান্য বিষয়।
- (৩) প্রত্যেক কারাগার কি-পয়েন্ট ইন্সটলেশন (কেপিআই) এলাকা হিসাবে গণ্য হইবে।
- [ব্যাখ্যা : কি-পয়েন্ট ইন্সটলেশন (কেপিআই) অর্থে সরকার কর্তৃক, সময়ে সময়ে, জারিকৃত কি-পয়েন্ট ইন্সটলেশন (কেপিআই) নিরাপত্তা নীতিমালাতে উল্লিখিত কেপিআই-কে বুঝাইবে।]
- (৪) প্রত্যেক কারাগার উড্ডয়নমুক্ত এলাকা হিসাবে গণ্য হইবে।
- (৫) কারাগারের নিরাপত্তা ও সুরক্ষা নিশ্চিত করিতে বিধি দ্বারা নিম্নবর্ণিত বিষয়াবলি নির্ধারিত হইবে, যথা :



(ক) কারাগারের সীমানা প্রাচীরের উচ্চতা ও ধরন, প্রাচীর হইতে নির্দিষ্ট দূরত্বের মধ্যে বহুতল ভবন নির্মাণের বিধি-নিষেধ;

(খ) কারাগারের প্রবেশ দ্বার-এর নিরাপত্তা ব্যবস্থা;

(গ) বন্দি, কারা কর্মকর্তা ও কর্মচারী, পরিদর্শনকারী এবং দর্শনার্থীদের সার্বক্ষণিক নিরাপত্তা ব্যবস্থা;

(ঘ) সুরক্ষা পরিকল্পনা প্রণয়ন ও বাস্তবায়ন প্রক্রিয়া, প্রয়োজনে, কোনো বন্দির জন্য আবশ্যিক হইলে বিশেষ সুরক্ষা ব্যবস্থা; এবং

(ঙ) নিরাপত্তা ও সুরক্ষাসম্পর্কিত আনুষঙ্গিক বিষয়াদিসহ অন্যান্য বাহিনীর সহিত সমন্বয় সাধন।

(৬) কারাগারের নিরাপত্তা অথবা সুরক্ষার জন্য অনিবার্য হুমকির আশঙ্কা থাকিলে অথবা কারা অভ্যন্তরে বিদ্রোহ, দাঙ্গা, জিম্মি অথবা অন্য যে-কোনো কারণে কারা সুরক্ষা ও নিরাপত্তা বিঘ্নিত হইলে, কারা কর্তৃপক্ষ—

(ক) যথাযথ ব্যবস্থা গ্রহণ করিবেন এবং প্রয়োজনে, আইন-শৃঙ্খলা রক্ষাকারী বাহিনীসহ অন্যান্য সংশ্লিষ্ট সংস্থার সহায়তা চাহিতে পারিবেন এবং উহারা অনতিবিলম্বে প্রয়োজনীয় সহায়তা প্রদান করিবেন; এবং

(খ) বিষয়টি কারা মহাপরিদর্শনসহ অন্যান্য সংশ্লিষ্ট কর্তৃপক্ষকে অবহিত করিবে।

**৬৭। বন্দি পৃথকীকরণ—**(১) কারা কর্তৃপক্ষ বা দায়িত্বপ্রাপ্ত কর্মকর্তা কোনো বন্দিকে নিম্নবর্ণিত ক্ষেত্রে অন্যান্য বন্দি হইতে পৃথক করিয়া একক সেল বা কক্ষে রাখিবার নির্দেশ প্রদান করিতে পারিবেন, যেক্ষেত্রে—

(ক) বন্দির বিরুদ্ধে শাস্তিমূলক ব্যবস্থা গৃহীত হইয়াছে;

(খ) বন্দির নিরাপত্তা বিঘ্নিত হইতে পারে;

(গ) অন্যান্য বন্দির সহিত উক্ত বন্দির অবস্থান কারাগারের শৃঙ্খলা ও সুরক্ষা বিঘ্ন করিতে পারে;

(ঘ) বন্দিকে স্বাস্থ্যগত কারণে পৃথকীকরণের জন্য মেডিক্যাল অফিসার কর্তৃক এইরূপ ব্যবস্থাপত্র প্রদান করা হইয়াছে;

(ঙ) বন্দি সহিংস আচরণ করে বা সহিংসতার হুমকি প্রদান করে; এবং

(চ) অন্য কোনো কারণে সুপারিনটেনডেন্ট কর্তৃক নির্দেশনা প্রদান করা হইয়া থাকে।

(২) কারাগারে পৃথকীকরণ অবস্থায় আটক বন্দির ক্ষেত্রে—

(ক) সার্বক্ষণিক নিরাপত্তা নিশ্চিত করা হইবে;

(খ) জেলার অথবা দায়িত্বপ্রাপ্ত কর্মকর্তা এবং মেডিক্যাল অফিসার দিনে ন্যূনতম একবার তাঁহাকে পরিদর্শন করিবেন;

(গ) পরিদর্শনকালে মেডিক্যাল অফিসারের নিকট যদি প্রতীয়মান হয় যে, পৃথকীকরণ অব্যাহত রাখিলে উক্ত বন্দির স্বাস্থ্যের অবনতি ঘটিতে পারে, সেইক্ষেত্রে কারা কর্তৃপক্ষ বা দায়িত্বপ্রাপ্ত কর্মকর্তা পৃথকীকরণ আদেশ প্রত্যাহার করিবেন এবং অনতিবিলম্বে উক্ত বন্দিকে পৃথক অবস্থা হইতে পূর্বের অবস্থায় ফেরত পাঠাইতে হইবে।

(ঘ) উপধারা (১) দফা (ঙ)-এ বর্ণিত পৃথকীকরণ ডেপুটি জেলারের পদমর্যাদার নিম্নে নহে এইরূপ কর্মকর্তা করিতে পারিবে না।

(৩) শাস্তি হিসাবে পৃথকীকরণ ৭ (সাত) দিনের অধিক হইবে না :

তবে শর্ত থাকে যে, পৃথকীকরণ আদেশ বর্ধিত করা আবশ্যিক বলিয়া সুপারিনটেনডেন্ট-এর নিকট প্রতীয়মান হইলে এবং উক্তরূপ বর্ধিতকরণের ফলে বন্দির স্বাস্থ্য ঝুঁকিপূর্ণ হইবে না মর্মে মেডিক্যাল অফিসার কর্তৃক প্রত্যয়িত হইলে সুপারিনটেনডেন্ট উক্ত পৃথকীকরণ আদেশ ক্রমাগতভাবে সর্বোচ্চ ৩০ (ত্রিশ) দিন পর্যন্ত বর্ধিত করিতে পারিবেন।

(৪) এই ধারার উদ্দেশ্য পূরণকল্পে, দায়িত্বপ্রাপ্ত কর্মকর্তা কর্তৃক পৃথকীকরণ বা উহা প্রত্যাহারের আদেশ প্রদান করা হইলে উক্ত কর্মকর্তা অনতিবিলম্বে বিষয়টি সুপারিনটেনডেন্টকে অবহিত করিবেন এবং সুপারিনটেনডেন্ট উক্ত আদেশ চূড়ান্ত করিবার বিষয়ে সিদ্ধান্ত প্রদান করিবেন।

**৬৮। বন্দি স্থানান্তর**—(১) কারা কর্তৃপক্ষ, প্রয়োজনে, বন্দিকে এক কারাগার হইতে অন্য কারাগারে কিংবা অন্য কোনো স্থানে বা হাসপাতালে পুলিশের সহযোগীতায় স্থানান্তর করিতে পারিবে।

(২) আদালতের নির্দেশনা বা মামলার তারিখ অনুসারে কারা কর্তৃপক্ষ পুলিশের সহযোগীতায় বন্দিকে সংশ্লিষ্ট আদালতে হাজিরের নিমিত্ত স্থানান্তর করিবেন।

(২) বন্দি স্থানান্তরের ক্ষেত্রে কারা কর্তৃপক্ষ কর্তৃক নিম্নরূপ ব্যবস্থা গ্রহণ করিতে হইবে, যথা :

(ক) স্থানান্তরের পূর্বে মেডিক্যাল অফিসার কর্তৃক বন্দির স্বাস্থ্য পরীক্ষা এবং স্থানান্তরের বিষয়টি মেডিক্যাল অফিসার কর্তৃক অনুমোদিত হওয়া;

(খ) নিরাপত্তা ও সুরক্ষার যাবতীয় সকল ব্যবস্থা গ্রহণ করা এবং প্রয়োজনে, অন্যান্য আইন শৃঙ্খলা রক্ষাকারী বাহিনীর সহায়তা গ্রহণ করা;

(গ) বন্দি পরিবহণের জন্য ব্যবহৃত যানবাহনে যথেষ্ট পরিমাণে স্থান সংকুলান, বায়ু চলাচল এবং আলোর ব্যবস্থা রাখা;

(ঘ) বন্দির গোপনীয়তা নিশ্চিত করা, তাহাদের জনসাধারণের দৃষ্টিসীমার বাহিরে রাখা, অসম্মান বা অবমাননাকর পরিস্থিতি থেকে বিরত রাখা; এবং

(ঙ) বিধি দ্বারা নির্ধারিত অন্যান্য ব্যবস্থা অনুসরণ করা।

**৬৯। বল প্রয়োগের ক্ষেত্র ও শর্তসমূহ**—(১) সুপারিনটেনডেন্ট-এর অনুমোদনসাপেক্ষে নিম্নবর্ণিত যে-কোনো ক্ষেত্রে বন্দির উপর বল প্রয়োগ করা যাইবে, যথা :

(ক) কারা কর্মকর্তা বা কর্মচারীর আত্মরক্ষা;

(খ) পলায়নের চেষ্টারত কোনো বন্দিকে নিবৃত্ত করা;

(গ) দাঙ্গা ও মারামারি প্রতিরোধ;

(ঘ) সম্পদ বিনষ্ট করা হইতে বন্দিকে বিরত রাখা;

- (ঙ) নিজেৰ জন্য ক্ষতিকৰ হইতে পারে এইরূপ কোনো কাজ হইতে বন্দিকে বিরত রাখা;
- (চ) কাৰা কৰ্তৃপক্ষের কোনো আদেশ প্রতিপালনে প্রত্যক্ষ বা পরোক্ষভাবে প্রতিবন্ধকতা তৈরি করা;
- (ছ) অন্যান্য বন্দি, পরিদর্শনকারী, দর্শনার্থী বা কাৰাগারে আগত অন্য কোনো ব্যক্তিৰ সুরক্ষা ও নিরাপত্তা রক্ষার্থে; বা
- (জ) অন্য যে-কোনো কারণে কোনো বন্দি দ্বারা কাৰাগারেৰ নিরাপত্তা, সুরক্ষা ও শৃঙ্খলা পরিস্থিতিৰ অবিৰতি ঘটিলে বা ঘটিবার আশঙ্কা দেখা দিলে।

- (২) সুপারিনটেনডেন্ট-এৰ অনুমোদন গ্রহণ সময়সাপেক্ষ হইলে এবং উপধাৰা (১)-এ বৰ্ণিত উদ্ভূত পরিস্থিতি দায়িত্বৰত কৰ্মকৰ্তাৰ নিয়ন্ত্ৰণেৰ বাহিৰে চলিয়া যাইবাব সম্ভাবনা থাকিলে উক্তরূপ পরিস্থিতি জৰুরি ভিত্তিতে নিয়ন্ত্ৰণে আনিবাব লক্ষ্যে দায়িত্বপ্রাপ্ত কৰ্মকৰ্তা বল প্রয়োগেৰ ক্ষেত্রে এইরূপ আদেশ প্রদান কৰিতে পারিবে, যাহা সুপারিনটেনডেন্ট উপস্থিত থাকিলে কৰিতেন এবং অনতিবিলম্বে তৎকৰ্তৃক প্রদত্ত আদেশেৰ বিষয়টি সুপারিনটেনডেন্টকে অবহিত কৰিবেন।
- (৩) বল প্রয়োগসংক্রান্ত সকল ঘটনা সুপারিনটেনডেন্ট লিখিতভাবে কাৰা উপমহাপরিদৰ্শক এবং ক্ষেত্ৰমতো, কাৰা মহাপরিদৰ্শক-কে অবহিত কৰিবেন।
- (৪) বল প্রয়োগসংক্রান্ত ঘটনাসংবলিত পূৰ্ণাঙ্গ নথি কাৰা কৰ্তৃপক্ষ কৰ্তৃক লিপিবদ্ধ, সজ্জিত ও সংৰক্ষিত হইতে হইবে।

**৭০। যান্ত্ৰিক প্রতিবন্ধকতা আৰোপ—**(১) সন্তানসম্ভবা নারী, সদ্য সন্তান প্রসবকাৰী নারী ও ৬ (ছয়) মাস পর্যন্ত স্তন্যদায়ী নারী বন্দি ব্যতীত ধাৰা ৬৯-এৰ উপধাৰা (১)-এ বৰ্ণিত বল প্রয়োগেৰ ক্ষেত্রে বন্দিৰ উপৰ সৰ্বোচ্চ ২৪ (চব্বিশ) ঘণ্টাৰ জন্য যান্ত্ৰিক প্রতিবন্ধকতা আৰোপ কৰা যাইতে পারে :

তবে শর্ত থাকে যে, যান্ত্ৰিক প্রতিবন্ধকতা আৰোপেৰ আদেশ বৰ্ধিত কৰা আবশ্যিক বলিয়া সুপারিনটেনডেন্ট-এৰ নিকট প্রতীয়মান হইলে এবং উক্তরূপ বৰ্ধিতকৰণেৰ ফলে বন্দিৰ স্বাস্থ্য ঝুঁকিপূৰ্ণ হইবে না মৰ্মে মেডিক্যাল অফিসাৰ কৰ্তৃক প্রত্যয়িত হইলে সুপারিনটেনডেন্ট উক্ত ২৪ (চব্বিশ) ঘণ্টাৰ সময়সীমা ৩ (তিন) মাস পর্যন্ত বৰ্ধিত কৰিতে পারিবেন।

- (২) এই ধাৰাৰ উদ্দেশ্য পূৰণকল্পে ‘যান্ত্ৰিক প্রতিবন্ধকতা’ অৰ্থে এতদুদ্দেশ্যে অনুমোদিত আধুনিক সরঞ্জামাদি অন্তর্ভুক্ত কৰা হইবে।
- (৩) যান্ত্ৰিক প্রতিবন্ধকতা আৰোপ এবং এতৎসংশ্লিষ্ট আনুষঙ্গিক বিধানাবলি বিধি দ্বারা নিৰ্ধাৰিত হইবে।

**৭১। লাঠি ও প্রাণঘাতী নহে এমন অস্ত্ৰেৰ ব্যবহার—**(১) আসন্ন সহিংসতাৰ ঝুঁকি রহিয়াছে এইরূপ পরিস্থিতিৰ উদ্ভব হইলে অথবা ক্ৰমাগতভাবে সহিংসতা চলিতে থাকিলে উক্তরূপ সহিংসতা প্রতিৰোধকল্পে দায়িত্বপ্রাপ্ত কৰ্মকৰ্তা উদ্ভূত পরিস্থিতিৰ ঝুঁকি ও বিপদেৰ সহিত সামঞ্জস্যপূৰ্ণ লাঠি ও প্রাণঘাতী নহে এইরূপ অস্ত্ৰ ব্যবহাৰ কৰিতে পারিবেন এবং গৃহীত ব্যবস্থাসম্পর্কিত প্রতিবেদন সংশ্লিষ্ট নথিতে লিপিবদ্ধ ও সংৰক্ষিত কৰিতে হইবে।

- (২) উপধাৰা (১)-এৰ বিধান-অনুসারে লাঠি ও প্রাণঘাতী নহে এইরূপ অস্ত্ৰ ব্যবহাৰজনিত বন্দি আহত বা জখম হইলে উক্ত বন্দিকে স্বাস্থ্য পরীক্ষা ও প্রয়োজনীয় চিকিৎসা প্রদান কৰিতে হইবে।

৭২। আশ্রয়প্রাপ্ত ব্যবহার—(১) এই ধারার বিধানসাপেক্ষে দায়িত্বপ্রাপ্ত কর্মকর্তা জরুরি অবস্থায় নিম্নবর্ণিত ক্ষেত্রে আশ্রয়প্রাপ্ত ব্যবহার করিতে পারিবেন, যথা :

- (ক) নিজের, অন্যান্য কারা কর্মকর্তা-কর্মচারী কিংবা বন্দির আক্রমণ প্রতিরোধে বা প্রাণ রক্ষার্থে আবশ্যিকীয় হইলে;
- (খ) সহিংস বন্দি বিদ্রোহ দমন বা জিম্মি পরিস্থিতি নিয়ন্ত্রণ ও উদ্ধারে;
- (গ) কারাগার হইতে অথবা এসকট-এর অধীনে থাকা অবস্থায় কোনো বন্দি পলায়নের চেষ্টা করিলে এবং ইহার কারণে অন্যান্যদের প্রাণনাশের হুমকি দেখা দিলে; এবং
- (ঘ) ধারা ৬৯, ৭০ ও ৭১-এর বিধান প্রয়োগ করিয়া পরিস্থিতি নিয়ন্ত্রণ করা সম্ভব না হইলে।

(২) উপধারা (১)-এর বিধান-অনুসারে আশ্রয়প্রাপ্ত ব্যবহারজনিত বন্দি আহত বা জখম হইলে উক্ত বন্দিকে স্বাস্থ্য পরীক্ষা ও প্রয়োজনীয় চিকিৎসা প্রদান করিতে হইবে।

(৩) উপধারা (১)-এর বিধান-অনুসারে গৃহীত ব্যবস্থাসম্পর্কিত প্রতিবেদন সংশ্লিষ্ট নথিতে লিপিবদ্ধ ও সংরক্ষিত করিতে হইবে এবং উক্ত প্রতিবেদনের অনুলিপি সরকার, কারা মহাপরিদর্শক ও জেলা ম্যাজিস্ট্রেট বরাবরে প্রেরণ করিতে হইবে।

৭৩। কারাবন্দির তল্লাশি—কারা কর্তৃপক্ষ নিয়মিত বা আকস্মিকভাবে পরিদর্শনকালে অথবা কোনো বন্দির দখলে অবৈধ বস্তু বা দ্রব্য রহিয়াছে মর্মে কারা কর্তৃপক্ষের নিকট গোচরীভূত হইলে বা বিশ্বাস করিবার কারণ থাকিলে বন্দির দেহ এবং প্রয়োজনে, শয়নস্থান, বিছানাপত্র ইত্যাদি তল্লাশি করিতে পারিবে :

তবে শর্ত থাকে যে, বন্দির শয়নস্থান ও বিছানাপত্র তল্লাশিকালে বন্দির ব্যক্তিগত সম্পত্তির কোনোরূপ ক্ষতি সাধন করা যাইবে না।

৭৪। কারাগার এলাকার তল্লাশি—সুপারিনটেনডেন্ট-এর নির্দেশক্রমে দায়িত্বপ্রাপ্ত কর্মকর্তা যে-কোনো সময় বা নির্দেশিত মতে কারাগার এলাকা বা উহার অংশবিশেষ তল্লাশি করিতে পারিবে এবং এই সম্পর্কিত প্রতিবেদন সংশ্লিষ্ট নথিতে লিপিবদ্ধ ও সংরক্ষিত করিতে হইবে এবং উহার অনুলিপি সুপারিনটেনডেন্টকে প্রদান করিতে হইবে।

৭৫। কারা কর্মচারীদের তল্লাশি—কারা কর্তৃপক্ষ কারা কর্মচারীদের কারাগারে প্রবেশ বা প্রস্থানের সময় দেহ তল্লাশি করিবে:

তবে শর্ত থাকে যে, কোনো কারা কর্মচারীর দখলে অবৈধ বস্তু বা দ্রব্য রহিয়াছে মর্মে কারা কর্তৃপক্ষের নিকট গোচরীভূত হইলে বা বিশ্বাস করিবার কারণ থাকিলে উক্ত কারা কর্মচারীকে বিশেষভাবে তল্লাশি করা যাইবে।

৭৬। দর্শনার্থী ও কারাগার এলাকায় আগত ব্যক্তির তল্লাশি, জন্ম ইত্যাদি—(১) দায়িত্বপ্রাপ্ত কর্মকর্তা নিজে বা সমলিঙ্গের কর্মকর্তা-কর্মচারী কর্তৃক কারাগারে আগত দর্শনার্থী অথবা কারা এলাকায় আগত ব্যক্তির দেহ ও তাহার সহিত থাকা বস্তুর তল্লাশি করিতে পারিবেন।

(২) দর্শনার্থীর তল্লাশিকালে তাহার পারিবারিক ও সামাজিক মান-মর্যাদা এবং দর্শনার্থী হিসাবে আগত শিশুর তল্লাশি সংবেদনশীলভাবে করিতে হইবে।

(৩) উপধারা (১) ও উপধারা (২) অনুসারে তল্লাশিকালে দায়িত্বপ্রাপ্ত কর্মকর্তা দর্শনার্থীর সহিত থাকা বস্তু নিজ হেফাজতে গ্রহণ করিবেন এবং কারাগার ত্যাগকালে ফেরত প্রদান করিবেন :

তবে শর্ত থাকে যে, তল্লাশিকালে সংগৃহীত বস্তু দেশের প্রচলিত আইন-অনুসারে নিষিদ্ধ হইলে উহা তাৎক্ষণিকভাবে জব্দ করিয়া উক্ত দর্শনার্থীর বিরুদ্ধে আইনানুগ ব্যবস্থা গৃহীত হইবে এবং জব্দকৃত বস্তুসহ উক্ত দর্শনার্থীকে আইনশৃঙ্খলা রক্ষাকারী বাহিনীর নিকট হস্তান্তর করিতে হইবে।

(৪) নিষিদ্ধ বস্তু এবং দর্শনার্থী কর্তৃক অনুমোদিত বা গ্রহণযোগ্য নহে এইরূপ বস্তু ও কর্মকাণ্ডের তালিকা, যতদূর সম্ভব কারা এলাকায় সহজে দৃষ্টিগোচর হয় এইরূপ স্থানে নোটিশ বোর্ডে বা অন্য কোনোভাবে প্রদর্শন করিতে হইবে।

(৫) কোনো দর্শনার্থী দায়িত্বপ্রাপ্ত কর্মকর্তাকে তাহার দেহ বা বস্তু তল্লাশিতে বাধা প্রদান করিতে পারিবে না এবং বাধা প্রদান করিলে উক্ত দর্শনার্থীকে বন্দির সহিত সাক্ষাতের অনুমতি প্রদানে করা যাইবে না।

(৬) এই ধারার উদ্দেশ্যে তল্লাশি, দ্রব্য বা সম্পদের হেফাজত ও ফেরত প্রদান প্রক্রিয়া বিধি দ্বারা নির্ধারিত হইবে।

৭৭। কারা অভ্যন্তরে বা কারা এলাকায় বন্দি বা অন্য কোনো ব্যক্তি কর্তৃক ফৌজদারি অপরাধ ইত্যাদি—(১) কোনো বন্দি কারা অভ্যন্তরে ফৌজদারি অপরাধ করিলে কারা কর্তৃপক্ষ প্রচলিত আইন অনুসারে ব্যবস্থা গ্রহণ করিবেন।

(২) কারা এলাকায় কোনো ব্যক্তি ফৌজদারি অপরাধ সংঘটন করিলে বা নিজের পরিচয় জানাইতে অস্বীকার করিলে, অথবা মিথ্যা পরিচয় প্রদান করিয়াছে মর্মে কারা কর্তৃপক্ষের নিকট প্রতীয়মান হইলে, কারা কর্তৃপক্ষ উক্ত ব্যক্তিকে আটক করিতে পারিবেন এবং অনতিবিলম্বে আইন-শৃঙ্খলা রক্ষাকারী বাহিনীর নিকট হস্তান্তর করিবেন এবং আইন-শৃঙ্খলা রক্ষাকারী বাহিনী আইনানুযায়ী প্রয়োজনীয় পদক্ষেপ গ্রহণ করিবেন।

৭৮। কারাবন্দির কারা অপরাধ—বন্দি কর্তৃক কারা অভ্যন্তরে নিম্ন বর্ণিত শৃঙ্খলাভঙ্গাজনিত কার্যকলাপ সম্পাদন করা হইলে এই আইনের বিধান-অনুসারে উহা কারা অপরাধ হিসাবে গণ্য হইবে, যথা :

(ক) অন্য বন্দির শারীরিক ও মানসিক নির্যাতন;

(খ) মারামারি;

(গ) কারাগারের অভ্যন্তরে আগত কোনো সরকারি বা বেসরকারি ব্যক্তি বা পরিদর্শনকারীর প্রতি অপমানজনক বা সম্মানহানিকর আচরণ করা;

(ঘ) খাদ্য গ্রহণে অস্বীকৃতি;

(ঙ) বন্দির নিকট সংরক্ষিত কারাবাসসংশ্লিষ্ট যাবতীয় তথ্য, নথি, দলিলাদি, স্বাক্ষর বা লিখিত বিবরণ মুছিয়া ফেলা, বিকৃত করা অথবা ধ্বংস করা;

(চ) যৌক্তিক কারণ ব্যতিরেকে সাজা পরিকল্পনা বাস্তবায়নের অংশ হিসাবে নির্ধারিত কাজে অংশগ্রহণ না করা;

(ছ) মেডিক্যাল অফিসার কর্তৃক স্বাস্থ্য পরীক্ষায় অসুস্থতার ভান প্রমাণিত হওয়া;

- (জ) কারা কর্তৃপক্ষ কর্তৃক প্রদত্ত সিদ্ধান্ত প্রতিপালনে ব্যর্থ হওয়া, অস্বীকৃতি জানানো, বাধা প্রদান অথবা বিকৃত করা;
- (ঝ) আরোপিত যান্ত্রিক প্রতিবন্ধকতার সামগ্রী বিনষ্ট, বিকৃতি বা ধ্বংস করা;
- (ঞ) নিষিদ্ধ যে-কোনো ধরনের ইলেকট্রনিক বা ইলেকট্রনিকস সামগ্রী বা যন্ত্রের ব্যবহার, প্রস্তুত, বহন, গ্রহণ বা সরবরাহ করা;
- (ট) যে-কোনো ধরনের মাদকদ্রব্য অথবা এমন কোনো বস্তু যাহা মাদকদ্রব্য হিসাবে ব্যবহার করা যাইতে পারে তাহা প্রস্তুত, ব্যবহার, বহন, গ্রহণ বা সরবরাহ করা;
- (ঠ) কোনো ব্যক্তিকে আঘাত বা হুমকি প্রদানের নিমিত্ত অথবা নিজে পলায়ন বা অন্যকে পলায়নের সহযোগিতার উদ্দেশ্যে যে-কোনো নিষিদ্ধ বস্তু বা দ্রব্য প্রস্তুত, ব্যবহার, বহন, সংরক্ষণ, গ্রহণ বা সরবরাহ করা;
- (ড) পলায়ন করা অথবা আইনগতভাবে কারাগারের বাহিরে থাকিলে উপযুক্ত কারণ ব্যতিরেকে নির্ধারিত সময়ের মধ্যে কারাগারে ফেরত না আসা;
- (ঢ) কর্মস্থলের নিরাপত্তা, স্বাস্থ্যবিধি, অগ্নিনিরাপত্তা এবং প্রাকৃতিক দুর্যোগ প্রতিরোধের নিমিত্ত এই আইন, বিধি বা অন্য কোনো আইনের বিধান লঙ্ঘন করা;
- (ণ) ইচ্ছাকৃতভাবে কারাগারের অথবা অন্য কোনো বন্দির ব্যক্তিগত সম্পদ চুরি বা ক্ষতিসাধন করা;
- (ত) কোনো অশালীন আচরণ, কর্মসম্পাদন, আঘাত বা আক্রমণ করা;
- (থ) জিম্মি করা;
- (দ) বন্দি বিদ্রোহে অংশগ্রহণ করা;
- (ধ) অন্য কোনো ব্যক্তির জিম্মা হইতে বলপূর্বক যে-কোনো সম্পদ ছিনাইয়া নেওয়া;
- (ন) কোনো ব্যক্তির নিকট হইতে বিধিবহির্ভূত সুবিধা গ্রহণ করা;
- (প) কারা কর্তৃপক্ষের অনুমতি ব্যতিরেকে নিজের বা অন্য কোনো ব্যক্তির মুনাফার জন্য কোনো দ্রব্য উৎপাদন ও ব্যবসায় পরিচালনা করা;
- (ফ) কারা কর্তৃপক্ষের অনুমোদন ব্যতিরেকে কোনো স্থানে প্রবেশ, সন্দেহজনকভাবে ঘোরাফেরা অথবা অবস্থান করা;
- (ব) তথ্য প্রযুক্তি সংক্রান্ত কোন যন্ত্রাংশ, ল্যাপটপ, কম্পিউটার, মোবাইল, ইন্টারনেট ও বৈদ্যুতিক সংযোগ, ইত্যাদি যে-কোনো সম্পদের ক্ষতি সাধন করা;
- (ভ) কৃষিকাজে ব্যবহৃত কোন যন্ত্র, উপকরণ, যন্ত্রাংশ ইত্যাদির ক্ষতিসাধন করা;
- (ম) উপরে বর্ণিত যে-কোনো কার্যাবলি সম্পাদনের পরিকল্পনা করা, তথ্য গোপন করা, আয়োজন করা, প্রচেষ্টা চালানো অথবা উক্তরূপ কার্যাবলি করার হুমকি, সহায়তা বা উস্কানি প্রদান করা।

(২) সরকার সময় সময় অফিসিয়াল গেজেটের মাধ্যমে অন্যান্য কার্যাবলীকে উপধারা (১)- এর অধীন কারা অপরাধ হিসেবে হিসেবে ঘোষণা করিতে পারিবে।

(৩) উপধারা (১)-এ বর্ণিত যে-কোনো কার্যাবলি সম্পাদনের পরিকল্পনা করা, তথ্য গোপন করা, আয়োজন করা, প্রচেষ্টা চালানো অথবা উক্তরূপ কার্যাবলি করিবার হুমকি সহায়তা বা উস্কানি প্রদান করাও কারা অপরাধ হিসাবে গণ্য হইবে।

(৪) অপরাধের প্রকৃতি (যেমন, লঘু বা গুরু) বিধি দ্বারা নির্ধারিত হইবে।

**৭৯। কারা অপরাধের শাস্তি**—(১) কারা অপরাধের জন্য সুপারিনটেনডেন্ট ব্যতিত অধস্তন কোনো কারা কর্মকর্তা শাস্তি প্রদান করিবেন না এবং একই অপরাধের জন্য একাধিকবার শাস্তি প্রদান করা যাইবে না।

(২) সুপারিনটেনডেন্ট শৃঙ্খলা ও নিরাপত্তা কমিটি কর্তৃক প্রদত্ত সুপারিশের ভিত্তিতে কারা অপরাধের জন্য বন্দি-অপরাধীকে নিম্নরূপ এক বা একাধিক শাস্তি প্রদান করিতে পারিবেন এবং শাস্তিসংক্রান্ত বিষয়াবলি নথিতে লিপিবদ্ধ করিবেন, যথা :

- (ক) আনুষ্ঠানিকভাবে সতর্কীকরণ;
- (খ) তিরস্কার;
- (গ) সাক্ষাৎ স্থগিত;
- (ঘ) ক্ষতিপূরণের আদেশ;
- (ঙ) ছুটি বাতিল;
- (চ) রেয়াত কর্তন;
- (ছ) যান্ত্রিক প্রতিবন্ধকতা আরোপ;
- (জ) সেলে আবদ্ধকরণ;
- (ঝ) বিশেষ নিরাপত্তা ওয়ার্ডে স্থানান্তর;
- (ঞ) নির্জন কারাবাস;
- (ট) কাজের মজুরি কর্তন বা হ্রাসকরণ;
- (ঠ) কারাবন্দির পদাবনতি বা পদোন্নতি স্থগিত;
- (ড) ডিভিশন বাতিল; এবং
- (ঢ) বিধি দ্বারা নির্ধারিত অন্যান্য শাস্তি।

(৩) শাস্তির প্রকৃতি (লঘু বা গুরু), শাস্তি প্রদানের প্রক্রিয়া, শাস্তিসংক্রান্ত বিষয়াবলি, ফর্ম, রেজিস্টার ইত্যাদি বিধি দ্বারা নির্ধারিত হইবে।

৮০। কারাগারে শৃঙ্খলা ও নিরাপত্তা কমিটি ও উহার কার্যাবলি—(১) কারা অপরাধবিষয়ক তদন্ত, সুপারিশ ও নিষ্পত্তি এবং বন্দি কর্তৃক অভিযোগ, মতামত, পরামর্শ গ্রহণ অথবা অন্যান্য কার্য সম্পাদনের জন্য প্রত্যেক কারাগারে শৃঙ্খলা ও নিরাপত্তা কমিটি নামীয় একটি কমিটি থাকিবে।

(২) শৃঙ্খলা ও নিরাপত্তা কমিটির গঠন, কার্যাবলি, অভিযোগ, তদন্ত, সুপারিশ প্রদান প্রক্রিয়া বা পদ্ধতি ইত্যাদি বিধি দ্বারা নির্ধারিত হইবে।

৮১। পুনর্বিবেচনা ও আপিল—ধারা ৭৯-এর অধীন কোনো বন্দিকে শাস্তি প্রদান করা হইলে আদেশ প্রদানের অনধিক ৩০ (ত্রিশ) দিনের মধ্যে সংক্ষুব্ধ বন্দি—

(ক) সুপারিনটেনডেন্ট-এর নিকট পুনর্বিবেচনার জন্য আবেদন করিতে পারিবেন; বা

(খ) কারা উপ-মহাপরিদর্শকের নিকট আপিল করিতে পারিবেন।

(২) পুনর্বিবেচনা বা আপিল করা সত্ত্বেও শৃঙ্খলা ও নিরাপত্তাজনিত সাজা কার্যকর করিবার লক্ষ্যে তাৎক্ষণিক ব্যবস্থা গ্রহণ আবশ্যকীয় হইলে সুপারিনটেনডেন্ট উক্তরূপ ব্যবস্থা গ্রহণ করিতে পারিবেন।

(৩) পুনর্বিবেচনা বা আপিল দায়ের, পদ্ধতি এবং উহা নিষ্পত্তিসম্পর্কিত বিষয়াবলি বিধি দ্বারা নির্ধারিত হইবে।

৮২। বন্দিকে আদালতে হাজির, প্রসেস জারি ইত্যাদি—(১) কারা কর্তৃপক্ষ পুলিশের সহযোগীতায় বন্দিকে কারাগার হইতে আদালত বা ট্রাইবুনালে হাজির করিবে।

(২) যথাযথ নিরাপত্তা গ্রহণক্রমে পরিবহণের মাধ্যমে হাজিরা নিশ্চিত করিতে হইবে :

তবে শর্ত থাকে যে, বন্দি পরিবহণ বা স্থানান্তরের ক্ষেত্রে কারা কর্তৃপক্ষ আইন-শৃঙ্খলা রক্ষাকারী বাহিনীসহ অন্যান্য সংশ্লিষ্ট সংস্থার সহায়তা চাহিতে পারিবেন এবং সংশ্লিষ্ট সংস্থা অনতিবিলম্বে চাহিদা মোতাবেক প্রয়োজনীয় সহায়তা প্রদান করিবে।

(৩) কারা কর্তৃপক্ষ বন্দিকে নিম্নবর্ণিত ক্ষেত্রে আদালতে হাজির করা হইতে বিরত থাকিতে পারিবেন এবং বিষয়টি সংশ্লিষ্ট আদালত বা ট্রাইবুনালকে অবহিত করিতে হইবে, যথা :

(ক) মেডিক্যাল অফিসারের লিখিত পরামর্শ-অনুসারে বন্দি স্থানান্তরের জন্য উপযুক্ত না হইলে;

(খ) নির্ধারিত তারিখে বন্দিকে অন্য কোনো আদালতে হাজিরা বা সাক্ষ্য প্রদানের জন্য উপস্থিত করা হইলে;

(গ) চলমান কোনো তদন্তে বন্দি তদন্তকারী কর্তৃপক্ষের হেফাজতে থাকিলে; বা

(ঘ) বন্দি কারা কর্তৃপক্ষের হেফাজতে না থাকিলে।

(৪) আদালত, ট্রাইবুনাল বা অন্য কোনো কর্তৃপক্ষ কর্তৃক জারিকৃত প্রসেস দায়িত্বপ্রাপ্ত কর্মকর্তা জারি করিবে এবং সংশ্লিষ্ট বন্দিকে আদালতে শারীরিক বা ডিজিটাল পদ্ধতিতে হাজির করিবার প্রয়োজনীয় ব্যবস্থা গ্রহণ করিবেন।

(৫) দেওয়ানি, ফৌজদারি বা দেশে বিদ্যমান অন্যান্য আইন-অনুসারে বন্দির আদালতে সাক্ষ্য প্রদানের ক্ষেত্রে সংশ্লিষ্ট আইন ও উহার অধীন প্রণীত বিধির বিধানাবলি প্রযোজ্য হইবে।



**ষষ্ঠ অধ্যায়**  
**সাজাপ্রাপ্ত বন্দি**

৮৩। সাজা বাস্তবায়ন পরিকল্পনা—(১) ঝুঁকি ও চাহিদা নিরূপণ কমিটি সাজা বাস্তবায়ন পরিকল্পনা প্রণয়ন, পুনর্মূল্যায়ন, সংশোধন ইত্যাদি করিবে।

(২) সাজা বাস্তবায়ন পরিকল্পনায় নিম্নবর্ণিত বিষয়াবলি অন্তর্ভুক্ত হইবে, যথা :

বন্দির—

- (ক) কাজ;
- (খ) শিক্ষা ও প্রশিক্ষণ;
- (গ) প্রাক মুক্তি কার্যক্রম;
- (ঘ) মুক্তি পরবর্তী পুনর্বাসন প্রক্রিয়া; এবং
- (ঙ) বিধি নির্দেশিত অন্যান্য বিষয়।

(৩) শ্রেণিবিন্যাস ও নিরাপত্তা মূল্যায়ন প্রক্রিয়ায় নারী, কিশোর, বিদেশি নাগরিক অথবা মানসিক বা শারীরিক প্রতিবন্ধীদের বিশেষ চাহিদা বিবেচনা করা হইবে।

৮৪। শ্রেণিবিন্যাস ও নিরাপত্তা মূল্যায়ন, পুনর্মূল্যায়ন ইত্যাদি—(১) সাজাপ্রাপ্ত বন্দি কারাগারে ভর্তির ৩০ (ত্রিশ) দিনের মধ্যে সংশোধন ও পুনর্বাসনের নিমিত্ত তাহার ঝুঁকি ও নিরাপত্তা মূল্যায়ন (Risk Assessment) এবং চাহিদা মূল্যায়ন (Need Assessment) ঝুঁকি ও চাহিদা নিরূপণ কমিটি কর্তৃক করা হইবে :

তবে শর্ত থাকে যে, সাজার মেয়াদ ৯০ (নব্বই) দিনের কম হইলে বন্দির ঝুঁকি ও নিরাপত্তা মূল্যায়ন এবং চাহিদা মূল্যায়ন প্রক্রিয়া ভর্তির ১৫ (পনেরো) দিনের মধ্যে সম্পন্ন করিতে হইবে।

(২) উপধারা (১) অনুসারে মূল্যায়নের পর ঝুঁকি ও চাহিদা নিরূপণ কমিটি প্রতি ১২ (বারো) মাসে ন্যূনতম একবার প্রত্যেক বন্দির ঝুঁকি ও নিরাপত্তা পুনঃমূল্যায়ন করিবে এবং তদনুসারে, সাজা বাস্তবায়ন পরিকল্পনা সংশোধন বা পরিবর্তন করিবে।

(৩) উপধারা (২)-এ বর্ণিত পুনর্মূল্যায়নের ক্ষেত্রে ধারা ৮৪-এর উপধারা (২)-এ উল্লিখিত বিধানসহ নিম্নবর্ণিত বিষয়সমূহ বিবেচনা করিতে হইবে, যথা :

- (ক) কারাগারে অবস্থানকালে বন্দির আচরণসংক্রান্ত তথ্যাবলি; এবং
- (খ) সাজা বাস্তবায়ন পরিকল্পনা-অনুসারে নির্ধারিত কার্যাবলিতে সংশ্লিষ্ট বন্দির অংশগ্রহণ।

(৪) বন্দির ঝুঁকি ও নিরাপত্তা মূল্যায়ন ও পুনর্মূল্যায়ন প্রক্রিয়ায় সুপারিনটেনডেন্ট নিম্নবর্ণিত বিষয়াবলি নিশ্চিত করিবেন, যথা :

- (ক) বন্দির তথ্যাবলি সংগ্রহ, সরবরাহ ও সংরক্ষণ;

(খ) সাজা বাস্তবায়ন পরিকল্পনার অগ্রগতি বিশ্লেষণ; এবং

(গ) এতৎসংশ্লিষ্ট অন্যান্য প্রয়োজনীয় বিষয়াবলি।

**৮৫। সাজা বাস্তবায়ন পরিকল্পনা অনুযায়ী কাজ—(১) সাজাপ্রাপ্ত বন্দি—**

(ক) সাজা বাস্তবায়ন পরিকল্পনা-অনুযায়ী তাহার জন্য নির্ধারিত কাজ, ধারা ৩৯ ও ৪১-এ প্রদত্ত শর্তাবলি পূরণসাপেক্ষে, করিতে বাধ্য থাকিবে।

(খ) শিক্ষা, প্রশিক্ষণ বা অন্য কোনো কর্মকাণ্ডে অংশগ্রহণ করিয়া থাকিলে উহা বন্দির কাজ হিসাবে বিবেচিত হইবে;

(গ) তৎকর্তৃক কৃত ও সম্পাদিত কাজের জন্য যথাযথ পারিশ্রমিক বা মজুরি পাইবার অধিকারী হইবে এবং উক্তরূপ প্রাপ্ত পারিশ্রমিক বা মজুরির অর্ধেকাংশ সংশ্লিষ্ট বন্দির সম্মতিক্রমে—

(অ) পরিবারকে প্রদান করা যাইবে:

(আ) আদালত কর্তৃক প্রদত্ত অর্থদণ্ড, জরিমানা ইত্যাদি প্রদান করা যাইবে; বা

(ই) অন্য কোনো আইনগত বাধ্যবাধকতা থাকিলে তাহা পূরণে ব্যয় করা যাইবে।

(২) সাজা বাস্তবায়ন পরিকল্পনার অংশ হিসাবে, সরকারের অনুমোদনসাপেক্ষে কারা কর্তৃপক্ষ, বিধি দ্বারা নির্দেশিত পদ্ধতি ও প্রক্রিয়ায়, সাজাপ্রাপ্ত বন্দিকে কারাগারের বাহিরে নির্দিষ্ট সময়ের জন্য কাজ করিবার অনুমতি প্রদান করিতে পারিবেন।

**৮৬। সাজাপ্রাপ্ত বন্দির কারাবাসের স্থান নির্ধারণ ও স্থানান্তর—(১) সামাজিক ও পারিবারিক বন্ধন সুরক্ষায় উৎসাহিত করিবার জন্য বন্দিকে তাহার নিজ জেলা, পরিবারের সদস্যরা যে জেলায় অবস্থান করিতেছে উক্ত জেলা বা তাহার সন্নিকটস্থ কারাগারে অবস্থান করিবার ব্যবস্থা করা যাইতে পারে।**

(২) ধারা ৬৮ যাহা কিছুই থাকুক না কেন, উপধারা (১)-এর বিধান কোনো বন্দির ক্ষেত্রে অনুসরণ করা না হইলে উক্ত বন্দির ক্ষেত্রে সুপারিনটেনডেন্ট সংশ্লিষ্ট বন্দির মুক্তি পাইবার সম্ভাব্য তারিখ হইতে কাছাকাছি সময়ে কারা কর্তৃপক্ষের নির্দেশিত সময় বা তারিখে সংশ্লিষ্ট বন্দিকে নিজ জেলা, পরিবারের সদস্যরা যে জেলায় অবস্থান করিতেছে উক্ত জেলা বা তাহার সন্নিকটস্থ কারাগারে পুলিশের সহযোগিতায় স্থানান্তরের ব্যবস্থা গ্রহণ করিবেন।

**৮৭। সাজাপ্রাপ্ত বন্দির জন্য সুবিধা অর্জন—(১) ঝুঁকি ও চাহিদা নিরূপণ কমিটি সাজা বাস্তবায়ন পরিকল্পনায় বিশেষ সুবিধাসংক্রান্ত সুপারিশ করিতে পারিবে।**

(২) উপধারা (১)-এ বর্ণিত বিশেষ সুবিধার ধরন, সুবিধা অর্জন, প্রদান পদ্ধতি ইত্যাদি বিধি দ্বারা নির্ধারিত হইবে :

তবে শর্ত থাকে যে, বিধি প্রণীত না হওয়া পর্যন্ত, কারা কর্তৃপক্ষ বিশেষ সুবিধার ধরন, সুবিধা অর্জন, প্রদান পদ্ধতি ইত্যাদি আদেশ দ্বারা নির্ধারণ করিতে পারিবেন।

## সপ্তম অধ্যায়

### সিভিল বন্দি, বন্দি (detainee), নিরাপদ হেফাজত ইত্যাদি

৮৮। সিভিল বন্দি—সিভিল বন্দি—

- (ক) অন্যান্য সকল বন্দি হইতে পৃথক আবাসনে থাকিবে;
- (খ) কারাগারের নিরাপত্তা ও শৃঙ্খলা বজায় রাখিবে; এবং
- (গ) অন্য কোনো আইনে সুনির্দিষ্ট কোনো বিধান না থাকিলে এই আইন এবং তাহার অধীন প্রণীত বিধি দ্বারা নির্ধারিত খাদ্য ও অন্যান্য সুবিধা প্রাপ্ত হইবে।

৮৯। বন্দি (detainee), নিরাপদ হেফাজত ইত্যাদি—(১) বন্দি (detainee) ও নিরাপদ হেফাজতে থাকা বন্দির জন্য চতুর্থ অধ্যায়ে বর্ণিত বন্দির সুযোগ-সুবিধা ও অধিকারসংক্রান্ত বিধানাবলি প্রযোজ্য হইবে এবং প্রয়োজনে, বিধি দ্বারা নির্ধারিত অতিরিক্ত ব্যবস্থা গ্রহণ করা যাইবে।

(২) বন্দি (detainee) ও নিরাপদ হেফাজতে থাকা বন্দির কারাগারে অবস্থানকালে প্রয়োজনীয় নিরাপত্তা বজায় রাখিয়া কাজ ও অন্যান্য কর্মকাণ্ডে অংশগ্রহণ করিবার সুযোগ প্রদান করা যাইবে।

## অষ্টম অধ্যায়

### কারা প্রশাসন

৯০। মহাপরিদর্শক—(১) বাংলাদেশ কারা ও সংশোধন পরিষেবা ডিপার্টমেন্ট-এর একজন মহাপরিদর্শক থাকিবেন এবং তিনি উক্ত ডিপার্টমেন্ট-এর প্রধান নির্বাহী হইবেন।

(২) কারা মহাপরিদর্শক সরকার কর্তৃক নিযুক্ত হইবেন এবং তাঁহার চাকরির শর্তাবলি সরকার কর্তৃক স্থিরীকৃত হইবে।

(৩) কারা মহাপরিদর্শক ডিপার্টমেন্ট-এর সার্বক্ষণিক কর্মকর্তা হইবেন এবং তিনি এই আইনের বিধানাবলিসাপেক্ষে এবং সরকার কর্তৃক সময়ে সময়ে নির্দেশিত কার্যাবলি সম্পাদন, ক্ষমতা প্রয়োগ ও দায়িত্ব পালন করিবেন।

(৪) কারা মহাপরিদর্শক-এর পদ শূন্য হইলে বা অনুপস্থিতি, অসুস্থতা আ অন্য কোনো কারণে কারা মহাপরিদর্শক তাঁহার দায়িত্ব পালনে অসমর্থ হইলে, শূন্যপদে নবনিযুক্ত কারা মহাপরিদর্শক কার্যভার গ্রহণ না করা পর্যন্ত বা কারা মহাপরিদর্শক পুনরায় স্থায়ী দায়িত্ব পালনে সমর্থ না হওয়া পর্যন্ত সরকার কর্তৃক নিযুক্ত কোনো ব্যক্তি অস্থায়ীভাবে কারা মহাপরিদর্শকের দায়িত্ব পালন করিবেন।

৯১। কারা মহাপরিদর্শকের দায়িত্ব ও কার্যাবলি—কারা মহাপরিদর্শকের দায়িত্ব ও কার্যাবলি হইবে নিম্নরূপ, যথা :

(ক) ধারা ৭-এ উল্লিখিত বাংলাদেশে কারা ও সংশোধন পরিষেবা ডিপার্টমেন্ট-এর দায়িত্ব ও কার্যাবলি তত্ত্বাবধান ও নিয়ন্ত্রণ করা;

(খ) এই আইনের উদ্দেশ্য পূরণকল্পে, প্রয়োজনীয় আদেশ, নির্দেশনা ইত্যাদি জারি করা;

(গ) এই আইনের উদ্দেশ্য বাস্তবায়নে সরকার কর্তৃক, সময়ে সময়ে প্রদত্ত বা জারিকৃত নির্দেশনা বাস্তবায়ন করা;

(ঘ) সরকারের অনুমোদনক্রমে কোনো ভবন বা স্থাপনাকে অস্থায়ীভাবে বিশেষ কারাগার হিসাবে ঘোষণা ও উহাতে বন্দি স্থানান্তর করা;

(ঙ) ডিপার্টমেন্ট-এর অভ্যন্তরীণ নিরীক্ষার জন্য প্রয়োজনীয় ব্যবস্থা করা;

(চ) সরকারের পূর্বানুমোদনক্রমে ডিপার্টমেন্ট-এর অধীনে বিভিন্ন ইউনিট প্রতিষ্ঠা ও উহাদের কার্যপরিধি নির্ধারণ করা;

(ছ) এই আইন, বিধিমালা, সরকারি পরিপত্র, আদেশ, নির্দেশ ইত্যাদির সমন্বয়ে, সময়ে সময়ে, এই সংক্রান্ত ম্যানুয়াল প্রস্তুত ও প্রকাশ করা;

(জ) বন্দির সংশোধন, পুনর্বাসন ও সমাজে পুনর্অঙ্গীভূতকরণের নিমিত্ত প্রয়োজনীয় কার্যাবলির পরিকল্পনা, সংগঠন, সমন্বয়, তত্ত্বাবধান, নিয়ন্ত্রণ ও প্রয়োজনীয় অন্যান্য কার্য গ্রহণ করা;

(ঝ) বন্দির সংশোধন, পুনর্বাসন ও সমাজে পুনর্অঙ্গীভূতকরণের নিমিত্ত প্রয়োজনীয় গবেষণার ব্যবস্থা, গবেষণালব্ধ ফলাফলের ভিত্তিতে নীতি নির্ধারণ ও নূতন কার্যক্রম গ্রহণ এবং সরকারকে প্রয়োজনীয় সুপারিশ প্রদান করা;

(ঞ) বন্দির সংখ্যাধিক্য হ্রাস করিবার লক্ষ্যে সরকারের অনুমোদনসাপেক্ষে বিশেষ ব্যবস্থা গ্রহণ করা; এবং

(ট) এই আইনের উদ্দেশ্য পূরণকল্পে, আনুষঙ্গিক ও প্রয়োজনীয় সকল ব্যবস্থা গ্রহণ করা।

৯২। অতিরিক্ত কারা মহাপরিদর্শক-এর নিয়োগ, দায়িত্ব ও কার্যাবলি ইত্যাদি—(১) এই আইনের উদ্দেশ্য পূরণকল্পে, ডিপার্টমেন্ট-এর জন্য প্রয়োজনীয়সংখ্যক অতিরিক্ত কারা মহাপরিদর্শক থাকিবে এবং তাঁহাদের নিয়োগের শর্তাবলি সরকার কর্তৃক প্রণীত বিধি দ্বারা নির্ধারিত হইবে।

(২) অতিরিক্ত কারা মহাপরিদর্শক-এর দায়িত্ব ও কার্যাবলি হইবে নিম্নরূপ, যথা :

- (ক) ধারা ৭-এর উল্লিখিত বাংলাদেশ কারা ও সংশোধন পরিষেবা ডিপার্টমেন্ট-এর দায়িত্ব ও কার্যাবলি বাস্তবায়নের লক্ষ্যে প্রয়োজনীয় ব্যবস্থা গ্রহণ করা;
- (খ) সরকার বা কারা মহাপরিদর্শক কর্তৃক প্রদত্ত ও নির্দেশিত দায়িত্ব ও কার্যাবলি সম্পাদন করা;
- (গ) এই আইনের উদ্দেশ্য পূরণকল্পে, আনুষঙ্গিক বা যে-কোনো কার্যাবলি সম্পাদন করা; এবং
- (ঘ) সরকার বা এই আইনের অধীন প্রণীত বিধি দ্বারা নির্ধারিত অন্যান্য যে-কোনো দায়িত্ব ও কার্যাবলি সম্পাদন করা।

৯৩। কারা উপ-মহাপরিদর্শক-এর নিয়োগ, দায়িত্ব ও কার্যাবলি ইত্যাদি—(১) এই আইনের উদ্দেশ্য পূরণকল্পে, ডিপার্টমেন্ট-এর জন্য প্রয়োজনীয়সংখ্যক কারা উপ-মহাপরিদর্শক থাকিবে এবং তাঁহাদের নিয়োগের শর্তাবলি সরকার কর্তৃক প্রণীত বিধি দ্বারা নির্ধারিত হইবে।

(২) কারা উপ-মহাপরিদর্শক-এর দায়িত্ব ও কার্যাবলি হইবে নিম্নরূপ, যথা :

- (ক) ধারা ৭-এর উল্লিখিত বাংলাদেশ কারা ও সংশোধন পরিষেবা ডিপার্টমেন্ট-এর দায়িত্ব ও কার্যাবলি বাস্তবায়নের লক্ষ্যে প্রয়োজনীয় ব্যবস্থা গ্রহণ করা;
- (খ) সরকার বা কারা মহাপরিদর্শক কর্তৃক প্রদত্ত ও নির্দেশিত দায়িত্ব ও কার্য সম্পাদন করা;
- (গ) এই আইনের উদ্দেশ্য পূরণকল্পে, আনুষঙ্গিক বা যে-কোনো কার্যাবলি সম্পাদন করা; এবং
- (ঘ) সরকার বা এই আইনের অধীন প্রণীত বিধি দ্বারা নির্ধারিত অন্যান্য যে-কোনো দায়িত্ব ও কার্যাবলি সম্পাদন করা।

৯৪। কর্মকর্তা-কর্মচারী ইত্যাদি—(১) ডিপার্টমেন্ট-এর কার্যাবলি সুষ্ঠুভাবে সম্পাদনের উদ্দেশ্যে সরকার কর্তৃক অনুমোদিত সাংগঠনিক কাঠামো অনুসারে কারা কর্তৃপক্ষ প্রয়োজনীয়সংখ্যক কর্মকর্তা ও কর্মচারী নিয়োগ করিতে পারিবে এবং তাহাদের চাকরির শর্তাবলি বিধি দ্বারা নির্ধারিত হইবে।

(২) উপধারা (১)-এর অধীন নিয়োগপ্রাপ্ত কর্মকর্তা বা কর্মচারী নিম্নবর্ণিত কার্যাবলি সম্পাদন করা হইতে বিরত থাকিবে, যথা:

- (ক) সরকার বা কারা মহাপরিদর্শকের অনুমতি গ্রহণ ব্যতিরেকে কোনো লাভজনক কর্মে নিযুক্ত হওয়া;
- (খ) বন্দির সহিত দ্রব্য ক্রয়-বিক্রয়, ভাড়া বা প্রত্যক্ষ বা পরোক্ষভাবে কোনো বন্দি বা তাহার আত্মীয়স্বজন-এর সহিত আর্থিক বা ব্যাবসায়িক লেনদেন করা;

(গ) ব্যবসায়িক উদ্দেশ্যে কারাগারে দ্রব্য-সামগ্রী সরবরাহের জন্য প্রত্যক্ষ বা পরোক্ষভাবে কোনো চুক্তিতে আবদ্ধ হওয়া; বা

(ঘ) বিধি দ্বারা নির্দেশিত অন্য যে-কোনো কার্যাবলি সম্পাদন করা।

**৯৫। কারা কর্মকর্তা-কর্মচারীদের দায়িত্ব**—(১) কারা কর্মকর্তা-কর্মচারীদের দায়িত্ব হইবে নিম্নরূপ, যথা :

(ক) এই আইন ও তাহার অধীন প্রণীত বিধি, আদেশ ইত্যাদি প্রতিপালন করা;

(খ) দেশে প্রচলিত অন্যান্য আইন বা বিধি, প্রবিধি, নীতিমালা, নির্দেশনা, পরিপত্র, আদেশ ইত্যাদি বলে অর্পিত দায়িত্ব পালন করা;

(গ) উর্ধ্বতন কর্তৃপক্ষের আইনসম্মত আদেশ ও নির্দেশনা প্রতিপালন করা; এবং

(ঘ) বিধি দ্বারা নির্ধারিত অন্যান্য দায়িত্ব পালন করা।

(২) কারা কর্মকর্তা-কর্মচারী উপধারা (১) প্রদত্ত দায়িত্ব পালনের ক্ষেত্রে উচ্চমানের শৃঙ্খলা, বিশ্বস্ততা, পেশাদারিত্ব ও আন্তরিকতা বজায় রাখিবেন।

(৩) উপধারা (১) ও উপধারা (২) বিধান প্রতিপালনে কোনো কর্মকর্তা-কর্মচারী ব্যর্থ হইলে তাহার বিরুদ্ধে বিধি অনুসারে শাস্তিমূলক ব্যবস্থা গৃহীত হইবে।

**৯৬। সুপারিনটেনডেন্ট**—(১) প্রত্যেক কারাগারে এক বা একাধিক সুপারিনটেনডেন্ট থাকিবেন এবং তিনি এই আইন ও তদধীন প্রণীত বিধি অনুসরণ করিয়া কারা মহাপরিদর্শক-এর তত্ত্বাবধান ও নিয়ন্ত্রণে থাকিয়া কারাগারের সার্বিক ব্যবস্থাপনা, নিয়ন্ত্রণ ও তদারকি করিবেন।

(২) সুপারিনটেনডেন্ট-এর সাময়িক অনুপস্থিতিতে সংশ্লিষ্ট কারাগারের জ্যেষ্ঠ কর্মকর্তা অথবা কারা মহাপরিদর্শক কর্তৃক এই উদ্দেশ্যে দায়িত্বপ্রাপ্ত কোনো কর্মকর্তা সুপারিনটেনডেন্ট এর দায়িত্ব পালন করিবেন এবং তিনি এই আইন ও আইনের অধীন প্রণীত বিধি মোতাবেক সকল দায়িত্ব পালন করিবেন।

(৩) সুপারিনটেনডেন্ট-এর তঁহার ন্যস্ত বা অর্পিত দায়িত্ব, প্রয়োজনে, কোনো অধীন কর্মকর্তা কর্মচারীর উপর ন্যস্ত করিতে পারিবেন।

(৪) সুপারিনটেনডেন্ট তঁহার অধীন সকল কর্মকর্তা কর্মচারীর ছুটি প্রদানসহ প্রশাসনিক অন্যান্য ব্যবস্থা গ্রহণ করিবেন :

তবে শর্ত থাকে যে, কোনো অধীন কর্মকর্তা-কর্মচারী দায়িত্ব পালনকালীন সুপারিনটেনডেন্ট-এর অনুমতি ব্যতীত অনুপস্থিত থাকিতে পারিবেন না।

(৫) সুপারিনটেনডেন্ট কারাগার এলাকায় বসবাস করিবেন :

তবে শর্ত থাকে যে, কারাগার এলাকার আবাসনের ব্যবস্থা না থাকিলে কারা মহাপরিদর্শক-এর লিখিত অনুমতিসাপেক্ষে কারা এলাকার বাহিরে বসবাস করিতে পারিবেন।

(৬) সুপারিনটেনডেন্ট-এর অধীনে কারা প্রশাসন, বন্দির সংশোধন এবং অন্যান্য কার্যক্রম পরিচালনার জন্য পৃথক বিভাগ বা ইউনিট থাকিবে এবং তিনি ডেপুটি সুপারিনটেনডেন্ট বা জেলার ব্যতীত সংশ্লিষ্ট ইউনিটের কর্মকর্তা-কর্মচারীগণকে আন্তঃইউনিটে বদলি করিতে পারিবেন।

(৭) সুপারিনটেনডেন্ট কারাগারের জনাকীর্ণতা হ্রাস করিবার নিমিত্ত বিচারাধীন বন্দির জন্য প্রয়োজনীয় আইনগত উদ্যোগ গ্রহণের জন্য সংশ্লিষ্ট জেলার জেলা আইনগত সহায়তা কমিটির সভাপতিকে অবগত করিবেন এবং বিষয়টি কারা মহাপরিদর্শককে অবহিত করিবেন।

**৯৭। সুপারিনটেনডেন্ট কর্তৃক নথি ও তথ্যাবলি সংরক্ষণ—**(১) সুপারিনটেনডেন্ট এই আইন ও তদধীন প্রণীত বিধি অনুসারে বন্দির নিম্নরূপ নথি, রেজিস্টার ও তথ্যাবলি সংরক্ষণ করিবেন, যথা :

- (ক) ভর্তি, মুক্তি, শাস্তি, শ্রম, পরিদর্শন, বন্দির নিকট হইতে সংগৃহীত অর্থ ও মূল্যবান সম্পত্তি, সাজা বাস্তবায়ন পরিকল্পনা এবং সংশোধনমূলক কার্যক্রমের রেজিস্টারসহ প্রয়োজনীয় অন্যান্য সকল নথিপত্র ও রেজিস্টার;
- (খ) আলোকচিত্র, ইলেকট্রনিক তথ্যাবলি ও বায়োমেট্রিক শনাক্তকরণসংবলিত তথ্যাদি; এবং
- (গ) বিধি দ্বারা নির্ধারিত অন্যান্য তথ্য।

**৯৮। ডেপুটি সুপারিনটেনডেন্ট—**(১) প্রত্যেক কারাগারে এক বা একধিক ডেপুটি সুপারিনটেনডেন্ট থাকিবেন এবং তিনি এই আইন ও তদধীন প্রণীত বিধি অনুসরণ করিয়া সুপারিনটেনডেন্ট-এর তত্ত্বাবধান ও নিয়ন্ত্রণে থাকিয়া বন্দির সংশোধন, পুনর্বাসন ও সমাজে পুনঃঅঙ্গীভূতকরণ-সংক্রান্ত কার্যাবলির ব্যবস্থাপনা, নিয়ন্ত্রণ ও তদারকি করিবেন।

(২) ধারা ৯৭-এ বর্ণিত বন্দির সংশোধন, পুনর্বাসন ও সমাজে পুনঃঅঙ্গীভূতকরণ-সংক্রান্ত নথিপত্র রেজিস্টার, প্ল্যান্ট, যন্ত্রপাতি, মালামাল ইত্যাদির হেফাজতকারী (custodian) হইবেন ডেপুটি সুপারিনটেনডেন্ট।

(৩) ডেপুটি সুপারিনটেনডেন্ট বন্দির সংশোধন, পুনর্বাসন ও সমাজে পুনঃঅঙ্গীভূতকরণ-সংক্রান্ত কার্যাবলি সম্পাদনে সুপারিনটেনডেন্ট কর্তৃক অর্পিত সকল দায়িত্ব পালন করিবেন এবং সুপারিনটেনডেন্টকে সার্বিক সহায়তা প্রদান করিবেন।

(৪) ডেপুটি সুপারিনটেনডেন্ট সরকার বা কারা কর্তৃপক্ষ কর্তৃক সময়ে সময়ে নির্দেশিত এবং বিধি দ্বারা নির্ধারিত অন্যান্য কার্য সম্পাদন করিবেন।

(৫) ডেপুটি সুপারিনটেনডেন্ট কারা এলাকার অভ্যন্তরে বসবাস করিবেন :

তবে শর্ত থাকে যে, কারা এলাকার অভ্যন্তরে আবাসনের ব্যবস্থা না থাকিলে সুপারিনটেনডেন্ট-এর লিখিত অনুমতিসাপেক্ষে কারা এলাকার বাহিরে বসবাস করিতে পারিবেন।

**৯৯। জেলার—**(১) প্রত্যেক কারাগারে এক বা একধিক জেলার থাকিবেন এবং তিনি এই আইন ও তদধীন প্রণীত বিধি অনুসরণ করিয়া সুপারিনটেনডেন্ট এর তত্ত্বাবধান ও নিয়ন্ত্রণে থাকিয়া কারা প্রশাসন ও ব্যবস্থাপনার সার্বিক দায়িত্বে নিয়োজিত থাকিবেন।

(২) ধারা ৯৭-এ বর্ণিত বন্দির নিকট হইতে সংগৃহীত অর্থ ও ব্যক্তিগত সম্পত্তি এবং যাবতীয় নথিপত্র, রেজিস্টার ইত্যাদির হেফাজতকারী (custodian) হইবে জেলার।

(৩) জেলার কারা ব্যবস্থাপনাসংক্রান্ত কার্যাবলি সম্পাদনে সুপারিনটেনডেন্ট কর্তৃক অর্পিত সকল দায়িত্ব পালন করিবেন এবং সুপারিনটেনডেন্টকে সার্বিক সহায়তা প্রদান করিবেন।

(৪) সরকার বা কারা কর্তৃপক্ষ কর্তৃক, সময়ে সময়ে, নির্দেশিত এবং বিধি দ্বারা নির্ধারিত অন্যান্য কার্য সম্পাদন করিবেন।

(৫) জেলার কারা এলাকার অভ্যন্তরে বসবাস করিবেন :

তবে শর্ত থাকে যে, কারা এলাকার অভ্যন্তরে আবাসনের ব্যবস্থা না থাকিলে সুপারিনটেনডেন্ট-এর লিখিত অনুমতিসাপেক্ষে কারা এলাকার বাহিরে বসবাস করিতে পারিবেন।

(৬) সুপারিনটেনডেন্ট-এর অনুমতি ব্যতিরেকে জেলার রাতে কারা এলাকা ত্যাগ করিতে পারিবেন না।

**১০০। ডেপুটি জেলার—**(১) ডেপুটি জেলার সুপারিনটেনডেন্ট-এর তত্ত্বাবধানে থাকিয়া জেলার-কে তাঁহার দায়িত্ব ও কার্যাবলি সম্পাদনে সার্বিক সহায়তা প্রদান করিবেন।

**১০১। ডিউটি অফিসার—**সুপারিনটেনডেন্ট তাঁহার অধীন কর্মকর্তাদের অনুপস্থিতিতে উক্ত অধীন কর্মকর্তার দায়িত্ব পালনের জন্য অন্যান্য অধীন কর্মকর্তাদের মধ্যে হইতে একজন ডিউটি অফিসার মনোনীত করিতে পারিবেন এবং তিনি সুপারিনটেনডেন্ট কর্তৃক অর্পিত দায়িত্ব পালন করিবেন।

**১০২। গেট কিপার—**(১) প্রত্যেক কারাগারে এক বা একাধিক গেট কিপার থাকিবেন, তিনি সুপারিনটেনডেন্ট কর্তৃক তাঁহার অধীন কর্মচারীদের মধ্য হইতে মনোনীত ও দায়িত্বপ্রাপ্ত হইবেন।

(২) গেট কিপার—

(ক) কারাগারের গেট প্রহরায় সতকর্তা ও নিরাপত্তার সহিত নিয়োজিত থাকিবেন এবং মূল ফটকের চাবি তাহার নিকট সংরক্ষিত থাকিবে;

(খ) কারাগারের বাহির হইতে ভিতরে বা কারাগার হইতে বাইরে বহণকৃত যে-কোনো বস্তু বা দ্রব্য পরীক্ষা এবং উক্তরূপ পরীক্ষাকালে কোনো ব্যক্তিকে বাধা প্রদান ও তল্লাশি করিতে পারিবেন :

তবে শর্ত থাকে যে, পরীক্ষাকালে কোনো নিষিদ্ধ দ্রব্য বা বস্তু পাওয়া গেলে তিনি বিষয়টি তাৎক্ষণিকভাবে সুপারিনটেনডেন্ট, জেলার বা ডিউটি অফিসারকে অবগত করিবেন।

**১০৩। মেডিক্যাল অফিসার ও সহকারী সার্জন—**(১) প্রত্যেক কারাগারে একজন মেডিক্যাল অফিসার এবং এক বা একাধিক সহকারী সার্জন থাকিবেন এবং তাঁহারা এই আইন ও তদধীন প্রণীত বিধি অনুসরণ করিয়া সুপারিনটেনডেন্ট-এর তত্ত্বাবধান ও নিয়ন্ত্রণে থাকিয়া বন্দির স্বাস্থ্য ও চিকিৎসাবিষয়ক কার্যাবলির ব্যবস্থাপনা, নিয়ন্ত্রণ ও তদারকি করিবেন।

(২) মেডিক্যাল অফিসার কারা এলাকার অভ্যন্তরে বসবাস করিবেন :

তবে শর্ত থাকে যে, কারা এলাকার অভ্যন্তরে আবাসন ব্যবস্থা না থাকিলে সুপারিনটেনডেন্ট-এর লিখিত অনুমতিসাপেক্ষে তিনি কারা এলাকার বাহিরে বসবাস করিতে পারিবেন।

(৩) মেডিক্যাল অফিসারের অনুপস্থিতিতে সহকারী সার্জনের মধ্য হইতে সুপারিনটেনডেন্ট কর্তৃক মনোনীত একজন দায়িত্ব পালন করিবেন :



তবে শর্ত থাকে যে, কোনো কারাগারে সহকারী সার্জনদের মধ্য হইতে দায়িত্ব প্রদান সম্ভব না হইলে সুপারিনটেনডেন্ট-এর চাহিদা অনুসারে সংশ্লিষ্ট সিভিল সার্জন তাঁহার অধীন কোনো চিকিৎসককে মেডিক্যাল অফিসারের দায়িত্ব পালনের জন্য মনোনীত করিবেন এবং উক্তরূপে মনোনীত চিকিৎসক এই আইন ও তদধীন প্রণীত বিধি মোতাবেক মেডিক্যাল অফিসারের সকল ক্ষমতা প্রয়োগ ও দায়িত্ব পালন করবেন।

(৪) মেডিক্যাল অফিসার বন্দির স্বাস্থ্যসেবাসংক্রান্ত গৃহীত সকল পদক্ষেপ যথাযথভাবে রেজিস্টারে লিপিবদ্ধ, নথিভুক্ত ও সংরক্ষিত করিবেন।

(৫) বন্দিদের মনোসামাজিক (psychosocial) কাউন্সিলিং বা মানসিক রোগের চিকিৎসার জন্য সরকার প্রয়োজনীয় সংখ্যক সাইকিয়াট্রিস্ট বা মানসিক রোগের চিকিৎসক ও অন্যান্য প্রয়োজনীয় জনবল ও সরঞ্জামাদির ব্যবস্থা করিবে।

**১০৪। মেডিক্যাল বোর্ড**—(১) আদালতের নির্দেশে অথবা মেডিক্যাল অফিসারের পরামর্শক্রমে সুপারিনটেনডেন্ট বন্দির ডাক্তারি পরীক্ষা, চিকিৎসা বা অন্য কোনো স্বাস্থ্যগত বিষয়ে মেডিক্যাল বোর্ড গঠন করিবার জন্য সিভিল সার্জন, সংশ্লিষ্ট জেলার সদর হাসপাতালের তত্ত্বাবধায়ক, প্রযোজ্যক্ষেত্রে, মেডিক্যাল কলেজ হাসপাতালের পরিচালক বা অন্য কোনো উপযুক্ত কর্তৃপক্ষকে অনুরোধ করিতে পারিবেন।

(২) উপধারা (১) অনুসারে উক্তরূপ অনুরোধের ভিত্তিতে সংশ্লিষ্ট সিভিল সার্জন, তত্ত্বাবধায়ক, প্রযোজ্যক্ষেত্রে, হাসপাতালের পরিচালক বা অন্য কোনো উপযুক্ত কর্তৃপক্ষ অবিলম্বে প্রয়োজনীয় ব্যবস্থা গ্রহণ করিবেন।

**১০৫। ইউনিফর্ম ও কিটস**—ডিপার্টমেন্ট-এ কর্মরত সকল কর্মকর্তা-কর্মচারগণ বিধি দ্বারা নির্ধারিত ইউনিফর্ম পরিধান ও কিটস ব্যবহার করিবেন।

**১০৬। অস্ত্রের প্রাধিকার**—(১) ডিপার্টমেন্ট-এ কর্মরত সকল কর্মকর্তা-কর্মচারীগণ অস্ত্রের প্রাধিকারপ্রাপ্ত হইবেন এবং বিধি অনুসারে তাহাদের বরাবরে আশ্রয়প্রদান করা হইবে।

**১০৭। যানবাহন সুবিধাদি ইত্যাদি**—(১) ডিপার্টমেন্ট-এর দাপ্তরিক প্রয়োজন এবং বন্দির চিকিৎসা সেবা নিশ্চিতকরণের জন্য প্রয়োজনীয়সংখ্যক যানবাহন ও অ্যান্ডুলেপ্স থাকিবে।

(২) যানবাহনের ধরন, ব্যবহার পদ্ধতি, প্রাধিকার, ইত্যাদি সংক্রান্ত বিষয়াবলি বিধি দ্বারা নির্ধারিত হইবে।

**১০৮। কারা কর্মকর্তা-কর্মচারীদের জন্য ট্রাস্ট ও সমবায় সমিতি গঠন**—(১) ডিপার্টমেন্ট-এর কর্মকর্তা-কর্মচারীদের কল্যাণের জন্য—

(ক) ট্রাস্ট গঠন করা যাইবে; এবং

(খ) কর্মকর্তা-কর্মচারীগণ সমিতি গঠন করিতে পারিবে।

(২) ট্রাস্ট ও সমিতি গঠনসংক্রান্ত বিষয়াবলি বিধি দ্বারা নির্ধারিত হইবে।

১০৯। প্রশিক্ষণ একাডেমি, কর্মচারীদের প্রশিক্ষণ ইত্যাদি—(১) এই আইনের উদ্দেশ্য পূরণকল্পে, বাংলাদেশ কারা ও সংশোধন পরিষেবা ডিপার্টমেন্ট-এ কর্মরত সকল কর্মকর্তা-কর্মচারীর দায়িত্ব ও কার্যাবলির ধরন-অনুসারে দেশে বা বিদেশে প্রয়োজনীয় প্রশিক্ষণ ও দক্ষতা উন্নয়নবিষয়ক অন্যান্য কার্য গ্রহণ করা হইবে।

(২) উপধারা (১)-এর অধীনে উল্লিখিত দেশীয় প্রশিক্ষণ আয়োজন ও বন্দির সাজা বাস্তবায়ন পরিকল্পনার অংশ হিসাবে প্রশিক্ষণ অনুষ্ঠানের জন্য একটি প্রশিক্ষণ একাডেমি, প্রয়োজনীয়সংখ্যক প্রশিক্ষণ কেন্দ্র বা সমজাতীয় অন্যান্য প্রতিষ্ঠান থাকিবে।

## নবম অধ্যায়

### পুরস্কার, অপরাধ ও শাস্তি

১১০। কারা পুরস্কার—কারা মহাপরিদর্শক কর্মচারী ও কর্মকর্তাদের পেশাগত দক্ষতা, সদাচরণ, নীতিবোধ এবং বন্দিদের সংশোধন ও পুনর্বাসন ইত্যাদি সেবার ক্ষেত্রে প্রশংসনীয় কাজের জন্য সরকার কর্তৃক অনুমোদিত পুরস্কার প্রদান করিতে পারিবেন।

১১১। অপসারণ, বরখাস্ত অথবা বাধ্যতামূলক অবসর—নিয়োগকারী কর্তৃপক্ষ কোনো কর্তৃপক্ষ অসদাচরণের দায়ে শাস্তিমূলক ব্যবস্থা হিসাবে কারা কর্মকর্তা-কর্মচারীর পদ অবনমন, অপসারণ, বরখাস্ত বা বাধ্যতামূলক অবসর প্রদান বা এইরূপ কোনো দণ্ড আরোপ করিতে পারিবে।

১১২। কতিপয় ফৌজদারি অপরাধের ক্ষেত্রে আইনগত ব্যবস্থা গ্রহণ—(১) কোনো কারা কর্মকর্তা-কর্মচারী Penal Code 1860 অথবা অন্য কোনো ফৌজদারি আইনের অধীন অপরাধ সংঘটন করিলে উক্ত কর্মকর্তা বা কর্মচারীর বিরুদ্ধে আইনগত ব্যবস্থা গ্রহণ করিতে হইবে।

(২) কারা কর্মকর্তা-কর্মচারীর বিরুদ্ধে কোনো আদালতে একই বিষয়ের উপর ফৌজদারি কার্যধারা বা আইনগত কার্যধারা বিচারাধীন থাকিলেও বিভাগীয় কার্যধারা নিষ্পত্তির ক্ষেত্রে কোনো বাধা থাকিবে না :

তবে শর্ত থাকে যে, কারা কর্তৃপক্ষ বিভাগীয় কার্যধারায় উক্ত কর্মকর্তা-কর্মচারীর উপর কোনো দণ্ড আরোপ করিবার সিদ্ধান্ত গ্রহণ করিলে, এই বিষয়ে বিচারাধীন মামলা নিষ্পত্তি না হওয়া পর্যন্ত এইরূপ দণ্ড স্থগিত থাকিবে।

১১৩। কারা কর্মকর্তা বা কর্মচারী কর্তৃক বিদ্রোহ – (১) কোন ব্যক্তি যদি-

(ক) কারা কর্তৃপক্ষের বিরুদ্ধে কোন বিদ্রোহ সংঘটনের সূচনা করেন, বিদ্রোহের প্ররোচনা প্রদান করেন, বিদ্রোহের কারণ সৃষ্টি করেন অথবা অন্য কোন ব্যক্তির সহিত ষড়যন্ত্রে লিপ্ত হন অথবা বিদ্রোহে যোগদান করেন;

(খ) উক্তরূপ কোন বিদ্রোহে উপস্থিত থাকিয়া উহা দমনের জন্য যথাসাধ্য প্রচেষ্টা না করেন;

(গ) উক্তরূপ কোন বিদ্রোহ সম্পর্কে জ্ঞাত থাকিয়া বা উক্তরূপ কোন বিদ্রোহের অস্তিত্ব রহিয়াছে বলিয়া বিশ্বাস করিয়া অথবা উক্তরূপ কোন বিদ্রোহের কারণ ঘটানোর কথা জ্ঞাত থাকিয়া অথবা উক্ত কোন বিদ্রোহ, উত্তেজনা বা ষড়যন্ত্রের কথা যুক্তিযুক্তভাবে জ্ঞাত থাকা সত্ত্বেও যুক্তিসঙ্গত বিলম্ব ব্যতিরেকে তাহার উর্ধ্বতন কর্তৃপক্ষ বা সরকারকে বিষয়টি অবহিত না করেন; অথবা

(ঘ) অধিভুক্ত অন্য কোন ব্যক্তিকে বাংলাদেশ সরকার বা কারা কর্তৃপক্ষের প্রতি তাহার কর্তব্য বা আনুগত্য হইতে বিরত থাকিবার প্রচেষ্টা গ্রহণ করেন; তাহা হইলে তিনি পাঁচ বছর পর্যন্ত যে কোন মেয়াদে দণ্ডপ্রাপ্ত হইবেন।

(২) উপধারা (১) এ বর্ণিত অপরাধ সংঘটনকালে কোন ব্যক্তি যদি বাংলাদেশে প্রচলিত অন্যান্য ফৌজদারি আইনের অধীন অন্য কোন অপরাধ সংঘটিত করেন; তাহা হইলে উহা ভিন্ন অপরাধ হিসেবে গণ্য হইবে এবং উক্ত ব্যক্তি যে আইনের অধীন অপরাধ সংঘটিত হইয়াছে উক্ত আইনেও দণ্ডিত হইবেন।

**১১৪। বিদ্রোহ সংক্রান্ত অপরাধের ক্ষেত্রে বিশেষ আদালত গঠন** - যুগ্ম জেলা ও দায়রা জজ পদমর্যাদার নিম্নে নহে এরূপ বিচারকের আদালতকে সরকার ধারা ১১৩ অনুসারে অধীন অপরাধের বিচারের নিমিত্তে বিশেষ আদালত ঘোষণা করিবে এবং উক্ত আদালত সংক্ষিপ্ত বিচার পদ্ধতিতে বিচার সম্পন্ন করিবেন।

(২) উপধারা (১) এর অধীন গঠিত আদালতে সাক্ষ্য উপস্থাপন, নথি সংক্ষণ, বিচার পদ্ধতি, সাজা প্রদান পদ্ধতি, রায় কার্যকরীকরণ ইত্যাদি বিধি দ্বারা নির্ধারিত হইবে।

(৩) উপধারা (১) এর অধীন গঠিত আদালতের রায় বা আদেশ জেলা ও দায়রা জজ আদালতে আপিলযোগ্য হইবে।

**১১৫। ফৌজদারি অপরাধে চাকরি হইতে বরখাস্তকরণ—**(১) অন্য কোনো আইন বা বিধিতে ভিন্নরূপ বিধান না থাকিলে, কোনো কারা কর্মকর্তা-কর্মচারী কোনো উপযুক্ত ফৌজদারি আদালত কর্তৃক দণ্ডপ্রাপ্ত হইলে তাকে অনতিবিলম্বে চাকরি হইতে বরখাস্ত করা হইবে :

তবে শর্ত থাকে যে, তাহার বিরুদ্ধে অন্য কোনো বিভাগীয় ব্যবস্থা চলমান থাকিলে উক্ত বিভাগীয় ব্যবস্থার সিদ্ধান্ত গ্রহণের জন্য অপেক্ষা করিবার প্রয়োজন পড়িবে না।

(২) কোনো কারা কর্মকর্তা-কর্মচারী ফৌজদারি অপরাধের অভিযোগে গ্রেফতার হইয়া কারাগারে আটক থাকিলে উপযুক্ত আদালত কর্তৃক নির্দোষ প্রমাণিত না হওয়া পর্যন্ত কর্তৃপক্ষ তাকে চাকরি হইতে সাময়িকভাবে বরখাস্ত করিতে পারিবে।

## দশম অধ্যায়

### কারা পরিদর্শন

১১৬। কেন্দ্রীয় কারা পরিদর্শন।- (১) কারা মহাপরিদর্শক কর্তৃক মনোনীত কর্মকর্তার সমন্বয়ে একটি কেন্দ্রীয় কারা পরিদর্শক দল থাকিবে।

(২) উপধারা (১) অনুসারে কেন্দ্রীয় কারা পরিদর্শক দল এর গঠন ও কার্যাবলী বিধি দ্বারা নির্ধারিত হইবে।

১১৭। স্থানীয় পরিদর্শন—(১) বন্দির কল্যাণের নিমিত্ত জেলা ম্যাজিস্ট্রেট-এর সভাপতিত্বে সরকারের সংশ্লিষ্ট দপ্তরের প্রতিনিধি ও সমাজের বিশিষ্ট ব্যক্তিবর্গের সমন্বয়ে গঠিত স্থানীয় পরিদর্শক দল তাহাদের অধিক্ষেত্রভুক্ত কারাগার পরিদর্শন করিতে পারিবেন।

(২) বন্দির আইনি সমস্যা ও আইন সহায়তা নিশ্চিত করিবার উদ্দেশ্যে জেলা ও দায়রা জজ-এর সভাপতিত্বে তাঁহার অধীন বিচারক, চিফ জুডিশিয়াল ম্যাজিস্ট্রেট এবং জেলা লিগ্যাল অ্যাইড অফিসার অথবা, ক্ষেত্রমতো, মহানগর দায়রা জজ-এর সভাপতিত্বে তাঁহার অধীন বিচারক, চিফ মেট্রোপলিটন ম্যাজিস্ট্রেট এবং জেলা লিগ্যাল অ্যাইড অফিসার-এর সমন্বয়ে গঠিত কমিটি তাঁহাদের অধীন কারাগার পরিদর্শন করিতে পারিবেন।

(৩) উপধারা (১) ও (২)-এর অধীন উক্তরূপ পরিদর্শনের পর, বিধি দ্বারা নির্ধারিত পদ্ধতি ও ফর্মে, কারা মহাপরিদর্শক এবং ক্ষেত্রমতো, সংশ্লিষ্ট কর্তৃপক্ষ, দপ্তর, কার্যালয় বা কমিটির নিকট প্রতিবেদন প্রদান করিতে হইবে।

(৪) উপধারা (৩) অনুসারে প্রতিবেদন প্রাপ্তির পর কারা মহাপরিদর্শক বা সংশ্লিষ্ট কর্তৃপক্ষ, দপ্তর, কার্যালয়, কমিটি যথাযথ ব্যবস্থা গ্রহণ করিবে।

## একাদশ অধ্যায়

### বিবিধ

**১১৮। ক্ষমতা অর্পণ**—(১) কারা মহাপরিদর্শক, প্রয়োজনবোধে, এই আইনের অধীন তাঁহার উপর অর্পিত যে-কোনো ক্ষমতা বা দায়িত্ব, লিখিত আদেশ দ্বারা, ডিপার্টমেন্ট-এর কোনো কর্মকর্তা বা কর্মচারীকে অর্পণ করিতে পারিবেন।

(২) উপধারা (১)-এ যাহা কিছুই থাকুক না কেন, সুপারিনটেনডেন্ট, প্রয়োজনবোধে, এই আইনের অধীন তাঁহার উপর অর্পিত যে-কোনো ক্ষমতা বা দায়িত্ব, লিখিত আদেশ দ্বারা, তাঁহার অধীন কোনো কর্মকর্তা বা কর্মচারীকে অর্পণ করিতে পারিবেন।

**১১৯। তথ্য প্রকাশের ক্ষেত্রে বিধি-নিষেধ**—(১) এই আইনের উদ্দেশ্য পূরণকল্পে, ডিপার্টমেন্ট-এর কোনো কর্মকর্তা-কর্মচারী কর্তৃক বন্দিসংক্রান্ত কোনো তথ্য, এই আইন বা আপাতত বলবৎ অন্য কোনো আইনের উদ্দেশ্য ব্যতীত অন্য কোনো কারণে, কারা কর্তৃপক্ষের পূর্বানুমতি ব্যতিরেকে প্রকাশ করা যাইবে না।

(২) ডিপার্টমেন্ট-এর কোনো কর্মকর্তা বা কর্মচারী উপধারা (১)-এর বিধান লঙ্ঘন করিলে তাহার বিরুদ্ধে বিভাগীয় অথবা আইনগত ব্যবস্থা গ্রহণ করা যাইবে।

**১২০। আইন প্রয়োগকারী সংস্থা ও অন্যান্য কর্তৃপক্ষের সহায়তা গ্রহণ**—এই আইনের উদ্দেশ্য পূরণকল্পে, কারা কর্তৃপক্ষ আইন শৃঙ্খলা রক্ষাকারী বাহিনী সংস্থা বা অন্য কোনো সরকারি কর্তৃপক্ষ বা সংবিধিবদ্ধ সংস্থার সহায়তার জন্য অনুরোধ করিতে পারিবে এবং তদনুসারে উক্ত কর্তৃপক্ষ বা সংস্থা সহায়তা প্রদানে বাধ্য থাকিবে।

**১২১। তথ্য প্রযুক্তির ব্যবহার**- কারা ব্যবস্থাপনা আধুনিকায়নের লক্ষ্যে কারা কর্তৃপক্ষ এবং সংশ্লিষ্ট অন্যান্য সকল পক্ষ তথ্য প্রযুক্তির সর্বোচ্চ ব্যবহার নিশ্চিত করিবে।

**১২২। অসুবিধা বা অস্পষ্টতা দূরীকরণে সরকারের ক্ষমতা**—এই আইনের কোনো বিধান কার্যকর করিবার ক্ষেত্রে কোনো অসুবিধা বা অস্পষ্টতা দেখা দিলে সরকার, সরকারি গেজেটে প্রজ্ঞাপন দ্বারা, এই আইনের বিধানাবলির সহিত সংগতিপূর্ণ হওয়া সাপেক্ষে, উক্তরূপ অসুবিধা বা অস্পষ্টতা অপসারণ করিতে পারিবে।

**১২৩। বিধি প্রণয়নের ক্ষমতা**—এই আইনের উদ্দেশ্য পূরণকল্পে, সরকার, সরকারি গেজেটে প্রজ্ঞাপন দ্বারা, বিধি প্রণয়ন করিতে পারিবে এবং উক্ত বিধি ‘জেল কোড বিধিমালা’ নামে অভিহিত হইবে।

**১২৪। রহিতকরণ ও হেফাজত**—(১) এই আইন কার্যকর হইবার সঙ্গে সঙ্গে The Prisons Act, 1894 (Act No. IX of 1894) এবং The Prisoners Act, 1900 (ACT NO. III OF 1900), অতঃপর ‘উক্ত আইনদ্বয়’ বলিয়া উল্লিখিত, এতদ্বারা রহিত করা হইল।

(২) উক্ত আইনদ্বয় রহিত হওয়া সত্ত্বেও, উহাদের অধীন—

(ক) এই আইন কার্যকর হইবার পূর্বে গঠিত কারা অধিদপ্তর এই আইনের ধারা ৪-এর অধীন বাংলাদেশ কারা ও সংশোধন পরিষেবা ডিপার্টমেন্ট হিসাবে প্রতিষ্ঠিত হইবে;

- (খ) প্রতিষ্ঠিত কারা অধিদপ্তর কর্তৃক নিযুক্ত কর্মকর্তা ও কর্মচারী এই আইন কার্যকর হইবার পর এই আইনের অধীন গঠিত ডিপার্টমেন্ট-এর আওতাভুক্ত কর্মকর্তা ও কর্মচারী বলিয়া গণ্য হইবে এবং এই আইন কার্যকর হইবার অব্যবহিত পূর্বে তাহাদের জন্য নিজ নিজ দপ্তর ও কর্মের যে শর্তাবলি প্রযোজ্য ছিল, এই আইন কার্যকর হইবার পর তাহাদের জন্য এই আইন ও এই আইনের অধীন প্রণীত বিধিসাপেক্ষে একই শর্তাবলি প্রযোজ্য হইবে;
- (গ) কারা অধিদপ্তরের যেসকল অস্থাবর বা স্থাবর সম্পত্তি, দায় ও দলিলাদি, রেজিস্টার ইত্যাদি এই আইন কার্যকর হইবার পর এই আইনের অধীন প্রতিষ্ঠিত ডিপার্টমেন্ট-এর নিকট তৎক্ষণাৎ স্থানান্তরিত হইবে;
- (ঘ) প্রণীত সকল বিধি, আদেশ, নির্দেশাবলি, পরিপত্র ইত্যাদি যাহা উক্ত আইনদ্বয় রহিত হওয়ার অব্যবহিত পূর্ব পর্যন্ত কার্যকর ছিল, উহা এই আইনের অধীন প্রণীত বিধি, আদেশ, নির্দেশাবলি, পরিপত্র ইত্যাদি দ্বারা রহিত বা পরিবর্তন না হওয়া পর্যন্ত প্রয়োজনীয় অভিযোজনসহ এবং যতদূর পর্যন্ত আইনের বিধানাবলির পরিপন্থি না হয় ততদূর পর্যন্ত কার্যকর থাকিবে;
- (ঙ) কৃত কোনো কাজ-কর্ম বা গৃহীত কোনো ব্যবস্থা এই আইনের অধীন কৃত বা গৃহীত হইয়াছে মর্মে গণ্য হইবে;
- (চ) কারা অধিদপ্তরের কোনো কর্মকর্তা বা কর্মচারীর বিরুদ্ধে বিভাগীয় ব্যবস্থা গ্রহণ করা হইয়া থাকিলে উক্ত ব্যবস্থা বা কার্যধারা, এই আইনের বিধানাবলির সহিত সামঞ্জস্যপূর্ণ হওয়া সাপেক্ষে, রহিত বা সংশোধিত না হওয়া পর্যন্ত বলবৎ থাকিবে এবং এই আইনের সংশ্লিষ্ট ধারায় দায়েরকৃত ও গৃহীত হইয়াছে বলিয়া গণ্য হইবে;
- (ছ) কারা অধিদপ্তরের কোনো কর্মকর্তা বা কর্মচারীর বিরুদ্ধে দায়েরকৃত কোনো মামলা বা কার্যধারা কোনো আদালত বা কর্তৃপক্ষের নিকট চলমান থাকিলে, উহা এমনভাবে নিষ্পত্তি করিতে হইবে, যেন উক্ত আইনদ্বয় রহিত হয় নাই;
- (জ) কারা বন্দির যেসকল সুযোগ-সবিধা প্রদান করা হইয়াছে বা চলমান রহিয়াছে উক্তরূপ সুবিধাদি এই আইনের অধীন প্রদত্ত হইয়াছে বলিয়া গণ্য হইবে এবং চলমান সুবিধাদি এই আইন ও উহার অধীন প্রণীত বিধির বিধানসাপেক্ষে অব্যাহত থাকিবে।
- (ঝ) কারা অধিদপ্তরের অধীন প্রকল্প, যদি থাকে, গ্রহণ করা হইলে উক্তরূপ প্রকল্প এই আইনের বিধানাবলিসাপেক্ষে সংশোধিত, পরিবর্তিত না হওয়া পর্যন্ত প্রকল্পের নির্ধারিত সময়সীমা অনুযায়ী বাস্তবায়িত হইবে।

১২৫। ইংরেজিতে অনূদিত পাঠ প্রকাশ ইত্যাদি—(১) এই আইন কার্যকর হইবার পর সরকার, সরকারি গেজেটে প্রজ্ঞাপন দ্বারা, এই আইনের মূল বাংলা পাঠের ইংরেজিতে অনূদিত একটি নির্ভরযোগ্য পাঠ (Authentic English Text) প্রকাশ করিবে।

(২) বাংলা ও ইংরেজি পাঠের মধ্যে বিরোধের ক্ষেত্রে বাংলা পাঠ প্রাধান্য পাইবে।